

**2026**

Ngongo muinayi tô ne  
ngondo muisambombo

2ème Trimestre  
Kalasa ka Nsabatu bua  
Bakulumpe



# **MALU A MUSHINGA A TSHIPROFETE**

**Dijandula dia mudimu wa tshiprofete wa  
Danye ne wa Yone**

# **TSHIKEBELU**

1. Mbangilu wa Tshiprofete .....	5
2. Nzambi udi utumina ba-nfumu batumibue.....	10
3. Makelenge atshilualua masokolola .....	15
4. Tshikena kumona tshia kumudilu tshia Danyeke ....	20
5. Dilondangana dia Makelenge .....	26
6. Tshikena kumona tshiunvuija .....	31
7. Diunzulula dia tshiakabidi dia Mukanda mutua tshitampi .....	36
8. Muprofete wa mu Patemos .....	41
9. Dragon, Mukaji ne Bishadila .....	46
10. Nyama wa lonji ne tshimanyinu .....	52
11. Banjelo basatu .....	57
12. Dibikila dia ndekelu .....	62
13. Nshikidilu mamanyisha .....	67

Malesona a Kalasa ka Nsabatu adi bulongolodi bua kuyila kua ku dituku ne ku dituku, mashindamena amu pa Mukanda wa Nzambi ne pa Nyuma wa Tshiprofete kakuyi meyi matenteka pa mutu nansha. Mifundu idi amu mu tshikoso, kadi mishala milama amû menji adi mu mufundu muine.

Tuboko [ ] tudi ne diambuluisha dia kutupepejela ne kutuleja butoke ngunvuilu wa meyi adi atamba lunvu luetu.

Tuya kumanya ne bilondeshile nkudimuinu wa Mikanda ya Nzambi mishilangane, tudi mua kuya kupeta dishilangana dia nvesa umue anyi yabungi ku tshikebelu tshia nvesa mu Malesona a Kalasa ka Nsabatu.

Mamuangalaja kudi :

Seventh Day Adventist Reform  
Movement, P.O. Box 7240,  
Roanoke, Virginia 24019-5048,  
U.S.A.

Traduction et distribution en France :  
Eglise Adventiste du Septième Jour  
Mouvement de Réforme, 11, rue de Viry,  
91600 Savigny-sur-Orge

Makudimuna mu Tshiluba kudi Union des Missions  
du Centre de la R.D.- Congo à Kananga.

Contact : WhatSapp

- +243818996325
- +243997492517
- +243812165912

Dilesona dimue didi dipanyishibua ku mushinga wa  
6 \$ anyi 13.800 Fc Mushinga udi mu Buloba bujima

## Meyi a mbangilu

Mukanda wa Nzambi wakafundibua ne kulamibua kudi Nzambi mu tshipatshila tshia wowu kutukuatshisha bua kutulombola mu menji a kudi Nzambi. Malu adi munda mua Mukanda wa Nzambi adi atupesha malesona a bungi kutamba bua moyo udi wetu ne bua tshikondo tshitudi mene bikala ne moyo. Bumanyishi ebu bua mudimu wa Nzambi munkatshi mua muyuki wa kale wa bisamba ne wa bantu bandi, budi butukankamika ne butujadikila bua dinanga diandi. Bumanyishi buandi bua mushinga mutambe, muyuki wa moyo ne lubila lua Yezu, budi bujula mu tuctu dinanga bua Nzambi, ‘bualu bua Yeye wakadianjila kutunanga’ – *1Yone 4 :19*

Tshimue tshia ku bibadi bidi bilobesha bia Nzambi wetu, bu muditshi tshiamba mu Mukanda wa Nzambi, tshidi dimanya diandi dia malu atshilualua. Udi mua kudianjila kuleja bantu nshikidilu wa bualu ku tshibangidilu tshiabu’ (*Yeshaya 46 :10*). Ke bidi bienza bua yeye kukuata mudimu ne bukole buandi budi kabuyi ne nshikidilu bua kukumbaja « Malu onso bua badi banange Nzambi » (*Lomo 8 :28*). Ne ke n’kujika nansha. Ku tshikondo ne tshikondo, kusungula bua kubuluila bantu bandi ‘malu mene adi ne bua kulua tshitupa tshipi » (*Buakabuluibua 1 :1*).

Ebi bidi bitupesha ditekemena mu dinanga diandi ne mu kulongolola kuandi kua malu, ne etshi n’tshimue tshia ku bimanyinu bia menji a Nzambi a Mukanda wa Nzambi. Anu bia mushindu udi biprofete bienda bikumbana munkatshi mua bikondo ne bu mudi malu enda alondangana lelu, bidi bileja ne diyi dia Nzambi didi ditambe tshidi ngenzelu wa bantu.

Tshiprofete tshidi ne mushinga mutambe bua bana ba Nzambi. Udi wamba meyi a kusankisha eu udi ‘ubala ne badi bunvua meyi a tshiprofete, a buambi ebu, ne badi balama malu adi mafundamu » (*Buakabuluibua 1 :3*).

Munkatshi mua mifundu ya baprofete, babidi m’badisunge pa buabo bua kuamba kuabo kua malu atshilualua mu mushindu musunsula ne meyi manene. Danye ne Yone bakapeshibua bujitu bua bobo kuamba ngumu eyi ya pabuayi, ne mikanda yabo, Danye ne Buakabuluibua’ n’yoyi idi mu tshialu mu Malesona a Kalasa ka Nsabat mu ngondo eyi isatu. Mu ngondo eyi isatu idi ilua, bayidi ba Kalasa ka Nsabat nebayile malu a kale a kudi Danye ne kudi Yone, ne bimue biprofete biamba kudibo. Biobi biprofete m’bidi bikale nshindamenu udi kunvua nandi lubila lua ba-Adventiste ne ludi lua kunyungakana kua mu myuma ne kua malu a tshididi ku kale ne kua mpindieu.

Bu mudiku kakuyi muaba wa bungi mu ngondo eyi isatu bua kuyila malu onso adi mu mikanda eyi ibidi, tudi tukanka mika balongi bua baya kuyila mikanda eyi mu ndondo wayi, ne kupetangana kuayi ne malanda ayi ne malu makuabo adi mu Mukanda wa Nzambi.

Umue wa ku mishimi mimpe mitambe bua bayidi ba Kalasa ka Nsabat, bua kubakuatshisha bua baya kunvua mu bule ne butshiana biprofete ebi, m’bukanda wa Uriah Smith udi ne, *Thoughts on Daniel and Revelation (Menji pa mukanda wa Danye ne wa Buakabuluibua)*. Mukanda eu ngutudi tuambila bayidi ba Kalasa ka Nzambi bua bobo kũbala munkatshi mua ngondo eyi yonso isatu. Kuyila eku kua biprofete kuikala dibenesha kunudi. Eu udi mutendelelu wetu, bualu bua « tshikondo tshidi pa buipi » - *Buakabuluibua 1 :3*

Tshibambalu tshia Kalasa ka Nsabat ku Conférence Générale.

## Mulambu wa pa buawu bua Nzubu wa midimu ya Champ ku Italie

Italie, n'Ditunga dimpe tshishiki, dia lumu, didi disanga nyibua mu mutshima wa Mayi manene a Méditerranée, ndimanya mu Buloba bujima bua muyuki wadi wa kale mene mene, dimanya dia ditunga edi dia kuenza kua bintu bia mpatshi, kadiena kufuanyikija, ndambilu wa bia



kudia bisheme ne mpata yandi ne madimi, bikunyibua, misulu ya mayi, m'bimpe bitambe. Pa kumbusha bua se Italie m'muaba mumanya buloba bujima udi ba bungi balue kubandila, m'mumanye kabidi bua se m'muaba udi upatula bintu bia bungi bia mu madimi bidi bua biapua ne bua kudia. Ne bantu bapite pa 60 millions, Italie udi mubapesha budishikaminyi bua malu a ntendelelu mu Diyi Dikulu dia Ditunga. Apu ntendelelu wa buena Catholique n'ngudi yeye ku mutu ne 74 % wa bantu, balonde kudi bena Kilisto badi kabayi bena Catholique ne 9,3 % ne, kulua kua matuku â kua bantu mu Italie, ne dikalaku dia bena Islam, badi benda bavulangana ni pafika matuku â ku 3,6 %. Kulonda pashishe kudi tusumbu tukuabo tukese tua ntendelelu, apu kudi kabidi badi kabayi bamanye Nzambi badi benda bavulangana.

Lubila lua Mouvement de Réforme, lua ba Adventiste du Septième Jour, luakambibua bua musangu wa kumpala mu Italie mu tshidimu tshia 1926, kadi, ki n'kumpala kua bidimu bia 1939/40 kuakalolongolobua tusumbu tua kumpala tua bibakuludi. Mudimu wakatuadija mene mene kudiunda mu bidimu bia 90 kunyima kua difika dia bamue bambi bak u Amélika wa ku Sud, bak u Portugal, ne ba ku Roumanie, ne dijadika dia tusumbu tukuabo mu bitupa bishilangane mu ditunga. Katshia ku tshikondo atshi, Lumu kufidibua ne tshisumi ne kujadikibua mu miaba mishilangane mu tshipapu tshia Italie. Lelu, tudi ne ba membres bapite pa 130, badi munda mua Ekelezia 6, groupe ibidi ne bamue ba membres ba pa bule nkayabo.

Lelu eu tudi ne tshibambalu, nzubu wa Ekelezia, udi muikale ku Nord-Est wa ditunga, mu tshimenga tshia Trieste. Nunku, tudi kabidi ne dijinga dia ne lukasa dia kupeta muaba udi muikale wa mushindu wa kuenza mudimu wa buambi.

Muaba eu newikale nzubu wa midimu misanga, ne newambuluisha musumba munene wa bana betu balume ne bakaji bua kulua kubuela mu masangisha malongolola bu mudi, kuyisha malongolola bu mudi, kuyisha kua bansonga betu mudimu wa kuamba kua Lumu Luimpe, kuyila kua misambu, kuyila kua malu a bukole bua mubidi, kulamba kua bia kudia bidi kabiyi ne minyinyi. Tudi tuela menji bua se muaba eu newikala muaba udi ukengela bua kudiunda kua mudimu wa Mukelenge mu Italie. Ke bua tshinyi tudi tulomba kudi bana betu balume, bakaji ne balunda mu Buloba bujima bua kutua mpanda ku bualu ebu ne mapa abo a moyo wa dipa.

Ku ngasa wa Yezu ne ku dikuatshisha dienu, netufike ku tshipatshila etshi, netukoleshe kuamba kua Lumu Luimpe mu ditunga edi ne netutuale Lumu lua lupandu kudi misuka mikuabo mivule. Mukelenge anusankishe ne anufute bivule !

Bana benu bak u Champ wa Italie

**MBANGILU WA TSHIPROFETE**

« Ne tudi ne diyi diakamba baprofete ditambe kujadikibua ; nunku nudi nuenza bimpe binuadimuka bienu, bu mudibu kudi muinda udi utema mu muaba wa midima, tô ne patshia butuku ne pabanda mutoto wa nkesha mu mitshima yenu » - *2Petelo 1 :19*

Bia kubala : *La Tragédie des Siècles, Shapita 37*

« Muyuki wa kale ne biprofete bidi bijadika ne, Nzambi wa Buloba bonso udi ubulula patoke malu andi masokoka kudi Buloba kupitshila kudi batuadi ba bukenke badiye mudisunguile » - *Bible Training School, 1<sup>er</sup> Décembre 1912*

**Dia kumudilu**

**29/03**

**1. NYUMA UDI KAYI MIKALU**

**a. N'tshinyi tshidi Nzambi nkayandi mua kumona ? *Yeshaya 46 :9-10***

.....  
« 'NDI MUNDI' udi unvuija dikalanganaku dia tshiendelele ; matuku mamane kupita, adiku ne alualua bidi bikale bule bumue bua Nzambi. Yeye udi umona malu a matuku a kale kale mene mene a muyuki wa kale ne bumudiye umona malu atshilualua, m'bumutudi tuenda tubimona bumudiu akumbana ku dituku ne ku dituku. » - *The SDA Bible Commentary, vol. 1, p.1099*

**b. N'tshinyi tshidi Mukelenge wetu wenza ne dimanya edi ? *Danyele 2 :20-22***

.....  
« Udi musombe mu nkuasa wandi wa butumbi, wenda ukokeshu kunyunganakana kua dibulunga dietu. Kakuena tshidi disu dia Nzambi kadiyi dimona ; ne mu tshiendelele tshiandi tshia butumbi, tshia lutulu ne buakane, udi utuma diyi bua biya kuenzeka bilondeshile mudi dimona dimpe dia bulongolodi buandi bua malu » - *Le Ministère de la Guérison, p. 354 anyi The Ministry of Healing, p.417*  
« Bidi bimueneka bua se, mu kubala kua mikanda mifunda ya malu a kale a bukua bantu, dimueneka ne dikuluka dia makelenge bidi bilondeshile disua dia bantu nedienza diabo dia malu a mponono. Dimueneka dia malu bu mudiwu enda enzeka, adi ashintuluku bu mudi bukole bua makelenge, kulumba kuawu kua malu anyi peshi kuenza kuabo kua malu bu mudi moyo musue. Kadi Diyi dia Nzambi didi diumbusha tshilulu tshikudika, ne tudi tutangila dia muamua, pa mutu, kunyima, ne kumona mudi malu enda aya malondangane, ku bukole ne, bukokeshi ne ku majinga a bantu, tshienzedi tshia eu, udi mu luse luandi lunene kayi muenzeja, wenda ukumbaja mu lutulu ne ditalala malu andi malongolola a disua diandi » - *Prophètes et Rois, p. 380*

## 2. MALU MASOKOKA MABULUDIBUE PATOKE

a. **Nzambi udi wenza tshinyi padiye pa buipi ne kukumbaja disua diandi pa Buloba ?** *Amosa 3 :7 ; Buakabuluibua 1 :1*

« ‘Yehowa Nzambi kena wenza bualu bikalaye kayi muanji kubusokoluela bantu bandi baprofete diambedi. Malu atshidi masokoka adi malu a Yehowa, Nzambi wetu ; kadi malu adi masokolola adi malu etu ne a bana betu tshiendelele’. (*Amosa 3 :7 ; Dutelenome 29 :29*). Malu â Nzambi m’mutupeshawu ; ne disanka diandi didi dilonda kuyila kua ne kanemu kua mifundu ya biprofete, kuyila eku kudi kuenzeka ne menji a mitendelelu’ » - *Jésus Christ, p. 216-217*

b. **Bua tshinyi Nzambi udi ututumina ngumu ya mushindu eu ?** *IYone 3 :1 ; Yone 1 :12 ; Kolosai 1 :25-28*

« Mukanda wa Nzambi udi muikale Mukanda muakane bitambe ne wa dikema. M’muyiki wa kale udi utubuluila malu a bikondo biakamana kupeta. Bu koko kakuyi Mukanda wa Nzambi, tuakadi kushala mu difuikakaja dia menji ne nu nsumuinu pa bidi bitangila malu a mu bikondo biakamana kupita. Tshiprofete n’tshidi tshibilula patoke biakamana kupita. Tshiprofete n’tshidi tshibilula patoke malu a mu matuku a tshilualua. N’Diyi dia Nzambi didi ditubuluila patoke Tshifufu tshia Lupandu, n’didi dituleja njila utudi mua kunyema lufu lua tshiendelele ne kupeta moyo wa tshiendelele. Ku mikanda yonso idi miüle Buloba tente, nansha yoyo mikale ya mushinga kayi, ya kuanyisha, Mukanda wa Nzambi udi muikale Mukanda wa mikanda, udi ukengela bua tuetu kûyila bikole ne tuetu kuwanyisha. Kawena anu wamba bua muyuki wa kale wa Buloba ebu, kadi udi unvuija kabidi bua mushindu wikale Buloba mu matuku alualua. Mukanda wa Nzambi udi muikale munda muawo ne mayisha pa malu a kukema a bufuki, udi ubuluila patoke lunvu luetu bua ngikadilu wa Mufuki wa Diulu ne Buloba. Udi muikale dibuludibua dia patoke dia Nzambi kudi muntu » - *The Signs of The Times, 30 Janvier 1893*

c. **N’dimanya kayi didi dia mushinga mutambe kutudi, mu mamanya a kukeba ?** *Yelemiya 9 :23,34 ; Yone 17 :3 ; Efeso 3 :17-19*

« Nyuma udi usuna mu Diyi dia Nzambi bidi mua kudisha menji adi ndondo, menji a pa mûlu kutamba. Tudi tudisangisha ne bankambua ne baprofete, tudi tunvua diyi dia Yehowa bu mudiye wakula ne bantu. Tudi tubandila Butumbi buandi bua mu Diulu mudibo budipuekesha bua kulua kuangata muaba wetu, ne mudibo buluangana nkayabo ne makole a midima, buditshimuna bua bualu buetu. Kubandila kua kanemu kua biena bualu bia mushindu eu kakuena mua kuya kupanga bua kutekesha, kulengeja ne kufila buneme kudi mutshima, mu kupesha nyuma bukole bupia bupia ». - *Conseils aux Educateurs, aux parents et aux Etudiants, p.45*

### 3. KUNVUA MUDI DIYI DIAMBA

#### a. Tudi dijinga ne dikuatshisha kayi bua kunvua mudi Mifundu yamba, ne tshiprofete mene ? *Yone 16 :7-13*

« Mu menji a Nzambi mutu anu bua kupesha bantu bandi pa Buloba munya muvule. Njila udi anu umupela bua kufika ku dimanya edi. Katuena mua kunvua tshidi Diyi dia Nzambi bituikala katuena bakenkeshibue kudi Nyuma mene wakapeshaye bantu. » - *Ministère Évangélique, p. 291*

« Kabiena biakane kudifila ku diyila dia Mukanda wa Nzambi kakuyi kutendelela nansha. Diambedi ne bulomba dickenkeshibua dia kudi Nyuma Muimpe, ne nebatupeshadi. Pakalua Natanaele kudi Yezu, Musungidi wakamba ne : ‘Tangilayi Muena Isalele udi kayi ne lubombo bulelela’. Natanaele wakamukonka ne : ‘Wewe udi mûmanye meme kudi kunyi ?’ ‘Yezu wakamuandamuna ne, Diambedi ne Filipo kayi muanze kukubikila, pawakadi muinshi mua mutshi wa nfigi, nakukutangila.’ (*Yone 1 :47-48*).

Yezu neatutangile kabidi mu mutendelelu wa mu musokoko wa mu nzubu wetu wa bulalu, utudi tumulomba bua yeye kutubuluila bulelela buandi. Banjelo nebikale ne aba badi bakeba ne kudipuekesha munya wa Nzambi. » - *Vers Jésus p. 90-91*

#### b. Bua tshinyi bidi bia mushinga bua kupanga anu kulonda tshidi menji etu patudi tuyila tshiprofete ? *2Petelo 1 :19-21*

« Mu kuyila kua Diyi, nudi ne bua kuteka ku luseke menji enu mamana kufukakaja. Kanuena mua kufika ku bulelela kashidi mu kuyila kua Mifundu anu bua kuimanyina ne kuakuila menji adi enu nkayenu nansha. Atekayi ku luseke ne telejayi, mutshima udi munyingalale, ng’owu mene udi Mukelenge uya kuambila bualu. Diyi didi difila lungenyi kudi udi ulukeba udi ne kudipuekesha udi usomba ku makasa a Kilisto bua kuangata kudiye bulelela. Kudi badi batshinka ne m’bena menji a bungi bua bobo kuyila Mukanda wa Nzambi, Kilisto udi wamba ne : Binuasua kulua bena menji ku lupandu, ikalayi bena lutulu ne badi ne mitshima mipuekele. Kanubadi Diyi bilondeshile menji enu a kale ; kadi tangelulayi ne ndondo mene mene diyi ne kutendelela, nyuma wa budikadidi ku bienjenji bionso. Bu bikala munkatshi mua kubala kuenu, kutuishibua kuya kumueneka munda muenu ; binuikala nua kumona ne menji enu kaena apetangana ne Diyi, kanukebi mua kufikisha Diyi mu diunvuangana ne menji enu nansha. Kadi enzayi bua menji enu apetangane ne Diyi. Kanudilekeledi ku buenzeji bua binudi bitabuje ne kua bilele bienu nansha. Kangulayi mesu a nyuma yenu bua nuenu kubandila malu a kukema a mikenji. Tangilayi bidi bifunda ne tekayi makasa enu pa Lubuebue lua tshindelele. » - *Messages à la Jeunesse, p.258*

#### 4. TSHITUPA EKU NE TSHITUPA KUAKA

a. **M'mushindu kayi udi Nzambi umanyisha Diyi diandi ne m'mushindu kayi utudi mua kuyila Diyi edi ?** *Yeshaya 28 :9-10*

« Dilejibue patoke dia Diyi dia Nzambi didi mu Diyi mene nkayadi. Mufundu udi muikale nsapi wa kukangula mufundu. Diunvuija dia ndondo dia malu malelela adi mikale mu mifundu adi mabuludibue patoke kudi Nyuma Muimpe » - *Témoignages pour l'Eglise, vol. 3, p. 279*

« Nsesa nansha mukese wa mu Diyi dia Nzambi udi uya kujula diela dia menji dimpe kudi bonso badi bamubala ne menji mikale pepi bua kunvua ne kumanya. Kadi diyisha ditambe buakane kadiena dia kukuata bimpe mu kuyila kua tshimpitshimpi, kadi, kua ku musangu ne ku musangu. Tshibungi tshia malu malelela a ndondo a mu Mukanda wa Nzambi, mubadi wa ne lukasa lukasa ne udi kayi ne ntema ya bungi kena mua kutshijingulula nansha. Malu masokoka a bubanji mu ndondo, adi mua kuikala majandula anu mu dikebulula dia tshisumi ne kudienzeja. Malu malelela adi enza tshisumbu tshinene adi kulonda ne kutekibua muaba umue, 'tshitupa eku ne tshitupa kuaka'. (*Yeshaya 28 :10*).

Apu ne bimueneka bua se bidi biunvuangana mene mene mu biobi. Lumu Luimpe elu ludi lupetangana ne lukuabo, tshiprofete etshi tshidi tshiunvuija tshiprofete tshiatshia, malu malelela adi adiamamuna neafika kûndekelu wawu. Diunvuija dia tshiena Yuda didi diya kujadika bimpe mene kudi Lumu Luimpe. Mukenji onso udi ne muaba wawu mu Diyi dia Nzambi, tshienzedi tshionso tshidi ne ludi luatshi. Ne mu tshibungi tshiabi, ku bulongolodi bua malu abi ne bunene buawu, bidi biamba bua udi muen'abi. Anu Nzambi nkayandi udi kayi nshikidilu n'ngudi mumanye mua kûafuimba ne kuya nawu ne ku nshikidilu » - *Education, p. 139-140*

b. **Bua tshinyi mufundu onso wa mu Mukanda wa Nzambi udi ne mushinga ?** *Matayo 4 :4, Luka 24 :27*

« Pa bitangila mayisha a Mifundu ya tshijila, katueyemenyi nansha menji a muntu. Tuyilayi Diyi dia Nzambi bua buimpe buetu nkayetu. Makole a ngelelu wa menji a buneme adi apeta bualabala padiwu adifila bua kulamata ku malu malelela a mu Mukanda wa Nzambi, mu kufuanyikija Mufundu ku Mufundu ne malu a nyuma ku tshidi tshia nyuma ... Menji adiku anu mu kuikala ne ntema mivule ne kuyila kudi kuenzeka ne kutendelela. Kudi bitupa bia Mifundu bidi bikale biamba malu matoke munvuike ; kadi kudi bikuabo bidi diunvuija kadiyi dipepele bua kunvua. Bidi bikengela kufuanyikija nvesa ku mikuabo ne kondola biakane mene mene, ne kuela kua menji, ne kutendelela. Kuyila kua nunku nekufutshibue biakane bitambe. Bidi bia momumue ne tshitenda tshia muana, mu kumbula kua Buloba, tshidi tshiya kujandula milungu yatubanda tua mushinga mutambe, bidi nunku bua eu udi ondola ne kusuminyina Diyi dia Nzambi bu mudi bubanji busokoka, udi uya kusanganamu malu malelela a mushinga mutambe bunene adi mukebuludi wa lulengu kayi mua kupeta. Meyi a Nzambi, malama mu mutshima adi bu mudi misulu ya mayi adi apueka a mushimi wa moyo. » - *Le Meilleur Chemin, p. 87-88*

## 5. KUYILA NE MENJI

a. **M'mushindu kayi udi ngikadilu wetu ne kusungula kuetu bilenga menji etu ne lungenyi bua kujingulula biprofete ?** *Danyele 12 :10 ; 2Timote 3 :1-8*

« Menji anudi nuyila newu Mifundu ya tshijila n'ngowu adi ajadika ngikadilu udi wa mukuatshishi udi uya kunufila. Banjelo ba muaba udi wa munya nebakale ku luseke lua aba badi, mu kudipuekesha kua mutshima, benda bakeba bulombodi bua Nzambi. Kadi binuikala muakubulula Mukanda wa Nzambi ne kupanga kua kanemu, ne menji a kudieyemena, bikala mutshima webe mûle tente ne bienjenji, Nsatana neikale ku luseke luebe ne nekunyangakaja luidi luakane lua butoke lua meyi a Nzambi » - *Testimonies to Ministers, p. 108*

« Nsatana kudienzeja munkatshi mua bikondo bua kuitabujija bena Kilisto ba bungu bua se Mukanda wa Danyeke ne wa Buakabuluibua yakadi mikanda idi kayiyi mua kunvuika. Kadi mulayi wakafidibua kutudi mutoke bua disanka dia pa buadi didi dilonda kuyila kua biprofete ebi » - *Prophets and Kings, p. 547*

b. **Unvuija mushinga wa kudifila ku bulelela.** *Buakabuluibua 22 :7 ; Matayo 7 :24-27 ; Yone 7 :17*

« Yehowa udi ulombola badipuekeshi, bualu badi basue kuyila, ne kuyishibua, ne badi ne dijinga dia bushuwa dia kumanya ne kuenza disua dia Nzambi. Mukelenge m'mufila mulayi eu ne : 'Bikala muntu musue kuenza disua dia Nzambi, neaye kumanya bua se diyisha dianyini n'dia kudi Nzambi.' Ne udi wamba mukana mua mupostolo Yakobo ne : 'Bikala umue wenu kayi ne lungenyi, alomba biandi kudi Nzambi, udi ûfila ku budisuila buandi, kakuyi bualu bua kubanda nabu ». Kadi mulayi eu udi anu bua aba badi basue kulonda mene mene Yehowa. » - *Patriarches et Prophètes, p. 387-388 (Bâle)*

« Binuikala basue kumanya bualu busokoka bua buakane, nudi ne bua kulonda diyi ditoke dia bulelela, nansha nuenu bunvue tshintu kampanda anyi to, nansha nuenu banyungishabua anyi to. Ditumikila didi difuma ku luidi ludi lua mikenji, ne tshidi tshiakane tshidi tshia kukeba mu bikondo bionso » - *Fundamentals of Christian Education, p. 125*

## Disambombo

03/04

Makonka a kuambulula dilesona

1. Bua bidi bitangila dimanya m'mushindu kayi udi Nzambi mushilangane ne bifukibua bionso ?
2. N'tshinyi tshidi Nzambi ubulula patoke mu mifundu ya baprofete ? Bua tshinyi ?
3. N'dikuatshisha kayi ditudi ne bua kulomba mu mutendelelu patudi tubulula Diyi dia Nzambi ?
4. N'kudienzeja kua mushindu kayi kûndi ne bua kuenza tshiyi muenzeja mu kuyila kua Mukanda wa Nzambi ?
5. N'di ne dijinga dia kuteka mu tshienzedi bindi njandula mu Diyi dia Nzambi anyi ?

**NZAMBI UDI UTUMINA BA-MFUMU BATUMIBUE**

« Moyo wa bansongalume ba bena Ebelu (*Danuele ne balunda bandi*) moyo eu udi dimueneshibua dia patoke dia tshidi Nzambi mua kuenzela aba badi badilekelela mu bianza biandi, ne badi bakeba ne mutshima wabo onso bua kukumbaja tshidi kulongolola kuandi kua malu » - *Prophètes et Rois, p. 374*

**Dia kumudilu**

**05/04**

**1. BAPIKA MU BABULONA**

a. **M'mushindu kayi wakadisangana Danyeleye mu Babulona ?** *Danyeleye 1 :1-7*

.....

b. **N'tshinyi tshiakafika ku dipangadika diangata kudi Danyeleye pa bidi bitangila bia kudia bia ku mesa a mukelenge ?** *Danyeleye 1 :8-16*

.....

« Kapesa kamue kalambula mpingu, biakudia bionso biakadi bifila ku kutendelela kua mpingu, ne eu yonso wakadi ubadibua ne m'mutumbishi wa nzambi ya bena Babulona. Apu Danyeleye ne balunda bandi, mu kujinga bua kushala bena lulamatu kudi Mukelenge, bakabenga kudisangisha mu kutendelela eku kua mpingu ...

Ku luseke lukuabo, bakadi batshina bipeta bibi bidi bisaka mubidi bia n'dilu wakadi mua kubafikisha ku tshiendenda tshia masandi ne ku malu a bundu mu nsombelu, ne kuenzeja kudiunda kuabo kua mubidi, kua ngelelu wa menji ne kua mu nyuma. » - *Prophètes et Rois, p. 367*

« Tshikondo tshiakatekibua Danyeleye ne balunda bandi kumpala kua diteta, bakaya ku luseke lua buakane ne bulelela. Kaakenza nunku bu ne kabakadi ne menji anyi kabayi bamanye tshiakadibo benza. Bakangata dipangadika bua se bu muakadi munyinyi kawuyi bia kudia biabo katshia ku kale, kabakadi ne bua kûdia mu matuku adi alua. Ne bu muakadi kunua kua nvinyo kukandikibua kudi bonso bakadi ku mudimu wa Nzambi, bakangata dipangadika bua kubenga kunua maluvu » - *In Heavenly Places, p. 261*

c. **Unvuija bualu ebu bupitshisha ne kutshinka kua mukelenge.** *Danyeleye 3 :1-5*

.....

## 2. DITETA DIA KAPIA

a. **Bafunyina lufu, m'mushindu kayi wakadi lulamatu lua bena Ebelu lutetshibue ku mukenji muibidi ?** *Danye 3 :1-15*

« Bonso kabakatuila tshimanyinu tshia kupanga kumanya Nzambi, binu nansha. Munkatshi mua tshibungi tshia batendeledi, bantu basatu bakadi bangate dipangadika dia kupanga kupesha Nzambi wa mu Diulu buneme mu kukukuila lupingu elu. Bakadi bakukuila Mukelenge wa bakelenge ne Mfumu wa banfumu ; kabakadi batuila muntu mukuabo binu panshi nansha » - *Prophètes et Rois, p. 385-386*

b. **M'mushindu kayi wakadibo ne bukole bua kulama ditabuja diabo ne kushala bantu badi ne kutumikila ?** *Danye 3 :16-18 ; Yeshaya 43 :1-2*

« Kadi kufuna kua mukelenge kuakashala kua patupu. Kakadi ne mushindu wa yeye kupumbisha bansonga aba bua bobo kuikala bena lulamatu kudi Mukelenge wa Diulu ne Buloba. Bakayila mayisha a muyuki wa kale wa batatu babo bua se kupanga kutumikila Nzambi, bakaditua mu kupanga kumupesha buneme, tshipupu tshipi ne lufu ; ne ditshina dia Mukelenge n'tshibangilu tshia lungenyi, mushimi wa kudiunda konso kulelela. Batangile tshikutu tshia kapia ne lutulu, kuambabo ne : 'Katuenta ne dijinga dia tuetu kukuandamuna pa muanda eu. Biasua Nzambi wetu utudi tukuatshila mudimu kutusungila, yeye neatusungile mu tshikutu tshia kapia kakole ne mu tshianza tshiebe kabidi, mukelenge'. Ditabuja diabo diakadi dikoleshibue ku menji a se Nzambi neatumbishibue ku bupikudi buetu, bobo kusakidila kabidi ne dijakibua dia butshimunyi ne : 'Umanye biebe, mukelenge, ne katuenta tukuatshila nzambi yebe mudimu, katuenta tutendelela lupingu lua Ngolo luwakuimanyika » - *Ibid, p. 386-387*

c. **M'mushindu kayi wakatumbishibua Nzambi ku disungidibua diabo ?** *Danye 3 :19-20, 24-28*

« Mukelenge wakalonda malu bumuakadiwu enzeka a nkuasa wandi wa bukelenge ; wakadi bua kumona mushindu wakadi bantu aba ne bua koshibua mu kapia, bakadi bamuela munu mukana. Kadi anu musangu umue menji andi a budisu kushintulukawu. Mukelenge kumona munkatshi mua tshikutu tshia kapia Muana wa Nzambi. Kupua moyo bua mulongo wandi ne bunene, Nebukadenesa, wakajuka lukasa mu nkuasa wandi wa bukelenge, kutuluka ... Apu Shadalaka, Meshaka ne Abedenego kuimanabo kumpala kua musumba wa bantu basangile, ne kulejabo bua se kabakadi ne bualu bubenzekele bua bubi ... lupingu lunene lua Ngolo luakadi lupua moyo luakadi luimanyika ne butumbi bua bungi. Kumpala kua Nzambi udi ne moyo, bantu kupeta bowa » - *Ibid, p. 387-388*

### 3. BUDISU NE KUDIPUEKESHA

a. M'mushindu kayi wakakuila Nzambi, mukelenge Nebukadanesa ? *Danyele 4 :4-7*

.....

« Kabiena mua kukemesha bua mukelenge eu wa butumbi muena kulumba kua malu ne budisu budi kabuyi kuamba kuteta bua kumbuka mu njila wa kudipuekesha, udi anu yeye ulombola ku bunene ne lumu bidi bia bulelela ... Mu luse luandi lunene, Mukelenge kutumina mfumu tshilota tshikuabo, bua yeye kumudimuisha bua buteyi buela bua kubutuka kuandi. » - *Prophètes et Rois, p. 392*

b. M'mubelu kayi wakapesha Danyele kudi mukelenge pakabikidibuaye bua kufila diunvuija dia tshilota ? *Danyele 4 :20-27*

.....

« Diumvuija diakadi ditoke ne kupesha muprofete lutatu mu menji ... Muprofete kunvua bua se Nzambi wakadi mumupesha mudimu munene wa kubuluila Nebukadanesa patoke, dinyoka diakadi ne bua kulua kudiye bualu bua budisu buandi ne diambu » - *Ibid, p. 393-394*

« Kunyima kua yeye mumane kunvuija tshilota anu bumuakaditshi, Danyele kuambila mukelenge muena budisu bua yeye kunyingalala bua bubu ne kupingana kudi Nzambi, bua kuepuka bipupu biakadi bimfunyina » - *Ibid, p. 394*

c. Muenzejibue mu kupitshila mu bualu bukole bua kupuekesha milongo, m'mushindu kayi wakafikishibua mukelenge bua yeye kutumbisha Nzambi ku mudimu muenza kudi Danyele ? *Danyele 4 :34-37*

.....

« Munkatshi mua bidimu muanda mutekete, mukelenge wa Babulona wakadi tshiena bualu tshia kukema kudi bantu bandi ; munkatshi mua bidimu muanda mutekete, kupuekeshibua ku mesu kua bantu bonso. Pashishe, yeye kupingaja menji a buntu. Kujula mesu kutangila mu Diulu, yeye kudipuekesha ku mpala kua Nzambi udi ne moyo ; mu dinyoka diakadi difidibue kudiye, yeye kujadika tshianza tshia mu Diulu. Kutonda patoke ku mesu kua bantu bubu buandi, ne kupesha luse lua Nzambi butumbi, yeye wa kumupingaja mu nkuasa wandi ...

Mfumu wakadi muena diambu, kulua muana wa Nzambi mudipuekeshi, wakadi muena tshikisu, anu diende diyi nkayadi, kulua mukelenge muena luse ne buimpe. Yeye wakadi wela Nzambi wa mu Diulu kayanda ne kumupenda kujadika katataka bukole bonso bua Mutambe Bunene wa mu Diulu. Kudienzeja bua kubuela mu mutshima wa bantu bandi ditshina dia Yehowa ne kuenza mudimu bua disanka diabo ...

Nzambi wakadi musue bua tshisamba tshitambe bunene tshia pa buloba tshiamba bua butumbi buandi. Bulongolodi buandi bua malu kukumbana katataka. Diamba dia patoke dia Nebukadanesa bua kujadika bua luse lunene, bua buimpe ne bukole bonso bua Nzambi n'tshienzedi tshia n'dekelu tshia moyo wandi udi muamba mu muyiki wa tshijila » - *Ibid, p. 397*

#### 4. MUFUNDU KU TSHIMANU

a. **M’bualu bua tshimpatampata kayi buakimanyika Beleshasa muana wa Nebukadanesa, mu kupenda kua Nzambi wa mu Diulu ? *Danye 5 :1-6***

.....

« Katshia ku buana buandi kuyila mushindu kayi wakulombola malu a mu bukelenge, wakadi uditumbisha bua bukole buandi ne kufunyina kua Nzambi wa mu Diulu. Kadi wakadi ne bikondo bia kumanya disua dia Nzambi ne kunvua bujitu bua kukokela disua edi. Wakamanya bua dipata dia mu ditunga dia kaku wandi wa balume, dipata edi dienzeja kudi Mukelenge, ne wakamutuma kule ne muaba wakadi bantu. Kakadi mupange kumanya bua kukudimuna kuandi kua mutshima ne dimupingaja diandi dia tshishima. Kadi dinanga dia masanka ne butumbi buandi kukupula mu yeye malesona akadiye kayi mua kupua moyo » - *Prophètes et Rois, p. 399-400*

b. **M’mushindu kayi wakafika kabidi Danye kudi mufumu wakadi kayi mumanye Nzambi bua kumupesha lumulua kudi Nzambi ? *Danye 5 :8-16***

.....

« Muprofete kuanji kuvuluija diambedi mfumu malu akadiye yeye nkayandi mumanye bimpe, kadi akadi kâyi mamuyisha didipuekesha diakadi mua kumusungila. Kumuambila bua bubi ne dikuluka dia Nebukadanesa, mabikila a kudi Nzambi akalua kudiye, bukokeshi ne butumbi biakafidibua kudiye, menji a m’muenu wa malu kukeba budisu buandi pa mutu pa biobi kumupuekesha, bua ditonda diakenzaye pashishe bua bukole ne luse lunene bia mu Diulu. Pashishe, Danye kuleja mukelenge bubi buandi ne bunene buabo. » - *Ibid, p. 403*

c. **M’mushindu kayi wakakumbana diunvuija dia Danye anu butuku abo ? *Danuele 5 :17,25-31***

.....

« Pakatshidi Beleshasa mu nzubu wa bidia bia disanka, munyunguluka kudi bena diandi, diyi kuambibua ne, ‘tshimenga tshiakangatshibua’ kudi muena lukuna wakadibo batshinka ne m’balamangana bimpe mene mene ... Mu tshikondo mene tshiakadi mukelenge ne bantu bandi banene banua maluvu mu mpanza ya tshijila ya mu ntempelo wa ku Yelushalema ne batumbisha nzambi yabo ya argent, ya ngolo, ya tshiamua tshia mitaku, ya mitshi, Bena Madai ne Bena Pelasa, bamana kutshiunguluka mayi a musulu wa Pelata, kubuela munkatshi mua tshimenga tshiakadi katshiyi kabidi ne mutshiluanganyinyi wa nvita. Biluilu bia mvita biakakolesha kubuelabi ne munda mua nzubu wa bukelenge. Babulona wakadi mukuata kudi basalayi bena lukuna, ba bungii ‘bu mpasu’ *Yelemiya 51 :14*, ne mbila yabo ya butshimunyi yakadi ya bungi kupita ya bakadi balue mu kudia kua disanka bakadi bakuatshika ne bowa » - *Ibid, p. 404*

## 5. MU BUINA BUA NYAMA YA NTAMBUE

### a. Bua tshinyi lulamatu lua Danyeleye kudi Nzambi luakamufikisha bua bamukengeshe ne tshinyangu ? *Danyeleye 6 :1-5*

« Buneme ne dizangika biakadi mu Danyeleye kumujudilabi lukuna kudi tupita, tuakadi tukeba tshikondo tshia totu kumufunda ngikadilu eu wakadi kayi kubanda ne bualu wa Danyeleye kumukebela anu lukinu kudi bena lukuna bandi ...

Apu kusangisha kabidi ne, bamfumu ba tupita kunvuangana bua kuela tshitungu mua bobo kufikisha matuku a muprofete ku nshikidilu. » - *Prophètes et Rois, p. 411-412*

### b. N'tshinyi tshiakenzeka bua dibenga dia Danyeleye kutua binu panshi ? *Danyeleye 6 :11-17*

« Nansha muakadiye mumanye mene mene tshiakadi tshimuindile, kakateketa nansha musangu umue. Kakasua bua se bakadi bela tshitungu bua lufu luandi baya kumanya ne malanda andi ne Mutambe Bunene wa mu Diulu akashintuluka. Danyeleye wakadi utumikila Dayawesha mu bionso biakadi bia manema andi, kadi nansha yeye anyi mukenji wandi muela, kakadi mua kumumbusha ku lulamatu luandi kudi Mukelenge wa bakalenge nansha. » - *Ibid, p. 412*

### c. M'mushindu kayi wakatumbishibua Nzambi kabidi mu muena mudimu wandi ? *Danyeleye 6 :19-23,27*

« Nzambi kakapumbisha nansha bua bena lukuna ba Danyeleye kabamuedi mu buina bua nyama ya ntambue. Wakitabuja bua ba demona ne bantu babi bua bafika ne ku ndekelu ne bualu buabo bupangadika. Kadi biakadi anu bua kuleja disungidibua dinene dia Muena mudimu wandi ne ditshimunyibua dinene dia bena lukuna ba bulelela ne buakane. 'Muntu udi ukutumbisha, mudi muimbi wa misambu wamba bua Nzambi, nansha mu tshinji tshiandi (*Misambu 76 :11*). Ku dikima dia muprofete eu wakadi ujinga bimpe kupita matumbi, Nzambi wakadi ne bua kujula dina diandi ne kukondakaja Nsatana » - *Ibid, p. 414*

## Disambombo

10/04

Makonka a kuambulula Dilesona

1. M'mushindu kayi utudi mua kuangata lelu tshilejelu tshia kusungula kua menji kua Bena Ebelu banayi ?
2. M'mushindu kayi udi kupita kua mu mateta kutuvuija batambe kuikala ne bukole, ne kutukanguila tshibi tshia tuetu kujadikila Buloba ?
3. M'malesona kayi akayila mukelenge Nebukadanesa akamufikishe ne ku dikudimuna diandi dia mutshima ?
4. N'dilesona kayi didi balombodi lelu mua kuyila bua butuku bua ndekelu bua Beleshasa ku Babulona ?
5. M'mushindu kayi udi muyiki wa kale wa Danyeleye mua kukolesha bantu ba Nzambi mu mikolo ku mpala kua tshinyangu ne kukengeshibua ?

**MAKELENGE ATSHILUALUA MASOKOLOLA**

« Yeye udi ukudimuna bikondo ne bidimu ; udi umusha bakelenge, udi ujadika bakelenge ; udi ufila menji, ne lungenyi kudi badi bamanye mua kujingulula malu » - *Danye 2 :21*

Bia kubala : - *Prophètes et Rois, Shapita 40*

« Bukole bua bisamba nansha bua bantu budi mu malu adi mua kumueneka, malu a dikasa dimpe adi muakumueneka kubavuija badi kabayi kutshimuna. Kabuena ni mu bukokeshi budibo baditumbisha nabu. Budi mu lulamatu ludi bisamba ebi ne bantu aba nalu mu kukumbaja kua bulongolodi bua Nzambi » - *Prophètes et Rois, p. 382*

**Dia kumudilu**

**12/04**

**1. TSHILOTA TSHIA DIKEMA**

**a. N'diyi kayi diakatuma mukelenge Nebukadanesa pakajukaye kutulu kunyima kua tshilota tshiakanyungisha menji andi ?** *Danye 2 :1-2*

.....

**b. M'mushindu wakandamuna bafidi ba mibelu mukelenge ku dilomba diandi diakadi kadiyi dia tshibidilu ?** *Danye 2 :3-7*

.....

« Mukelenge wakadi mumanye bua se, bu bobo mua kunguvuija tshilota, bakadi kumuambila kabidi tshiakadiye mulota. Mu kulongolola kuandi kua malu, Mukelenge wakadi mufila tshilota etshi kudi Nebukadanesa ne wakadi muenja nunku bua yeye kupua tshilota etshi moyo mu bisunsukila biatshi mu kumushila mu menji andi anu tshivulukidi tshia bowa, bionso ebi mu tshipatshila tshia kubulula patoke diditambisha dia bena menji ba mu Babulona » - *The Sanctified Life, p. 34*

**c. Nansha muakadi kuditambisha kuabo kuakadi kuakupetangana ne muaba udi nyuma misombela, muaba wa diamuamua, n'tshinyi tshiakitabuja bena menji aba ba mu Babulona ?** *Danye 2 :8-11*

.....

« Bûjibue tente ne bowa mu kuela kua menji bua bipeta bibi bia kupanga kukumbaja kuabo kua bualu bu balomba ku mfumu, bena majimbu kudienzeja bua kunvuija mukelenge bua se dilomba diandi kadiakadi dilabakane, ne kabatu banji kuela muntu diteta dikole nunku » - *Prophètes et Rois, p. 376*

## 2. DANYELE KUBUELA MU BUALU

a. **M'mushindu kayi wakenza mukelenge pakapangila bena menji bua kumutanduila tshilota tshiandi ne kufila diunvuija, ne m'mushindu kayi wakadisangana Danyele mu bualu ebu ?** *Danyele 2 :12-16*

.....

« Munkatshi mua bakadi tshilumbu tshia mukelenge tshiena pambidi, muakadi Danyele ne balunda bandi. Pakunvuabo ne bakadi ne tshia kufua, Danyele kuebeja mu mushindu wa budimu ne wa menji kudi Aliyoka, kapitene ka masalayi akadi alama mukelenge.

‘Bualu kayi mukenji wa mukelenge udi mukole nunku ?’ Aliyoka wakamanyisha Danyele muanda eu wa dipampakana dia mukelenge bua tshilota tshiandi tshia bualu bukole ne dipanga kunvuija tshilota etshi kudi aba bakadiye mutekemena. Mu munvua kua meyi â, Danyele kuya kudi mukelenge ne njiwu ya kujimija moyo wandi, kumusengelela bua yeye amulepeshile tshikondo bua Nzambi wandi amubuluile tshilota ne diunvuija diatshi. Mukelenge kuitabuja dilomba edi.

‘Danyele wakaya ku nsubu kuandi, wakamanyisha Hananiya, Mishaele ne Azaliya, balunda bandi, bualu ebu.’ Bonso buabo bakalomba lungenyi ne menji ku Mushimi wa munya ne wa dimanya. Bakadi ne dituishibua dia se bakadi muaba udi Nzambi mubateke bua bobo kuikala, ne kuenza mudimu wandi, ne kukumbaja nunku mudimu wabo. » - *Prophètes et Rois, p. 376-377*

b. **N'tshinyi tshitudi mua kuyila bua mushindu wakatendelela Danyele ne balunda bandi mu tshikondo etshi ?** *Danyele 2 :17-23*

.....

« Mu makenga ne mu njiwu, bakadi anu batangila kudi eu wakadi ubalombola, ne ubakuba, ne wakadi kudibo anu tshieyemenu. Mutshima musunsuke wa majiya, kusengelela kabidi Mulumbuishi wa Buloba bujima bua yeye kubapesha dipikudibua mu diba dia njiwu. Kabakatendelela bua patupu nansha. Nyuma wa Nzambi kulua kudibo, ne ‘mu tshikena kumona tshia butuku’, tshilota tshia mukelenge ‘ne diunvuija diatshi kubuludibua patoke kudi Danyele » - *Ibid, p. 377*

« Bena Ebelu aba banayi kabakalomba bua luse lunene lua Nzambi tshianana nansha. Danyele kusangisha balunda bandi ne kusakidila Nzambi bua wakunvua mitendelelu yabo ne kubandamuna. Kupeshabo Nzambi mulambu wa kumutumbisha ne kusakidila, wakitabujabo kudi Mutambe Bunene wa mu Diulu ne Buloba. [*Danyele 2 :20-22*] Danyele ne balunda bandi kuenzabo disangisha dia kutumbisha, ne bons oba mu Diulu kudisangisha nabo mu kusakidila eku » - *The Youth's Instructor, 22 Novembre 1894*

### 3. LUPINGU LUA PA BUALU

#### a. M'mushindu kayi wakakula Danyeleye kudi Nebukadanesa pakamuawilaye tshilota tshiandi ? *Danyeleye 2 :24-30*

« Mona mudi nsongalume wa bena Yuda, mupika, muikale ne lutulu, mutuishibue mu yeye, kumpala kua mukelenge wa bukole butambe pa buloba. Anu meyi andi a kumpala, yeye kuleja bua se ki meme, ne bua buneme buanyi, udi muikale mushimi wa menji onso ne lungenyi. Ku lubonko lua bowa lua mukelenge ne : ‘wewe udi muakungawila tshilota tshinakulota ne dijingulula diatshi anyi ?’ yeye kukudimuna mukelenge ne : ‘Bualu busokoka budi mukelenge muebeje m’bualu budi bena menji, bamanyi ba malu a mitoto, bena buloji ne batempi ba mbuku kabayi bamanye mua kumujinguluilabu. Kadi Nzambi udiku mu Diulu udi usokolola malu masokoka, ne yeye wakumanyisha mukelenge Nebukadanesa malu akadi pa kulua mu matuku atshidi ku mpala » - *Prophètes et Rois, p. 378*

« Nsongalume eu wa bena Yuda, mupika, kuimana kumpala kua mukelenge wa bukole bukole butambe diba mutudi kadiyi dianji kukenka. Nansha muakadiye ne biuma, bubanji ne butumbi, Nebukadanesa wakadi ne dikenga dinene dia mu kuela kua menji, kadi nsonga eu wakadi mu bupika wakadi ne lutulu ne disanka mu Nzambi.

Tshiakadi tshikondo mene mene kudi Danyeleye bua yeye kuditumbisha nkayandi, ne kuleja patoke budi buimpe buandi ne menji andi bikale bia pa mûlu. Kadi bualu buandi bua kumpala buakadi bua kuanji kubenga maneme onso bua bualu buandi ne kujula Nzambi ku yeye udi mushimi wa lungenyi ne menji » - *The Youth's Instructor, 1<sup>er</sup> Septembre 1903*

#### b. Unvuija lupingu luakamona mukelenge mu tshilota tshiandi. *Danyeleye 2 :31-33*

« Mu kuteleja ne ntema ya bungi bitupa bionso bisunsula, benda bamuambila, mukelenge kuvuluka tshiakadi tshimulubakaja, ne apu yeye kushala muindle bimpe mene mene diunvuija diatshi. » - *Ibid.*

« Mukelenge wa mu Diulu wakadi ne bua kusokoluela Nebukadanesa bualu bulelela bunene. Wakadi ne bua kumumanyisha bua se yeye wakadi ne bukokeshi bonso pa makelenge a mu Buloba ebu, bukokeshi bua kuteka bukole mu nkuasa wa bukole ne kubumbusha kabidi. Nebukadanesa wakadi ne buakutekibua kumpala kua majitu andi kudi Diulu, ne malu akadi ne bua kulua akadi ne bua kuikala mamusokoluela tô ne ku bikondo bia kunshikidilu » - *Prophètes et Rois, p. 379*

#### c. N'tshinyi tshiakafikila lupingu pakadi mukelenge mulutangile ? *Danyeleye 2 :34-35*

#### 4. DIUMVUIJA DIA TSHILOTA

##### a. Mutu wa Ngolo wakadi ne diunvuija kayi ? *Danye 2 :36-38*

.....

« Mu bukokeshi bua mukelenge Nebukadanesa, Babulona wakadi bukelenge buakadi ne bubanji bua bungi ne bukelenge butambe bukole bua pa Buloba. Mabanji abo ne buimpe biakadi biunvuija nanku nanku kudi Mifundu » - *The Youth's Instructor, 29 Septembre 1903*

##### b. M'makelenge kayi akadi malejibue mu binfuanyi bia biamua bidi bilonda ebi ? *Danye 2 :39-40*

.....

« Tshiprofe kuamba bua dimueneshibua ne didiunda dia makelenge manene : Babulona, Medaya-Pelasa, Gelika, ne Lomo » - *Prophètes et Rois, p. 407*

« Danye kuambila Nebukadanesa ne bukelenge buebe nebukuluke. Butumbi buabo ne bukole mu Buloba bua Nzambi nebukale ne diba diabi, pashishe bukelenge buibidi nebujuke, nebutete biabo tshikondo tshia momumue tshia diteta bua kuya kumona bua se nebutumbishe Mutambe Bunene wa mu Diulu anyi udi anu Umuepele, Nzambi Umuepele ne Mulelela. Bu bikalabu kabuyi buenza nunku, butumbi buabo nebutshishile ne bukelenge buisatu ne buangate muaba wabo. Buteta bua ditumikila anyi dipanga kutumikila, ebu kabidi nebujuke ; ne buinayi, bua bukole bu tshiamua tshifike, nebukokeshe bisamba bia pa Buloba. Malu â madianjile kuamba diambedi a kudi Udi kayi nshikidilu, adi mafundibue, malama, mu meyi a biprofe ne adi mikale aleja Muyuki wa kale, akafidibua bua kuleja ne Nzambi udi bukole budi bukokesha malu adi enzeka mu Buloba ebu. Udi ushintulula bikondo ne mivu, udi umbusha bakelenge mu nkuasa ne udi ujadika bakelenge mu nkuasa, anu bua kukumbaja bulongolodi buandi bua malu. » - *The Youth's Instructor, 29 Septembre 1903*

« Babulona kujimina bualu bua mu kudiunda kuandi, wakupua Nzambi moyo ne kufila butumbi bua kudiunda kuandi ku mudimu wa ku bianza bia bantu.

Bukelenge bua Medaya-Pelasa tshinji tshia kulua kudibo bualu bua mikenji ya Nzambi yakadi midiata ku makasa. Ditshina dia Nzambi kadiakadi ne muaba munda mua mitshima ya bantu. Tshikisu, moyo mubi, kupenda kua Nzambi ne malu mabi, m'biakadi bikokesha mu bukelenge ebu.

Buakalonda buakadi bubi bua patupu. Bobo kudinyanga bualu bua buakalekela lulamatu luabo kudi Nzambi. Mu kumupua moyo, bobo kutamba kunyanguka mu malu a bundu a mu nsombelu » - *Ibid, 22 Septembre 1903*

##### c. M'mushindu kayi wakadi makelenge akadi anu malejibue kudi makasa ne minu ? *Danye 2 :41-43*

.....

« Muaba wetu udi mulejibue ku bana ba nkasa mu lupingu lua Nebukadanesa ; makelenge â adi mapanduluke, m'mupanda nunku tshintu tshidi tshisenguluka, tshidi katshiyi mua kudisanga kaba kamue nansha. » - *Testimonies for the Church, vol. 1, p. 361*

## 5. BUKELENGE BUA NZAMBI BUDI BUSHALA KASHIDI

a. **M'bukelenge kayi buafikisha makokeshi ne makelenge onso a pa Buloba ku ndekelu wawu ?** *Danuele 2 :44-45*

« Tshilota tshia Nebukadanesa, tshiakamulejabo lupingu lunene, ne bulondangane bua malu tô ne ku nshikidilu kua bikondo, tshilota etshi tshiakafidibua kudiye bua yeye kunvua mudimu wakadiye ne bua kuenza mu muyuki wa kale wa Buloba, ne malanda akadi ne bua kuikala pankatshi pa bukelenge buandi ne Bukelenge bua mu Diulu. » - *Prophètes et Rois, p. 383*

b. **N'tshikondo kayi tshiabangisha bukokeshi bua butumbi bua Bukelenge bua Nzambi ?** *Yone 18 :36 ; Mataya 25 :31-34 ; 26 :64 ; Buakabuluibua 6 :15-17*

« Bukalenge buetu kabuena bukelenge bua pa Buloba ebu nansha. Tudi bindile bua Mukelenge wetu apueke pa Buloba bua kulua kukudimuna bukokeshi bonso ne bukole, ne kujadika Bukelenge bua tshiendelele ... tshiprofete tshidi tshituleja ne dituku dinene dia Nzambi didi diamba kufika. Didi dienda disemena ne lukasa » - *Testimonies for The Church, vol. 1, p. 360-361*

c. **Mukelenge wakenza tshinyi bua mushindu wakakumbana Danye le bua kusokolola tshilota tshiandi ?** *Danye le 2 :46-49*

« Diunvuija dia tshilota etshi kudi Danye le kuakenza bua se mukelenge aya kumupesha yeye ne balunda bandi buneme ne lumu ... Balunda basatu ba Danye le kubatekabo bafidi ba mibelu, balumbuluishi ne ba-ngovena munda mua ditunga. Bantu aba kabakadi bûjibue ne budisu nansha, kadi bakadi ne disanka dia kumona Nzambi bumuakadiye mumanyika muikala ku mutu kua bakalenge bons oba pa Buloba ne kabidi bukelenge buandi kutumbishibua ku mutu kua makelenge onso a pa Buloba » - *The Youth's Instructor, 8 Septembre 1903*

## Disambombo

17/04

Makonka a kuambulula dilesona

1. N'tshinyi tshiakajandula Nebukadanesa pa bidi bitangila bantu bandi bena menji ba kueyemena ?
2. Bua tshinyi bidi ne diunvuija bua mutendelelu wa tuasakidila wa Danye le m' muambibue, kadi kulomba kuandi kakuyi kuleja ?
3. Nansha muakadiye muntu wa lungenyi ne menji kutamba mu Babulona, ngikadilu kayi wakadi nandi Danye le ?
4. Unvuija ngikadilu yakadi nayi makelenge malejibue mu biamua bishilangane
5. N'tshikondo kayi tshiaya kukumbana tshitupa tshia tshilota tshidi tshiamba bua dibue ?

**TSHIKENA KUMONA TSHIA KUMUDILU TSHIA DANYELE**

« Nakamona lusengu alu luluangana ne bansantu, lubapita bukole, tô ne pakalua Wa Kale Wa Matulu abungi. Mu tshilumbuluidi yeye wakabingisha bansantu ba Mutambe Bunene wa mu Diulu pakalua tshikondo tshia bansantu kudiabo bukelenge » - *Danye 7 :21-22*

Bia kubala : *La Tragédie des Siècles, Shapita 28 ; Premiers Ecrits, p. 54-55*

« Bu mutudi tuenda tusemena ku nshikidilu kua bintu bionso biprofete bia Danyeledi bidi bilomba bua kubipesha ntema ya pa buayi, bualu bidi bituambila bua tshikondo mene tshitudi bikale ne moyo. » - *Prophètes et Rois, p. 416-417*

**Dia kumudilu**

**19/04**

**1. MPEPELE INAYI, NYAMA INAYI**

**a. N'tshikondo kayi tshiakapeta Danyeledi tshilota tshiandi tshia kumudilu tshia tshiprofete ne wakenza tshinyi ?** *Danye 7 :1, 15-16a*

.....  
« Tshitupa tshipi tshiambadi ne dikuluka dia Babulona, pakadi Danyeledi welangana menji bua biprofete ebi ne usengelela Nzambi bua yeye kumupesha butoke, yeye kupeta ndambu wa bikena kumona biakadi biamba bua bunene ne diupuka bia makelenge a pa Buloba. Tshikena kumona tshia kumpala mu bikena kumona ebi tshidi tshiamba mu Shapita wa muanda mutekete wa mukanda wandi, bobo kumupesha diunvuija diatshi, ne nansha nunku bionso kabiakadi bitoke kudiye nansha » - *Prophètes et Rois, p. 421*

**b. Bintu ebi bia mu bufuki biakamonaye biakadi bileja tshinyi ?** *Danye 7 :2 ; Buakabuluibua 17 :15 ; Yelemiya 25 :31-33*

.....  
**c. N'diunvuija kayi diakafila muanjelo pa bidi bitangila Nyama minene inayi yakapatuka ?** *Danye 7 :3, 16b, 17*

.....  
« Makalenga manene akakokeshwa Buloba, akamukeneka ku mesu kua muprofete Danyeledi mu tshinfuanyi tshia nyama idi ikeba tshia kudia » - *La Tragédie des Siècles, p. 476*

## 2. DILONDANGANA DIA MAKELENGE

### a. Nyama kayi wa kumpala mu nyama inayi ne wakadi uleja bukelenge kayi ?

*Danyeleye 7 :4 ; Yelemya 50 :17 ; Habakuka 1 :6-8*

.....

« Babulona kakakumbaja bulongolodi bua malu bua Nzambi ne mapangadika andi. Pakakumbana diba diandi, bukelenge ebu bua bukole ne budisu, bulombola kudi bantu bakadi ne menji ne lungenyi bia pa mûlu, kutshibudibua, kuvuijibuabo kabuyi ne bukole. Kilisto udi muamba ne : ‘Kanuyi nanyi kanuena bamanye mua kuenza bualu’. Bamfumu ba Mbulamatadi ba lumu ba bena Babulona kabakadi babala Nzambi bu udi wa kueyemenyibua nansha. Bakadi bamona ne, m’bobo badi benza bunene ne lumu biabo. Kadi pakabulula Nzambi mukana, bakavuijibua bu mudi tshisona tshidi tshiume ne tshilongo tshidi tshifubidila. Amu Diyi dia Nzambi ne disua diandi m’bidi bishala tshiendelele. » - *The Youth’s Instructor, 29 Septembre 1903*

### b. M’mushindu kayi udi nyama muibidi munvuija ne udi uleja bukelenge kayi ? *Danyeleye 7 :5*

.....

« Bisamba bionso bia pa Buloba kupeta mudimu wabi ne tshikondo tshia kukumbaja bulongolodi bua malu bua Muena ‘Tshitabela, Mukubi’ ne Wa-Tshijila. » Tshiprofete kuamba bua bunene ne dikuluka dia makelenge manene a pa Buloba – Babulona, Bena Medai ne Pelesa, Gelika, Lomo. Bua yonso wa makelenge, nansha bisamba biakadi kabiye ne bukole bua bungi muyuki wa kale udi wakambuludibua. Bonso bua makelenge â kupeta tshikondo tshia diteta, bonso buabo kupanga diteta ; butumbi buabo kujimina ne kupeta, bukole buabo kujimina, ne bukuabo bukelenge kuangata miaba yabo, ne kubapingana. Pakadi bisamba bia bantu bibenga mikenji ya Nzambi ne biakadi nunku biya ku dibutuka diabi, biakadi bitoka bua bulongolodi bua Nzambi bua malu kukumbana munkatshi mua dinyungakana diawu. » - *Education, p.203*

### c. M’malu kayi a pa buawu akadi a nyama muisatu udi uleja bukelenge bua bena Gelika ? *Danyeleye, 7 :6*

.....

« Bu makelenge â mashilangane akadi kuikala ne ditshina dia Mukelenge ku mesu abo, akadi kupeta lungenyi menji ne bukole, biakadi ne bua kubasangisha kaba kamue ne wowu kushala malame bukole buawu. Kadi balombodi ba makelenge a pa Buloba kabakadi bakeba bukole bua kudi Nzambi tshikondo tshiakadibo ne lutatu ne kupampakana ... Bakadi benzejibue bua kulomba kudi aba bakadi menji abo makenkesha kudi munya wa mu Diulu bua kubunvuila malu masokoka akadibo bobo kabayi mua kunvua » - *The Youth’s Instructor, 29 Septembre 1903*

### 3. LOMO, BUKELENGE BUINAYI

a. N'tshinyi tshiakenza bua bikale bualu bukole bua kumvuija bimpe mene mene nyama muinayi ? *Danye 7 :7*

.....

« Nyuma Muimpe udi uleja makelenge a pa Buloba mu tshimuenekelu tshia nyama ya lonji, kadi Kilisto udi muikale 'Muana wa Mukoko wa Nzambi, udi umusha bubi bua ba pa Buloba' (*Yone 1 :29*). Kakasua kukokeshu bantu mu kubenzeja nansha. » - *Les Paraboles, p. 60*

« Mutshi mutshiamakane, tshinyangu bia kudi bena Lomo, biakadi tshiamua tshia lufu tshia tshikisu kutamba tshinyangu ; bantu babi, bivi ne bashipiangananyi banene, bakadi benzejibue bua kuambula mutshi mutshiamakane ne kuya nawu tô ne muaba wa tshishipelu, bakadi badienzeja, badikuma eku ne kuaka, kabayi ne ditekemena pakadibo basua kubateka mutshi mutshiamakane pa makaya abo, kadi bakadi anu babatshintshimika ne dibenzeja bua bobo kuambula mutshi wa tshinyangu » - *Jésus Christ, p. 413*

b. N'tshinyi tshiakamonabo munkatshi mua nsengu ya nyama muinayi ? *Danye 7 :8*

.....

« Mu siècle muisambombo, bukelenge bua Papa buakashindama bikole mene mene. Muaba wa nkuasa wandi wa bukelenge wakadi mu tshimenga tshia bukelenge, ne mukulu mutangidi wa Lomo wakadi mumanye nunku kudi bena Kilisto bonso. Dipanga kumanya Nzambi ne malu a majimbu, kushila bukelenge bua Papa muaba. Dragon kupesha nyama wa lonji bukole buvua buandi, nkuasa wandi wa butumbi, ne kukokeshi buandi bunene'. Ke tshikondo mene tshiakabangisha bidimu tshinunu ne nkama ibidi ne makumi asambombo bua kukokeshu kua Pape, bidi biamba kudi biprofete bia Danye ne bia Buakabuluibua. Kutekabo bena Kilisto kumpala kua disungula anyi dilekela dia mikenji ya kulonda yakadi yabo ne kuitabuja bibilu ne bulongolodi bua malu ne ntendelelu bia kudi Pape, kabayi benza nunku, bakadi kupitshibua moyo wabo mu nzubu wa lukanu, anyi kushipibua ku ndundu, ku kapia anyi kukoshibua mitu ne muele wa mvita. Apu tshiprofete etshi kukumbana tshia Musungidi : 'Nebanutungile tshitungu kudi baledi benu mene ne bana benu ne ba tshiota tshienu ne balunda benu ; nebashipe bakuabo benu ; bantu bonso nebukale n'enu lukuna bua dina dianyi.' Tshinyangu netshimueneke ne tshinji tshikole bua bena lulamatu, ne Buloba kulua tshipapu tshinene tshia mvita. Munkatshi mua bidimu nkama, Ekelezia wa Kilisto wakikala ne moyo mu kusokoma ne mu muidima. Bualu buandi budi bunvuija nunku kudi muprofete : 'Ne mukaji wakanyema mu tshipela, mudiye ne muaba mumulongoluela kudi Nzambi, bua kumudishaboku matuku tshinunu ne nkama ibidi ne makumi asambombo' - *Buakabuluibua 12 :6 - Tragédie des Siècles, p. 54-55*

c. Danye wakajinga kumanya tshinyi kunyima kua yeye mumane kupeta tshikena kumona ? *Danye 7 :19-20*

.....

#### 4. KA-LUSENGU KAKESE

##### a. Muanjelo wakunvuija tshinyi pa bidi bitangila nyama muinayi udi ukuatshisha bowa, udi mene tshimuenekelu tshia bukelenge bua bena Lomo ?

*Danye 7 :23*

.....

##### b. N'tshinyi tshiakambibua bua ka lusengu kakese ? *Danye 7 :24*

.....

« Bukelenge bualabale bua bena Lomo kûpuka panshi, ne mu tshibundu tshia kabutu kandi, bukole ebud budi bukuatshisha bowa kujuka, Ekelenge Catholique kâ bena Lomo. Ekelezia eu udi uditumbisha bua kuenza kuandi kua malu kayi utupakana ne bua bupianyi buandi bua malu a mu ntendelelu. Kadi ntendelelu eu udi ukuatshisha bowa bonso badi bamanye malu masokoka a bubu. Bayishi, bakuidi ba Ekelezia eu badi anu bimane pa buenzeji buabo mu kulama bantu mu dipanga kumanya dia disua dia Nzambi, bu mudidi dibulula patoke mu Mifundu » - *The Youth's Instructor, 22 Septembre 1903*

##### c. Tshinji tshia ka lusengu kakese tshiakadi ne bua kuikala bua banganyi ?

*Danye 7 :21,25*

.....

« Dimueneka dia bukokeshi bua Ekelezia wa ku Lomo kujadika mbangilu wa Moyen Age. Bu muakadi bukole buandi buenda budiunda, midima yakadi yenda ivula. Pape muangata muaba wa Yezu Kilisto, udi muikale nshindamenu mulelela, yeye kulua udi tshiena bualu tshia ditabuja. Pa mutu pa kuambila Muana wa Nzambi bua kupeta difuidibua luse ku mibi mienza ne kupeta lupandu lua tshiendelele, bantu kutekemena Pape, kutekemena kudi bakelenge Abbés, bakadiye mupeshe bukenji bua bukokeshi buandi. Bakadi bayisha bantu ne Papa udi mutuangaji wa bantu ne Nzambi pa Buloba, kakuakadi muntu mua kusemena kudi Nzambi kayi muanji kupitshila kudiye, bakadi bakumbaja ditumikila dibubika dia kumutumikila, bualu pa buloba yeye wakadi muaba wa Nzambi. Tshilema tshikese tshienzeja malu andi a disua diandi, tshiakadi tshikoka manyoka makole bua mubidi ne musuka. Bakadi bumusha nunku menji ne ntema kudi Nzambi, bua kubituma kudi bantu badi bapanga ne bena tshikisu, ngamba tshinyi ? pa mukelenge wa midima udi wenza malu mu midima. Bubi kudisokoka mu tshijila. Ne kutumbisha kua mikenji ne bilele bia bantu, dinyanguka dia bilele biakane bia mu nsombelu kumueneka, kuenzeja dilekela dia mikenji ya Nzambi.

Padi Mifundu mikupula, kayiyiku ne muntu muditeka pa muaba wa Nzambi, mushindu eu wa kuenza dishima diakadi anu ne bua kuikalaku, kupepeja kua Nzambi ne dishawuka dia malu mu nsombelu.

Ekelezia wa Kilisto wakikala ne moyo mu matuku a njiwu. Bena Kilisto ba lulamatu kabakadi ba bungu. Bulelela kabuakashala kabuyi ne babujadiki, kadi kuakadi bikondo biakadi tshilema ne tshitatabata biya kumueneka bibuikile ntendelelu mulelela. Lumu Luimpe kujimina m'muenenu walu, apu mpakadi bibilu ne bulongolodi bua malu a ntendelelu, kuvulangana ne bantu kusuba » - *La Tragédie des Siècles, p. 55-56*

## 5. TSHILUMBULUIDI

### a. N'tshinyi tshiakadi ne bua kulua bua kufikisha ku nshikidilu bukokeshi bua ka lusengu kakese ? *Danye 7 :26*

« Ngondo makumi anayi ne ibidi ya mu [*Buakabuluibua 13 :5*] kayena mitapuluke ne lupolo lua 'tshikondo, ne bikondo, ne tshitupa tshia pankatshi pa tshikondo'

- Bidimu bisatu ne tshitupa anyi matuku tshinunu ne nkama ibidi ne makumi asambombo – bia Danye, n'tshikondo mene tshidi bukelenge bua Pape ne bua kukenyasha bantu ba Nzambi ... Tshikondo etshi kutuadija ne bumfumu bua Pape mu tshidimu tshia 538 tshia tshikondo tshietu etshi ne kujika mu tshidimu tshia 1798. M'pakakuatabo Pape kudi masalayi a bena France ne kumuera mu nzubu wa lukanu, ne bukelenge bua Pape kupeta 'mputa wa lufu'. Nunku tshiprofete etshi tshiotshi kukumbana : 'Bikala muntu ubueja bakuabo mu bupika, uyaya mu bupika'. – *La Tragédie des Siècles*, p. 476

### b. M'mushindu kayi udi tshilumbuluidi tshiunvuija ? *Danye 7 :9-10, 13*

« 'Dilua edi dia Mukelenge, kadiena kulua kuandi kua tshiakadi pa Buloba nansha. Udi usemena pepi ne Wa-Kale bua kuangata kudiye bukokeshi, butumbi ne bukelenge, bialuabo kumujadika nabi ku nshikidilu kua mudimu wandi wa mutuangaji » - *Ibid*, p. 522

### c. Tshipeta tshia tshilumbuluidi tshiakadi ne bua kuikala tshinyi ? *Danye 7 :11,14,18,22,26-27*

« Tshifufu tshia bupikudi tshiakadi ne bua kuikala ne tshipeta tshia kupingaja kua buloba buetu mu buimpe ne dikubibua dia Nzambi. Bionso biakadi binyanga kudi bubi, bidi bilengejilula. Muntu udi upikudibua, ne yeye ne dibulunga dietu, didi dilua muaba wa kushikama wa tshiendelele wa basungula. Nsatana nealuangane mvita patupu bidimu binunu bisambombo bua kulama Buloba mu bukokeshi buandi. Tshipatshila tshia Nzambi netshikumbane. 'Ba-nsntu ba Mutambe Bunene wa mu Diulu nebangate bukelenge, nebuikale kudibo tshiendelele, lapalapa' (*Danye 7 :18*). » - *Patriarches et Prophètes*, p. 316

## Disambombo

24/04

Makonka a kuambulula dilesona

1. Unvuija nyama inayi yakamona Danye ijuka mu mayi.
2. Tela mena a makelenge akadi malejibue mu nyama, ne m'mushindu kayi udi ngikadilu yawu kayiyi mikale mitangununa bua kujadika
3. Ka lusengu kakese kakenza tshinyi ? Koko kakadi bukole bushilangane makole makuabo anyi ?
4. Meyi â a « diambu » akakula ka lusengu kakese akadi meyi kayi ?
5. Tshilumbuluidi netshipeshe nganyi bukokeshi bua Buloba, ne bualu ebu nebuenzeke tshikondo kayi ?

## MULAMBU WA PA BUAWU BUA MISHONYI MU BULOBA BUJIMA

Tshikondo tshia mpungilu wa 24 wa Conférence Générale, ngumu ya bungi ya Mishonyi mipia mipia yakafidibua. Tuetu kusanka bikole bua diya kumpala dia bualu bulelela bua Tshikondo, ne tudi bindile ne bua kunzulula ne kulongolola mikuabo ya bungi bu eyi, bualu bua buloba bujima budi ne tshia kukenkeshibua ne butumbi bua Nzambi.



Kudi mishindu ya bungi ya kukuatshishangana mu mudimu eu mutambe buimpe wa lupandu lua misuka mu miaba mipia mipia. « Bualu bua muntu yonso wantendekena dina dia Mukelenge neasungidibue. Munyi muamutendekenabo kabayi banze kumuitabuja ? Munyi mua muitabujabo kabayi banze kunvua lumu luandi ? Munyi munvuabo lumu luandi kabayi ne muambi ? Munyi muabambilabo kabayi batumibue ? *Lomo 10 :13-15a*. Bena mudimu ne badi bafila biuma bua mudimu bonso badi benza mudimu eu mu kudifila kushilangane bua kusungila mikoko mijimine.

« Bu bikala ba membres bons oba Ekelezia wetu bakadi kuikala bamanya bua muakadibi bualu bukole, mu matuku mashala bua kuenza mudimu miaba ikadi lelu eu milue nsangilu ya mushinga, bakadi kuya kunvua bua se bidi bikengela kuikala ne dikima bua kuimana kumpala kua malu adi kâyi mempe ne kuamba ne bianza bijula mûlu ne : ‘katua kuya kupanga ne kuteketa mu mikolo nansha’. Badi kabayi bakangula njila mu miaba mipia mipia ne idi mikole ya ntatu, kabena bajadika bua ntatu ya mudimu mukole muenza kudi mudianjidi. Bubikalabi mua kunvua mushindu udi Nzambi wenza mudimu, kabakuya kusanka anu bua tshiakenjibua, kadi nebaye kumona kabidi kabingila kakusanka bua muikale mudimu mu matuku alualua.

Bana betu, kakuena kabingila nansha kamue kakuteketa mu mikolo. Luteta luakane ludi lukuna. Nzambi neikale ne tshitabela bua bualu bua luteta elu, nealutolokeshu ne nelukuame mamuma a mavule. Nuvuluke bua se tshibungi tshia midimu mianza bua kusungila misuka tshitu ne mbangilu, midimu eyi kuenda bimpe mene nansha munkatshi mua ntatu minene. » - *Testimonies for the Church, vol. 7, p. 242*

« Dollar yonso, lufualanga lonso bitudi nabi bidi bia Mukelenge. Pa mutu pa kutula makuta etu ku malu a patupu, tudi ne tshia kuafila ku lubila lutuela bua mudimu wa buambi.

Bu mudi bipapu bipia bipia bienda biunzuluka, badi anu batuela misangu yonso lubila bua kufila biuma » - *Conseils à l'Econome, p. 304*

Ke bua tshinyi mulambu wa pa buawu wa dituku edi neusangishibue bua Mishonyi idi mu Buloba bujima ; m'mushindu udiku udi ukengedibua lelu eu mene mene. Mukelenge asankishe yonso udi ufila bua afile ne disanka mu kudilekelela ne ditabuja. Nzambi afute yonso udi wenza nunku.

Bana benu bak u Conférence Générale.

**DILONDANGANA DIA MAKELENGE**

« Tshikena kumona tshiakukuambilabo bua dilolo ne dinda tshidi tshia bushuwa, kadi wewe sokoka tshikenakumona etshi, bualu bua tshidi tshileja malu a matuku abungi atshilualua » - *Danyeleye 8 :26*

Bia kubala : *La Tragédie des Siècles, Shapita 24*

« Ditunga dionso diakapeta kupeta tshikondo tshiatshi tshia diteta, bonso kupangila mudimu wabo, kumona butumbi buabo muakadibo bujika ne bukole buabo bujimina ». – *Prophètes et Rois, p. 407*

**Dia kumudilu**

**26/04**

**1. TSHIMPANGA TSHILUA TSHIA BUKOLE**

**a. N’tshinyi tshiakamona Danyeleye pepi ne nshikidilu wa bukokeshi bua bena Babulona ?** *Danyeleye 8 :1-2*

.....

**b. Unvuija ngikadidlu wa nyama wa kumudilu mu kubuela kuandi mu tshialu ne nganyi wakalua ne bukole.** *Danyeleye 8 :3-4*

.....

**c. Bilondeshile meyi a muanjelo, Tshimpanga tshiakamona Danyeleye tshiakadi tshileja nganyi ?** *Danyeleye 8 :19-20*

.....

« Mu tshikena kumona tshia muprofete, tudi tutangila mushindu udi Nzambi upula panshi mukelenge wa Buloba ne ujadika mukuabo. Udi udimuenesha bua se n’nyeye udi mukokeshi wa Buloba bujima, pepi ne yeye kujadika bukelenge buandi bua tshiendelele, Wakale Wa matuku abungi, Nzambi udi ne moyo, Mushimi wa lungenyi lonso ne menji, Mukelenge wa malu adiku lelu, udi ubulula patoke malu atshidi ku mpala. » - *The SDA Bible Commentary, vol. 4, p. 1166*

« Bunene ne dikuluka dia bisamba, bu mudibi batunvuijebi mu mukanda wa *Danyeleye* ne wa *Buakabuluibua*, bidi ne tshia kutuyisha bua kunvua bua se butumbi bua pa Buloba budi bua patupu. Babulona, mu butumbi buandi bonso ne bukole buandi buakadi kabuyi kufuanyikija ne buakadi kushala tshiendelele. Kadi lelu eu budi penyi ? Kupitabo bu mudi ‘tshilongo tshia mu tshisuku’ (*Yakobo 1 :10*).

Makelenge akamulonda kunyima akadi, Bena Madai ne Bena Pelasa, Bena Gelika ne Bena Lomo, wowu biawu kujimina anu mu mushindu wa momumue. Ne nunku ke mushindu wajimina bionso bidi kabiyi ne Nzambi bu Nshindamenu wabi » - *Prophètes et Rois, p. 417*

## 2. MPUMBU WA MBUJI WA BUKOLE BUA BUNGI

a. **M’bukole kayi buakela bukelenge bua Bena Madai ne Bena Pelasa mpata ?**  
*Danye 8 :5,21*

.....

b. **Unvuija bukole butshimunyi bua mukelenge wa bukelenge ebu bupia bupia.**  
*Danye 8 :6-7*

.....

« Bukokeshi bonso pa Buloba budi nabu mfumu yonso wa ditunga m’bumupesha kudi Nzambi ; mushindu udiye wenza mudimu ne bukokeshi ebu, n’ngudi mua kumututshisha dikasa dimpe. Kudi yonso Muena tshitabela wa mu Diulu udi wamba ne : ‘Nenkusuika mukaba, wewe kuyi muanze kumunanga nansha’ (*Yeshaya 45 :5*). Ku bonso meyi akambilabo kale Nebukadanesa adi mikale dilesona dia moyo : ‘Lekela malu mabi ebe ku buakane ne ku bilema biebe luse kudi bakengi, ne ditalala ne ditungunuke’ (*Danye 4 :24*).

Kunvua kua bualu ebu, n’kunvua ne ‘buakane budi butuma tshisamba tshia bantu kumpala’ (*Nsumuini 16 :12*), ne udi mutua mpanda kudi moyo muimpe (*Kutangila Nsumuini 20 :28*) ; kujadika ne mikenji eyi idi mudimu wa dimueneshibua dia patoke dia bukole bua eu udi ‘umusha bakalenge, udi ujadika bakalenge’ (*Danye 2 :21*). N’kunvua dimanya dia ngelelu wa menji dia muyuki wa kale.

Anu Diyi dia Nzambi nkayadi n’didi dimanye kuteka bionso ebi patoke. Didi dituleja ne bukole bua bisamba, bua bantu, kabuena busombela mu bikondo, mu kupepela kua malu kudi kumueneka kakuyi mushindu wa kubatshimuna, nansha mu mushindu wabo udi muenda lumu. Bukole budi bubadibue ku lulamatu ludibo nalu mu kukumbaja malu malongolola a Nzambi. » - *Education, p. 200-201*

c. **N’tshinyi tshiakafikila bukelenge bua Bena Gelika pakafikabo mene mene mu kudiunda kuabo mu bukokeshi bua Alexandre le Grand ?** *Danye 8, 8, 22*

.....

« Mufundu udi wamba ne : ‘Udi kayi ukuata tshinji lubilu udi upita muena bukutu buimpe, udi ukokeshi moyo wandi udi upita munyengi wa musoko kutumba’ (*Nsumuini 16 :32*). Mulume anyi mukaji udi ulama mu kusekenkeja kua menji andi, padiye uteyibua bua kufika munda, udi ne mushinga wa bungi ku mesu kua Nzambi ne kua banjelo ba mu Diulu kutamba Munene wa masalayi udi ulombola tshiluilu mu kutshimuna kua mvita. Mukelenge muenda lumu mu bulalu buandi bua lufu, kuamba ne : ‘ Mu kutshimuna kuanyi konso, butshimunyi bumue tshianana budi bumpesha lelu dikoleshibua dia ku moyo : butshimunyi bunakapeta kudi ngikadilu wanyi meme nkayanyi wa bukole’. Alexandre le Grand ne César bakaya kumona bua se biakadi bipapele bua kukokeshi buloba pa mutu pa bobo kudikokeshi bobo nkayabo. Kunyima kua yeye mumane kukokeshi tshisamba, ne tshisamba, etshi kupeta lutatu lua ‘dipanga kudikanda, tshikuabo bupale bua kulumba kua malu’ ». – *Elever l’Enfant, p. 99*

### 3. BUKOLE « BUAKADIUNDA BIKOLE »

a. **M’bukole kayi bupia bupia budi bunvuija ne m’buangata muaba wa bukelenge bua bena Gelika butapuluke ? Danyele 8 :9, 23**

.....

b. **Unvuija bienzedi bia Lomo biakamona Danyele mu tshikena kumona, bia Lomo wakadi kayi mumanye Nzambi ne bia Lomo wa mu bukokeshi bua Pape. Danyele 8:10- 12, 24**

.....

« Bukelenge bua Pape buakalua bukelenge bua tshikisu, bua tshinyangu mu Buloba bujima. Bakalenge ne bamfumu bakaedi bakokele ku meyi ne mikandu ya Pape. Nshikidilu wa bantu bua tshikondo ne bua tshiendelele wakadi umueneka muikale mu bianza biandi ... kadi Munda munya mua bukelenge bua Pape kusambakena ne munda nkulu mua bukua bantu’. Munkatshi mua bidimu, matunga a Europe kākaya kumpala mu dimanya dia malu, mu nsombelu ne mu dishidimuka dia menji. Buena Kilisto bunkadi butekete mu malu a ngelelu wa menji ne bua mu nsombelu ne mu dishidimuka dia menji. Buena Kilisto buakadi butekete mu malu a ngelelu wa menji bua mu nsombelu.’ – *La Tragédie des Siècles*, p. 60-61

« Bilondeshile tshiprofe, bukole bua Pape buakadi bupuila bulelela panshi. Mikenji ya Nzambi yakadi miyata ku makasa ne bilelela ne malu a bantu biakadi biangata muaba wayi. Ekelezia yakadi mitabuje bukokeshi bua Pape anu ne lukasa yakadi mienzejibue bua yoyi kunemeka Dituku dia mpatukila wa lumingu, Dimanche. Bunyungulula kudi tshilema ne tshitataba, bana ba bungi ba Nzambi bakatamba kuyumbakejibua, nansha muakadibo banemeka Nsabatu, kabakadi kabidi benza mudimu mu dituku dia Dimanche. Kadi nansha nanku kabiakadi bianji kusankisha Pape nansha ; wakadi ulomba kabidi bua kuvuija Dimanche dituku dia tshijila, kadi dituku dia Samedi kadikadi dinemeka, ne wakadi wakula ne meyi a kufunda nawu ne kusonguela makole a tshikisu, aba bakadi bapima bua kunemeka dituku dia Samedi. Anu mu kunyema kua bukokeshi bua Pape ki mushindu wakadi ukumbana bua kutumikila mikenji ya Nzambi. » - *Ibid*, p. 67

c. **Nansha muakadi mushindu wandi wa kuenza malu muikale wa budimu, m’mushindu kayi wakafika bukelenge ebu ku ndekelu ? Danyele 8 :25**

.....

« Midima yakadi ikokeshu buloba munkatshi mua tshikondo tshile tshia bukokeshi bua Pape kayakakumbana bua yoyi kujima mene mene tshimanyi tshia kapia tshia bulelela. Kuakadi anu bena kuitabuja balelela bakadi balamate ku ditabuja mu Yezu Kilisto, Mutuangaji umuepele udi pankatshi pa Nzambi ne bantu, bakadi ne Mifundu ya tshijila bu bualu buabo bumuepele bua kulonda bua moyo ne bakadi bajidila dituku dilelela dia dikisha. Kakuakadi mushindu wakumanya tshiakadi buloba bulongoluela bantu aba. Bakadi bafunda bu batontolodi, bena bijanu, bipatshila biabo biakadi bisonguela, mifundu yabo yakadi misendeka, bakadi bakoshibue bimue bidimba bia mubidi, bakadi bakandika, bakashala kabayi batshikishibua ne balama anu buakane bua ditabuja bua bobo kubumanyisha mu nkama ne nkama ya bidimu, bupiany bua tshijila kudi ndelanganyi » - *Ibid*, p. 63

#### 4. MATUKU 2300

a. **M'muyuki kayi wa kunvua Danyele pa bidi bitangila tshikondo tshia malu adi munvuija mu tshikena kumona, ne n'tshinyi tshienzeka ku nshikidilu kua tshikondo etshi ?** *Danyele 8 :13-14*

.....

b. **M'bualu kayi buakadi ne bua kukumbana bulelela buakadi mu tshimuenekelu tshia dilengejibua tshia tshitendelelu, bu mudibo bulejibue mu mikenji ya tshitendelelu ne buamba mu tshikena kumona tshia Danyele ?** *Lewitiki 23 :27-32 ; 16 :33-34*

.....

« Mu bulongolodi bua malu bua Mose, buakadi mundidimbi, tshinfuanyi tshia mulambu ne tshia buakuidi bua Yezu Kilisto, dilengejibua dia tshitendelelu diakadi mudimu wa ndekelu wakadi wenjibua kudi Muakuidi Mutambe bunene mu bulondangane bua midimu yakadi yenzeka munkatshi mua tshidimu. Wakadi mudimu wa ndekelu wa dilengeja dia bubi : diumbusha dia mibi ya Isalele. Mudimu eu wakadi uleja tshienzedi tshia ndekelu tshia mudimu wa Muakuidi Wetu Munene mu Diulu, apu mpadiye uya kumbusha ne kukupula mibi ya bantu bandi idi mifunda mu mikanda ya mu Diulu » - *La Tragédie des Siècles, p. 381*

« Bidi bia momumue kale mibi ya bantu yakadi miedibue mu nyama wakadi kayi muenza bualu, nyama wakadiku bua bubi, ne ku mashi a nyama eu, akadi matuala mu tshitendelelu tshia pa Buloba mu tshinfuanyi, nunku, mu tshipungidi tshipia tshipia, mibi ya badi banyingalala bua bubi idi mibueja mu ditabuja mu Musundigi, ne m'mu tshitendelelu tshia mu Diulu. Ne mu mushindu wa momumue wakadi tshitendelelu tshia pa Buloba ne buakuikala tshiumbusha bubi munda muatshi mu tshinfuanyi, kulengejibua mu kumbusha kua mibi yakadi mitshinyange, bidi nunku bikengedibua bua tshitendelelu tshia mu Diulu tshilengejibue mu bulelela mu kumbusha, ne kukupula mibi idi mifundamu. Kadi bualu ebu budi mua kukumbana anu bikala mikanda ya mu Diulu mianji kuikala mitangulula diambedi, bua kujadika ne m'banganyi bafue mu ditabuja mu Yezu, badi bena diese dia dilengejibua diandi. Dilengeja dia tshitendelelu didi dienzeka ne dikonkoloja dia tshilumbu. Biabi dikonkoloja edi didi ne bua kuenzeka kumpala kua dilua dia Mukelenge, bualu bua udi ulua 'bua kupingashila kudi muntu ne muntu bu mudi mudimu wandi' (*Buakabuluibua 22 :12*). » - *Ibid, p. 456-457*

c. **Muanjelo udi wamba tshinyi bua tshiprofete tshia matuku 2300 ?** *Danyele 8 :26* (Kufuanyikija ne Nvesa 14).

.....

## 5. TSHIKENA KUMONA TSHIUNVUA MU TSHITUPA

### a. Muanjelo Gabriel wakadi ne mudimu kayi kudi Danyelee ? *Danyelee 8 :15-18*

.....

« M'muanjelo Gabriel, udi mu muaba wa kumudilu pepi ne Muana wa Nzambi, n'nyeye wakatuadila Danyelee lumu lua kudi Nzambi. N'nyeye mene kabidi udi, 'muanjelo wandi', wakadi Kilisto mutuma kudi Yone, munangibue bua yeye kumusokoluela malu adi kumpala ne disanka didi dilaya kudi aba badi babala ne bateleja meyi a tshiprofete bua bobo kulama bidi bifundamu. (*Buakabuluibua 1 :3*) » - *Jésus Christ, p. 216*

### b. Nansha mudiku diunvuija disunsula mu bitupa bikuabo bia bungi, Danyelee wakenza munyi kunyima kua yeye munvua mudi tshiprofete tshia matuku 2300 ? *Danyelee 8 :27*

.....

« Tshikena kumona tshikuabo kumunvuija tshiakadi ne bua kuenzeka. Ndikelu wa etshi, yeye kunvua ne 'mukuabo wa tshijila wakakonka kabidi wakula diambedi ne : tshikena kumona netshikaleku musangu bule munyi?' (*Danyelee 8 :13*) Ne bakamuandamuna ne : 'matuku, dinda ne dilolo, binunu bibidi ne nkama isatu, pashishe nebalengeje tshitendelelu' (*Danyelee 8 :14*), muprofete wakadisangana ne kupampakana kua bungi. Wakadienzeja bua yeye kunvua luidi lua tshikena kumona etshi, kadi, kakadi mua kunvua dipetangana diakadiku pankatshi pa bidimu makumi muanda mutekete bua bupika biakadi biamba kudi Yelemiya ne bidimu binunu bibidi ne nkama isatu, dilolo ne dinda biakadi ne bua kujika kumpala kua dilengejibua dia tshitendelelu. Muanjelo Gabriel kumupesha diunvuija tshitupa ; kadi pakamba muanjelo meyi â : 'Tshikena kumona ... tshidi tshileja malu a matuku a bungi atshidi alua', muprofete kufua tshipuka. 'Meme, Danyelee, nakapungila, nakadi ne disama matuku makuabo, Pashishe, nakajuka, nakakuatshila mukelenge mudimu wandi. Nakalubakana kabidi bua tshikena kumona etshi, bualu bua tshiakatshijingulula' (*Nvesa 26-27*). » - *Prophètes et Rois, p. 421*

## Disambombo

01/05

Makonka a kuambulula dilesona

1. M'malu kayi atu atamba kusaka bua kupeta kua mamfumu a pa Buloba ?
2. N'tshilema kayi tshia mu ngikadilu tshidi katshiyi tshilongolola tshidi tshifikisha ku dikuluka dia lusengu lunene lua mpumbu wa mbuji ?
3. M'mu tshinyi mudi bitupa bibidi bia bukelenge bua Bena Lomo (*Lom oudi kayi mumanye Nzambi ne Lomo wa Papa*) – bifuanangane ?
4. N'tshinyi tshiakadi ne bua kuenzeka ku nshikidilu kua matuku 2300 ?
5. N'tshitupa kayi tshia tshikena kumona tshiakashala bualu tshikondo tshiakafuaye tshipûka ?

**TSHIKENA KUMONA TSHIUNVUIJA**

« Nunku umanye, ujingulule ne, Diba diapatuka mukenji ne, Bapingaja bantu mu Yelushalema nebase musoko tshiakabidi, tô ne ku difika dia muntu muedibue manyi pa mutu, mukokeshi mene, mbingu muanda mutekete neyipite. Pashishe, mu mbingu makumi asambombo ne ibidi, nebase musoko tshiakabidi, muikale ne muaba munene bu wa tshisalu ne misesu, tshikondo etshi netshikala tshia ntau mene. » (*Danye 9 :25*).

Bia kubala : - *La Tragédie des Siècles*,

« Muanjelo wakatumibua ne lukasa bua kuya kudi Danye bua kumunvuija tshitupa tshia tshikena kumona tshiakadi tshishala katshiyi tshiunvuika kudi muprofete : Tshitupa mene tshia tshikondo tshia tshiprofete » - *La Tragédie des Siècles*, p. 352

**Dia kumudilu**

**03/05**

**1. KUBALA BUA KUNVUA**

**a. Mu tshikondo tshia kukokeshabo Bena Babulona kudi Bena Madayi ne Bena Pelasa, Danye wakadi uyila tshinyi ?** *Danye 9 :1-2*

.....

« Apu m’pakadi bakadi bashale bena lulamatu kudi Nzambi munkatshi mu Babulona, bakadi bakeba Mukelenge ne bayila biprofete biakadi biamba bua bupikudi buabo, Nzambi wakadi ulongolola mitshima ya bakelenge bua bobo kutangila bantu bandi badi banyingalala bua bubi ne mesu a luse » - *The SDA Bible Commentary, vol. 4, p. 1172*

**b. Fila diunvuija dia tshiprofete tshiakadi Danye wenda ubala.** *Yelemiya 25 :8-14*

.....

**c. Tshiprofete tshia Yelemiya tshiakadi tshilomba bantu ba Nzambi tshinyi ?** *Yelemiya 29 :10-14*

.....

« Mifundu ya Yelemiya yakadi kudi bakadi mu tshimuangi, bipata mu ditunga, ne bakadi mua kubala bimpe mene mene bu muakadimo mufunda muakadi bikondo bienda bipita diambedi ne kupingana kuabo mu Palestine, ne kumbuka mu Babulona ...

Nzambi wakadi kuleja luidi luandi kudi bishadila bia Yuda biakadi bilomba kudiye ne mitendelelu ya tshisumi » - *Prophètes et Rois*, p. 420

2. MUTENDELELU WA DANYELE

a. N'tshinyi tshiakenza Danyele bu diandamuna ku biakadiye mubale ? *Danyele 9 :3*

.....  
« Ne ditabuja dibakila pa diyi dilelela dia tshiprofete, Danyele kulomba ne kutendekena kudi Nzambi bua yeye akumbaje ne lukasa milayi yandi. Yeye kusuminyina ne kulomba kudiye bua butumbi ne buneme bia Nzambi bilamibue. Yeye kuenza mutendelelu wandi bu ne n'ngua bakadi kabayi bena lulamatu, yeye kutonda mibi yabo bu ne yakadi yandi » - *Prophètes et Rois, p. 421-422*

b. Pashishe babala mutendelelu wa Danyele, n'kujoja kayi kûdi naku pa bidi bitangila mushindu kayi wakadipuekeshaye ne kutendekena Nzambi ? *Danyele 9 :4-19*

.....  
« Nansha muakadi muprofete musangu mule ku mudimu wa Nzambi ne kupeta dina dia mu Diulu ne ' mutambe kunangibua', wakimana katataka kumpala kua Mukelenge bu muenji wa mibi wa patupu » - *Ibid, p. 422*

c. N'tshinyi tshiakadi tshitatshisha Danyele nanga nanga ? *Danyele 9 :16-17*

.....  
« Munkatshi mua pepi ne bidimu makumi muanda mutekete, Isalele wakadi mu bupika. Buloba buakadi Nzambi musungula bua bobo kuikala buabo, kufidibua mu bianza bia bantu bakadi kabayi bamanye Nzambi. Tshimenga tshitambe – kunangibua, tshidi ne munya wa mu Diulu, tshiakadi tshienza disanka dia Buloba bujima, tshiakadi mpindieu tshipetula ne tshipuekeshya musinga. Ntempelo wakadi ne Mushete wa tshipungidi wa Nzambi munda muawu, ne Bakeluba ba butumbi bakadi babuikila pa mapuapua pa tshibuikidiji tshiwu tshia difuidibua luse, ntempelo eu kubutudibua. Muaba mene wakadi wa ntempelo, kunyanguka, mudiata kudi makasa akadi matushe. Bantu bena lulamatu bakadi bamanye bua butumbi buakale bua ntempelo eu bakadi bûjibue tente ne kanyinganyinga kumpala kua kabutu ka nzubu wa tshijila wakadi mufila dishilangana pankatshi pa Isalele bu tshisamba tshisungula tshia Nzambi ne bisamba bikuabo. Bantu aba bakadi bajadiki ba kufunda kua Nzambi bua mibi ya bantu bandi. Bakadi bajadiki ba dikumbana dia diyi edi. Bakadi kabidi bajadiki ba milayi ya buimpe buandi bu Isalele wakapingana kudi Nzambi ne kuenda ne kudikanda kumpala kuandi. Bena luendu, bendakanyi bakulumpe, ba nsuki mitoke, kuyabo ku Yelushalema bua kutendelela munkatshi mua bishimikidi biupula. Bakadi bupukila mabue a bishimikidi ne kuabolesha ne binsonji biabo, bakasengelela Mukelenge bua yeye kufuila Siyona luse ne bua yeye kumubuikila ne butumbi bua buakane buandi. Danyele wakadi mumanye bua se tshikondo tshijadika bua bupika bua Isalele tshiakadi mene mene ne kujika, kadi kakadi wela menji bua se, bualu bua Nzambi wakalaya bua kubapikula, bobo kabakadi biabo ne bualu buakadibo ne buenza. Ne kujila kua bia kudia ne kunyingalala, wakakeba Mukelenge, mu kutonda kua mibi yandi ne ya ba mu tshisamba tshiandi » - *The SDA Bible Commentary, vol. 4, p. 1172*

### 3. MUKUMBUDI, MUENYI WA MU DIULU

#### a. M'mushindu kayi wakakoseka mutendelelu wa Danyelee ? *Danyelee 9 :20-21*

.....

.....

« Diulu kupueka pa buipi mene mene ne Buloba bua kuteleja mutendelelu mukole wa muprofete ; ne diambedi ne yeye kujikija kutendekena kuandi kudi Nzambi bua kupeta difuidibua luse ne kupingana kua bana babo mu Palestine, muanjelo Gabriel kumumuenekela kabidi » - *Prophètes et Rois, p. 423*

« M'muanjelo Gabriel, udi mu mulongo wa kumudilu kunyima kua Muana wa Nzambi, wakatuadila Danyelee lumu lua kudi Nzambi ... Malu â Nzambi wakatupeshawu, ne dibenesha diandi didi difila kuyila kua ne kanemu kua Mifundu ya tshiprofete, kudi kuenzeka ne menji a kutendelela » - *Jésus-Christ, p. 216-217*

#### b. Dikumbula dia Gabriell diakadi ne tshipatshila kayi, ne m'mushindu kayi wakaddi dipetangana ne tshikena kumona dia mu Shapita 8 ?

.....

« Gabriel kukoka ntema yandi ku tshikena kumona tshiakamonaye diambedi ne dikuluka dia Babulona ne lufu lua Beleshasa » - *Prophètes et Rois, p. 423*

« Apu diyi dia Nzambi kudi mutumibue wandi wakikala ne moyo ne : 'Munvuija tshikena kumona', muanjelo bua kukumbaja. Bualu ebu, wakapingana kudi Danyelee ne kumuambila ne : 'Ndi mulue mpindieu bua kunzulula menji ebe ... Ikala ne ntema ku diyi, ne unvua tshikena kumona !' Ne mu kuambulula kua meyi andi, Gabriel kuimanyina nanga nanga pa tshitupa tshia tshikena kumona tshiakadi tshishala katshiyi tshiunvuija, m'buena kuamba ne bulondangane bua malu mu bikondo bia matuku binunu bibidi ne nkama isatu » - *La Tragédie des Siècles, p. 352*

#### c. N'tshikondo kayi tshiakadi tshiteka ku luseke bua Bena Yuda, ne n'tshinyi tshiakadi ne bua kukumbana mu tshikondo atshi ? *Danyelee 9 :24*

.....

« Diyisha dia Kilisto diakadi disuika mu tshikoso mu meyi â : 'Tshikondo tshia kukumbana, ne Bukelenge bua Nzambi budi pa buipi Nyingalalayi bua mibi yenu, ne nuitabuja Lumu Luimpe. Lumu Luimpe lufila kudi Musungidi luakadi ne nshindamenu walu mu biprofete.

'Tshikondo' tshiakadiye wamba ne tshiakukumbana, n'tshiakadi tshisokoluela Danyelee kudi muanjelo Gabriel ... Dituku mu tshiprofete didi tshidimu tshimue (kutangila mu *Nomba 14 :6*). M'bingu makumi muanda mutekete anyi matuku 490 ». *Jésus Christ, p. 215*

#### 4. MBANGILU MUSOKOLOLA

a. **N'diyi kayi dia bukelenge dia mushinga didi dileja m'bangilu wa mbingu makumi muanda mutekete ? Danye 9 :25**

.....

« Mukenji wa dibakulula dia Yelushalema, mukumbaja kudi Atashasete, (kutangila mu *Ezela 6 :14 ; 7 :1-9*) mukenji eu kubuela mu tshienzedi mu tshidimu tshia 457 kumpala kua diledibua dia Yezu Kilisto. Kubangishila ku dituku edi, bidimu 483 bidi bitufikisha ku tshidimu tshia 27 tshia tshikondo tshietu etshi. » - *Jésus Christ, p. 215*

b. **Unvuija muakenzabo bua mapangadika mangata mu mukenji bua kukumbaja tshiprofete. Ezela 7 :11-13, 21-27**

.....

« Mukelenge kulenga mutshima wa mfumu, bua Ezela asangana luse ku mesu andi. Mfumu kuteka mu bianza biandi mishindu ya bungi bua kuibakulula kua ntempelo ne bua Bena Yuda kupingana kuabo, mu ditunga diabo » - *The SDA Bible Commentary, vol. 3, p. 1134*

c. **Tshiprofete tshiakadi kabidi tshiamba tshinyi pa bidi bitangila mudimu wa Mashiya ? Danye 9 : 26a, 27a**

.....

« Bilondeshile tshiprofete, tshikondo etshi tshiakadi tshifika tô ne ku Mashiya, Muedibue manyi. Tshikondo tshia dibatiza diandi, mu tshidimu tshia 27, Yezu kuedibua manyi kudi Nyuma Muimpe ne kakajanguluka bua kubangisha mudimu wandi. Kubanyisha mpindieu kuamba kua Lumu Luimpe kuenzeka : 'Tshikondo tshia kukumbana'

Muanjelo kukumbaja ne : 'Yeye nejadike tshipungidi tshikole ne bantu ba bungi bua kushalatshi lumingu lumue', m'buena kuamba ne bidimu muanda mutekete bidi bibadibue nunku. Munkatshi mua bidimu ebi muanda mutekete, anu ku mbangilu kua mudimu wandi, Lumu Luimpe luakadi ne bua kuyishibua nanga nanga kuluambila anu Bena Yuda ; kudi Yezu nkayandi munkatshi mua bidimu bisatu ne tshitupa, pashishe kudi bapostolo.

'Pankatshi pa lumingu nealekeshe difila dia mulambu wa nyama mishipa ne wa bia kudia' *Danye 9 :27*. Mu tshidimu tshia 31, Kilisto kufila mulambu mulelela ku Golgotha. Mu tshikondo atshi tshilulu tshia mu ntempelo kupandika bipesa bibidi, tshiakaleja ne mudimu wa kufila kua milambu ya nyama mushinga wawu kujimina wa tshijila ne diunvuija diawu. Tshikondo kulua tshiakadi kufila kua milambu ya nyama ne bua kujika, kuimana.

Lumingu lua ndekelu – bidimu muanda mutekete – kufika ku nshikidilu mu tshidimu tshia 34 tshia tshikondo tshietu etshi. Kuasa kua Stefanu mabue kutua tshintampi tshia kubenga kua Lumu Luimpe kua Bena Yuda ; bayidi kutangalajibuabo kudi tshinyangu 'bakendakana bamba diyi dia Lumu Luimpe' – *Bienzedi 8 :4. » - Jésus Christ, p. 215-216*

## 5. MBINGU MAKUMI MUANDA MUTEKETE MIJIKE

a. **M'buulu kayi budi bukuatshisha bowa buakadi ne bua kuenzeka kunyima kua bidimu 490 ?** *Danyele 9 :26b, 27b ; Luka 21 :20*

« Lutulu lua musangu mule lua Nzambi bua Yelushalema kumueneka lujadika kudi bena Yuda mu dipapisha diabo dia mutshima ... Mu difuanyikija diabo dia menji dia bufofo ne dia kupenda kua Nzambi, bena lunsonga, basongakaji ba mudimu eu wa diyoyo dikole be, bakadi bamba ne budisu ne kabena ne dipampakana bua tshidi ne bua kufikila Yelushalema, buulu wakadi tshimenga tshia Nzambi. Bua kukolesha bukokeshi buabo, bakadi bakosa baprofete ba mashimi mishiku, mu tshikondo mene tshiakadi tshiluilu tshia masalayi a bena Lomo tshinyunguluka ntempelo, benda bamba ne dipikudibua dia kudi Nzambi diakadi ne bua kulua ne lukasa. Tô ne ku nshikidilu, musumba wa bantu wakadi mutuishibue ne Nzambi neabuele mu tshialu bua kufuisha Bena Lomo bundu. Kadi Isalele wakadi mupetula dikubibua dia mu Diulu ne kudisangana mpindieu kayi mu muluanganyinyi. Yelushalema wa dikasa dibi ! Mupanda, Musunsula kudi bantombueji, wakamona misesu yandi ne mashi a bana bandi bashipa kudi bianza bidi biandi nkayandi, apu mpakadi biluilu bia bena lukuna bienda biupula ngumbu yandi ne kushipa bantu bandi bena mvita ! » - *La Tragédie des Siècles, p. 28-30*

b. **Kunyima kua bamana kunvua tshitupa etshi tshia kumpala tshia kumpala tshia tshikondo, n'tshinyi tshitudi mua kujadika katataka ?** *Danyele 8 :14 ; 9 :24*

« Nunku, bitupa bionso bia tshiprofete biakumueneka bikumbane, kakuyi mushindu wa kuela mpata bua se, mbingu makumi muanda mutekete yakabanga mu tshidimu tshia 457 diambedi ne kuledibua kua Yezu Kilisto, ne kushikila mu tshidimu tshia 34 tshia tshikondo tshietu etshi. Lelu bidi bipepele bua kupeta dituku dia kujika kua matuku binunu bibidi ne nkama isatu. Matuku nkama inayi makumi tshitema idi yenza mbingu makumi muanda mutekete m'mumbusha mu binunu bibidi ne nkama isatu, koku kushala tshinunu nkama muanda mukulu ne dikumi. Biabi, padibi bibanyishile mu tshidimu tshia 34, tshinunu etshi ne nkama muanda mukulu ne dikumi bidi bifika mu 1844. Biakadi bilonda bua se, matuku (bidimu) binunu bibidi ne nkama isatu bia mu (*Danyele 8 :14*) boalafika mu 1844. Ne, mu kufika kua tshikondo etshi tshinene tshia tshiprofete bilondeshile bujadiki bua muanjelo, 'nebalengeje tshitendelelu.' Nunku, tshidimu tshia kulengeja kua tshitendelelu ... tshiakajadikibua kashidi mene mene » - *Ibid, p. 355*

## Disambombo

08/05

Makonka a kuambulula dilesona

1. Nansha muakadiye muprofete, n'tshinyi tshiakadi Danyele mujinga bua kuyila ?
2. Bua tshinyi wakabuela mu milombo ya kunyingalala bua mibi ya kale ya Isalele ?
3. M'mushindu kayi utudi bajadika bimpe mene mene bua se *Danyele 9* udi wandamuna buulu busokoka bua mu *Danyele 8* ?
4. Unvuija buulu buakaleja m'bangilu wa bidimu 490 bia tshiprofete.
5. Unvuija dibutuka dia Yelushalema bu muakamba Danyele ne Yezu.

**DIUNZULULA DIA TSHIAKABIDI DIA MUKANDA MUTUA TSHITAMPI**

«Nakaya kudi muanjelo m’muambila bua kumpeye mukanda mukese. Ne wakangambila ne, Uwangate, ûdie ; neuvuije difu diebe bululu, kadi mukana muebe nemuikale mushemenakana bu buitshi » - *Buakabuluibua 10 :9*

Bia kubala : - *La Tragédie des Siècles, Shapita 22*

**Dia kumudilu**

**10/05**

**1. BENA MENJI NEBAKENKE**

**a. Unvuija diteta ne butshimunyi bidi bisokolola ku nshikidilu kua tshikena kumona tshia Danyele. *Danyele 12 :1-2***

.....

**b. M’mushindu kayi wikala bantu bakane bitapuluke ne bantu benji ba malu mabi dituku adi ? *Danyele 12 :3 ; Matayo 13 :41-43***

.....

«Musuka udi mukudimuna udi muikale ne moyo mu Kilisto. Midima yandi idi ijimina ne munya mupia mupia wa mu Diulu udi ukenkesha musuka wandi. ‘Muena menji udi upeta misuka’

‘Badi ne menji ne bakenke bu bintu bia mu Diulu, ne badi balombola bantu ba bungi ku buakane ne bakenke bu mitoto kashidi ne kashidi. Tshidi tshienzeka mu dikuatshishangana mu mudimu bantu ne Nzambi, tshidi tshikale mudimu udi kawuyi ujimina kashidi, kadi udi ushala mu bikondo bia tshiendelele. Eu udi uvuija Nzambi muikale menji andi, udi udiunda tô ne ku tshipidi tshia muntu mu Yezu Kilisto, neimane kumpala kua bakelenge, kumpala kua badi badiamba ne m’bantu banene ba pa Buloba, neambe bua butumbi bua eu wakamubikila mu midima ne kumutuala mu munya wandi wa dikema. Dimanya dia malu ne dia mikanda, kabiena mua kutuadila bantu badi ne menji mu midima, munya udibo bafila kudi Lumu Luimpe lua butumbi lua Muana wa Nzambi. Anu Muana wa Nzambi nkayandi n’ngudi mumanye mua kuenza mudimu munene wa kukenkesha musuka. Kakuena tshidi mua kukemesha padi Paulo wamba ne : ‘Bualu bua tshiena ne bundu bua Lumu Luimpe : Ludi bukole bua Nzambi bua lupandu lua yonso udi witabuja. Lumu Luimpe lua Kilisto ludi lulua tshimue tshitupa tshia bumuntu bua aba badi bitabuja mikanda mifunda idi ne moyo, idi mimanyibue ne mibadibadibue kudi bantu bonso » - *Fundamentals of Christian Education, p. 199-200*

## 2. MUKANDA MUTEKA TSHIMANYISHILU

### a. N'tshinyi tshiakadi Danyeleye ne bua kuenza katataka ? *Danyeleye 12 :4a, 8, 9a*

.....

« Munemeka panshi pa Buloba bu mudi Mfumu wa ditunga, muikale mulame malu masokoka a makelenge akadi akokeshwa Buloba bujima, Danyeleye wakadi kabidi mupeshibue buneme kudi Nzambi, wakadiye muikale muleji mpala wandi ne wakadi umusokoluela malu masokoka akadi alue kumpala. Biprofete ebi bia kukema, bidi bikale mu Shapita wa muanda mutekete tô ne wa dikumi ne muibidi wa mukanda udi ne dina diandi, kabiakunvuika mu kabujima kubi kudiye ; kadi diambedi ne yeye kujikija mudimu wandi, kupeta dijadikibua dia disanka ne ku 'tshikondo tshia ku nshikidilu' – pikala muyuki wa Buloba ne bua kufiika ku nshikidilu – yeye neimane 'kulu bua bumpianyi buandi'. Kabakumupesha bua yeye kunvua bionso biakamusokoluela Nzambi ...

Bu mutudi tuenda tusemena pepi ne ku nshikidilu kua malu onso, biprofete bia Danyeleye bidi bilomba ntema ya pa buayi, bualu bidi bituambila mene bua tshikondo tshitudi bikale. Biprofete ebi bidi ne bua kuikala bisemeja pa buipi ne bia Yone mu *Buakabuluibua* » - *Prophètes et Rois, p. 416-417*

### b. N'tshinyi tshidi tshileja ne meyi a Muanjelo akadi avulujia bua bualu busokoka bua matuku 2300, ne n'tshikondo kayi tshidi bualu ebu busokoka ne bua kusokolodibua ? *Danyeleye 8 :17 ; 12 :4, 9b*

.....

« Biprofete bidi bituleja bulondangane bua malu adi aya tô ne ku tshilumbuluidi. N'nanga nanga bualu bua mukanda wa Danyeleye. Kadi muprofete eu udi upeta diyi dimuambila ne 'lama meyi â ne uteke tshimanyishilu' tô ne ku 'tshikondo tshia ku nshikidilu' tshitupa tshia tshiprofete tshiandi tshiakadi tshiamba bua matuku a ku nshikidilu. Anu n'tshikondo atshi mene tshiyabo kuamba lumu ludi lutangiila dituka dia tshilumbuluidi ne ludi nshindamenu pa dikumbana dia tshiprofete. Nunku, muprofete udi utuambila ne ku tshikondo tshia ku nshikidilu, 'ba bungi ne babale (mukanda wandi), ne dimanya ne divulangana' ...

Katshia ku tshidimu tshia 1798, mukanda wa Danyeleye wakumbushibua tshimanyishilu, dimanya dia tshiprofete kuvulangana, ne lubila lukole kuambibua bua tshilumbuluidi tshidi pepi.

Bu dibakulula dia mu Siècle wa dikumi ne muisambombo, dinyungakana dia ba Adventiste kubudika musangu umue mu bitupa bishilangane bia tshienda Kilisto. Mu matunga a Mputu, ne mu Amelika, bantu ba ditabuja ne ba mitendelelu kudiunvua basakibue bua kuyila biprofete. Mu matunga a bungi, tusumbu tua bantu pa bule bena Kilisto, anu ku kuyila kua Diyi dia Nzambi, bobo kufika ku nkomenu, tshishimbi diyi ne, Kilisto udi ku tshibi ne nshikidilu wa malu onso udi pa buip. »

### 3. TSHIKONDO TSHIA KU NSHIKIDILU

a. **Pakadi Danyeleye utangila ne uteleja, m'mukenji kayi munene wakadi uleja tshikondo tshia kufika nku nshikidilu ? Danyeleye 12 :5-7**

.....

b. **Mu kutangulula kua nvesa mikuabo jadika tshikondo tshidi tshiprofete etshi tshiamba. Danyeleye 7 :25, Buakabuluibua 11 :2-3 ; 12 :6, 14 ; 13 :5**

.....

« Muprofete Paulo kudimuisha Ekelezia wa mu tshikondo tshiandi bua se dilua dia Kilisto kadiakadi dianze kuikala anu ‘ bialua ditombokela dia Nzambi diambedi, ne anu bia buluidibua muntu wa bupidia’ (2*Tesalonike* 2 :3). Bakadi ne bua kuindila dilua dia Yezu dia tshiakabidi anu kunyima kua dilenduka dinene ne kua bukokeshi bua ‘muntu muena ubi’. Miaku eyi ne ‘muntu muena ubi’, ‘mufuikanyi’, ‘bualu busokoka bua ubi’, ‘muana wa dibutuka’ adi amba bua bukelenge bua Pape, buakadi ne tshia kuikala ku mutu bilondeshile tshiprofete, munda mua bidimu tshinunu ne nkama ibidi ne makumi asambombo. Tshikondo etshi tshiakadi tshifika mu tshidimu tshia 1798, dilua dia Kilisto kadiakadi ne bua kuenzeka kumpala kua tshidimu etshi nansha. Budimuishi bua Paulo m’buangata nunku tshikondo tshionso tshia tshiena Kilisto tô ne mu tshidimu tshia 1798. N’kunyima kua tshikondo etshi, kudi dilua dia Kilisto dia tshiakabidi ne bua kuambibua » - *La Tragédie des Siècles*, p. 386 ne *Le Conflit Imminent*, p. 377

c. **M’mushindu kayi udi muanjelo unvuija tshikondo tshia bidimu 1260 ? Danyeleye 12 :10a**

.....

« Mu Siècle wa dikumi ne muisatu tshilumbuluidi tshia dikebulula, kutekibua, tshia kosha bantu mu mafuta, tshiakadi tshiamua tshia mudimu tshia tshikisu tshitambe mu bianza bia Pape. Bamfumu mu bulondangane buabo mu bukelenge bua Pape bakadi benza mudimu eu mu diunvuangana ne bakelenge ba midima. Mu bisangilu biabo bia mu musokoko, bakadi mua kumonamu Nsatana ne banjelo bandi balombola menji a bantu banyanguke, apu muanjelo wa Nzambi udi kayi umueneka ku mesu, wakadi munkatshi muabo wenda ufunda bimpe mene mene mikenji yabo mibi ne wenda ufunda bionso biakadi bitamba kukuatshisha bowa, bua kuya kubisokoluela bantu. ‘Babulona munene’ wakadi mukuatshike ne ‘mashi a bansantu’. Mibidi yakadi mipeta tshinyangu ya misumba ne misumba ya bafuila ditabuja, kuela lubila lua busombuedi kudi Nzambi, bua bukole ebubulenduke ...

Ngikadilu wa Buloba mu bukokeshi bua Lomo wakadi uleja dikumbana mene mene dia meyi â mamba kudi muprofete Hoshea ne ... ‘Bualu bua kakuena bulelela, kakuena buimpe, kakuena luse lunene, kakuena kumanya kua Nzambi kudibo mu Buloba. Anu kuditshipa ne mishipangana, kuiba ne kuenda kua masandi, kudiku ; badi bashimbula bimanu bia nzubu ne kumatshisha kua mashi’ (*Hoshea* 4 :1-2). Ebi biakadi bipeta bibi bia kushipa kua Diyi dia Nzambi » - *Ibid*, p. 60-61

#### 4. MUKANDA MUMBUSHA TSHIMANYISHILU

a. **Mu kutangila dipetangana ne Danyeleye 12 :7, m'mushindu kayi wakamona muprogete dibulula dia tshiekona kumona tshiteka tshimanyishilu tshia Danyeleye ? Buakabuluibua 10 :1-2, 5-6**

.....

« Muanjelo wa makanda wakadi wambila Yone malu, wakadi Yezu Kilisto. Mukuteka dikasa diandi dia balume pa mayi manene ne dia bakaji pa Buloba bume, udi uleja mudimu udiye ukuata mu malu adi enzeka a ndekelu mu mvita minene ne Nsatana. Luidi elu ludi luleja bukokeshi buandi ne bukole bidi pa mutu pa Buloba bonso ...

Yone udi umona mukanda mukese mubulula. Biprofete bia Danyeleye bidi ne muaba wabi mu lubila lua muanjelo wa kumudilu, lua muanjelo muibidi ne mu lubila lua muanjelo muisatu, ludibo ne tshia kuambila Buloba. Dibulula dia mukanda mukese diakadi lubila ludi lua tshikondo ...

Tshikondo etshi, tshidi muanjelo wamba, ki nshikidilu wa muyuki wa Buloba ebu nansha, anyi nshikidilu wa tshikondo tshia diteta nansha, kadi nshikidilu wa tshikondo tshia tshiprofete tshia kumpala kua dilua dia Mukelenge wetu. Mushindu mukuabo, n'kuamba ne, bantu kabakupeta kabidi lumu lukuabo ludi luikale ne dituku ne tshidimu bijadika nansha. Kunyima tshikondo etshi, tshidi tshiya tô ne mu 1844, kakuena kabidi mushindu wa kujadika mene mene bulondangane bua malu mu tshikondo tshia tshiprofete. Makumi menji a bungi adi aya tô ne mu 1844.

Luidi lua muanjelo, dikasa mu mayi manene ne dikuabo pa Buloba bume, bidi bileja bunene ne bualabale bua kutangalaka dia lubila. Ludi luya kule, mu bipapu binene bia mayi ne ludi luya kuambibua mu matunga makuabo, ne mene mu Buloba bujima » - *The SDA Bible Commentary, vol. 7, p. 971*

b. **Unvuija m'mu tshinyi mudi bualu bupitshisha bua Yone budi kudia kua mukanda mukese bupetangane ne bua kunyungakana kua ba Adventiste kua mu bidimu 1840. Buakabuluibua 10 :9-11**

.....

« Diunvua dia bulelela, diakidila dia ne disanka dia lubila, bidi bileja mu kudia kua mukanda mukese. Bulelela budi bua tshikondo tshia kulua kua Mukelenge wetu buakadi lubila lua mushinga mutambe bua misuka yetu » - *Ibid.*

« Dituku kupita, ne Yezu Kilisto kakalua bua kutuadila bena lulamatu bupikudi, bakadi ne ditabuja dia bu bungi ne dinanga, bakadi bamuindile. Ditekeshibua dia mu mikolo diakadi bululu, kadi bulongolodi bua Nzambi bua malu, kukumbana. Menji a bakadi kabayi ne kusakibua kuimpe, kumueneshibua petoke ...

Kadi Yezu ne Diulu dijima kubuikidija bantu aba ne dinanga diabo. Bu tshilulu tshikudika tshidi tshitapulula bidi bimueneka ne bidi kabiyii bimueka, tshiakumbushibua, kuakadi mushindu wa kumona banjelo ba Nzambi bu muakadibo biname ne batangila misuka eyi yakadi ne dikima bua kuyikumbidila ne kuyilama ku mikete ya kapia ya Nsatana. » - *La Tragédie des Siècles, p. 404*

## 5. MUNKATSHI MUA BENA MENJI

a. **M'mushindu kayi udi Yehezekele muambe bua Danye, umue wa bena mu tshikondo tshiandi ?** *Yehezekele 14 :14*

.....

b. **Bu Danye, m'mushindu kayi utudi mua kuikala munkatshi mua bena menji ?** *Danye 12 :10b ; Nsumuinu 9 :10 ; Matayo 7 :24-25*

.....

« 'Tshikondo tshia dikenga, ditu kadiyi dianji kulua' tshidi pepi. Bidi bikengela tuetu kuikala ne moyo wa buena Kilisto utudi katuyi nawu katataka, ne udi ku bufuba ba bungi buya kubapumbisha bua bobo kufika ku moyo eu. Misangu mivule ntatu idi kumueneka minene mitambe kule ne pa buipi ; kadi bua lutatu ludi kumpala kuetu kaluena lua kufuanyikija eyi ntatu. Diunvuija didi dilenga bimpe mene mene didi kuinshi kua tshidi tshilelela. Mu tshikondo atshi, musuka onso udi ne tshia kuimana kumpalakua Nzambi. Nansha bu bikala 'Noa, Danye ne Yobo bikalemu, Mukelenge udi wamba ne, 'Bu mûndi ne moyo, kabakadi kupandisha moyo, kabakadi kupandisha moyo wa muana mulume anyi wa muana mukaji ; bakadi kupandisha anu mioyo yabo nkayayi bua buakane buabo' (*Yehezekele 14 :20*).

M'pindieu, tshikondo tshitshidi Muakuidi wetu Mutambe bunene utshienza mudimu wa kutulombela, ke mutudi mua kudienzeja bua kumona buakane budi mu Yezu Kilisto. Nsatana utu anu upeta mu mutshima mua idi kayi kuenzulula, umue muaba udiye mua kusomba. Dijinga dibi didi difila bukole ku mateyi andi. Yezu kakakuluka nansha mu mateyi andi, nansha mene mu kuela kua menji. Wakamba mene ne : 'Mukelenge wa Buloba udi ulua. Kena ne tshintu tshidi mu meme nansha'. Yezu wakadi utumikila ne ulama mikenji ya Tatu wandi ; kakuakadi bualu nansha bumue bua kumubanda nabu. Nsatana kakadi mua kusangana mu Muana wa Nzambi, tshiakadi mua kumupesha butshimunyi. Eu ngikadilu udi ne tshia kuikala kudi aba badi babikidibua bua kuimana bashindame mu tshikondo tshia dikenga dikole » - *La Tragédie des Siècles, p. 675-676 ne Le Grand Conflit, p. 635*

c. **M'mushindu kayi wakalaya muanjelo, Danye ne kuya ?** *Danye 12 :13*

.....

## Disambombo

15/05

Makonka a kuambulula dilesona

1. Tshikondo kayi tshia dibishibua ku bafue didi mu *Danye 12 :2 ?*
2. N'tshinyi tshiakenzeka bua tshiprofete tshia Danye tshiotshi kunzuludibua ?
3. M'bualu kayi buakaleja mbilangilu wa tshikondo tshia ku nshikidilu ?
4. N'tshiprofete kayi tshiakasokolola diunzulula dia mukanda wa Danye ?
5. M'mushindu kayi ûndi mua kuikala mutuishibue ne ndi munkatshi mua bena menji ?

MUPROFETE WA MU PATEMOS

« Muyidi mukuabo, wakadi Yezu musue, wakadi n’andi ku mesa, mumueyene mu tshiadi. » - *Yone 13 :23*

Bia kubala : - *Conquérants Pacifiques, Shapita, 53 et 54*

« Kunyima kua Kilisto mubande mu Diulu, Yone wakadileja muena mudimu mudifile ne wa lulamatu ku bualu bua Mukelenge » - *Conquérants Pacifiques, p. 487*

1. MUYIDI WAKADI YEZU MUNANGE

a. M’bilejelu kayi bidi bileja malanda makole adi pankatshi pa muyidi Yone ne Yezu ? *Matayo 17 :1 ; Mako 14 :33 ; Luka 8 :51*

.....

« Yone kumuenekabi nunku muikale ne muaba wa kumudilu mu dinanga dia kudi Kilisto, ne kupeta majadika a bungi a ditekemena diandi. Udi munkatshi mua bayidi basatu bakadi ne diese dia kubandila ditumbishibua dia Kilisto ku mukuna wa dikudimuka diandi dia mpala ne dia dikenga diandi ne lufu mu budimi bua Getesemani.

N’nyeye mene wakapeshabo mamu’andi wa Musungidi, mu meba andi a ndekelu a dikenga diandi ku Mutshi Mutshiamakane » - *Conquérants Pacifiques, p. 481*

b. M’mushindu kayi wakadi Yone wa pa buandi munkatshi mua bayidi ? *Yone 13 :23 ; 21 :20a, 24*

.....

« Yone ne Yakobo, Andele ne Petelo, nansha ne Filipo, Natanaele ne Matayo, bakadi balamatangana nandi kupita bakuabo bayidi, ne m’bobo mene bakamona bishima biandi bivule. Petelo, Yakobo ne Yone bakadi mene mene pa buipi nandi, benda bamona bienzedi biandi ne bunvua meyi andi, bakadi mene mene mushindu wa pa buawu balamate kudiye. Yone wakadi mu bushuwa muena dia Yezu bikole, yeye kufunkunyibua munu ne m’uyidi wakadi Yezu mutamba kunanga. Musungidi wakadi mubanange bonso buabo, kadi Yone wakadi ne mutshima udi wakidila kutambe. Nsonga mene mene, wakunzulula mutshima wandi wa buana kudi Yezu kutamba bakuabo bonso. Nunku malanda a bulunda mene mene akadi pankatshi pandi ne Kilisto, ne n’nyeye wakapeshibua mayisha a ndondo mule a Musungidi. » - *Jésus Christ, p. 280*

## 2. NGIKADILU MUSHINTULUKE

a. **N’diunvuija kayi dia dina dipesha Yone ne muam’abo Yakobo kudi Yezu ?**  
*Mâko 3 :17*

« Mupostolo Yone kakadi ne ngikadilu muakane eu wa kuanyisha ku tshifukilu tshiandi, wakalejaye ku nshikidilu kua mudimu wandi nansha. Wakadi ne bilema binene, kakadi anu muena budisu, ne kulumba kua malu, kadi wakadi muena malu a mulu mulu ne a kudisombuela. Kumupeshabo yeye ne muan’abo dina dikuabo ne ‘Bana ba mukungulu wa mvula’. Wakadi ne dibungama bua ngikadilu wa kukuata kua tshinji ne wa kudisombuela ne bijanu. Kadi, mu mapanga andi, Mukelenge wa mu Diulu kujandula mutshima wa disanka, wa kapia kakole, wa bushuwa ne wa dinanga. Yeye kutesha buiminyi ne kulumba kua malu bia muyidi wandi, ne yeye kuteta ditabuja diandi. Yeye kumusokoluela bua se mutshima wandi wakadi anu wenda ukeba bikole : buimpe bua tshijila ne bukole budi bushintulula bua dinanga » - *Conquérrants Pacifiques*, p. 482

b. **M’mushindu kayi wakayila Yone ngikadilu mupia mupia wa kusomba ne bakuabo ?** *Yone 13 :34 ; 1Yone 4 :7-8*

« Malesona a Yezu akadi amba bua lutulu, kudipuekesha ne dinanga bu bintu bidi bikengedibua bua kudiunda mu ngasa ne kuikala bakumbane bua kuenza mudimu wandi, biakadi bia mushinga mutambe kudi Yone. Wakadi wangata ne mushinga bua buimpe buandi dilesona dionso ne kudienzeja bua kuikala ne moyo wakadi anu mu diunvuangana ne moyo udi kuidikija wa Nzambi. Kamana kamana yeye kuanyisha, ki ne mu diela dia mbila ne bukole bia pa Buloba, kadi ‘butumbi bua muana umuepele udi mulela kudi Tatu wandi’ (*Yone 1 :14*). – *Ibid*, p. 485

c. **Unvuija bipeta, mamuma bia mutshima udi mûle tente ne dinanga dia mukuetu.** *1Yone 3 :10-11 ; Yone 13 :35*

« Ndondo ne tshisumi bia dinanga dia Yone bua Mukelenge wandi kabiakadi nunku tshikebi tshia bualu kadi m’bualu budi bua dinanga dia Kilisto kudi muyidi wandi. Yone wakadi ne dijinga dia kufuana Yezu ; ne ku buenzeji budi bushintulula bua dinanga edi dia Musungidi, yeye kulua muena kudipekesha ne lutulu. ‘Bumeme’ buandi kujimina mu Yezu. Kupita balunda bandi bonso, mupostolo wakadilekelela kudi ‘bukole’ bua moyo eu udi kuanyisha ...

Yone wakadi mumanye Musungidi ku bualu bupitshisha. Malesona akapetaye kudiye akalomibua bikole mu mutshima wandi, ne pakadiye ufila bumanyishi bua ngasa wa lupandu, ngakuilu wandi wakadi mutambe kuikala mupepele wakalua wa ludimi lutue, bualu wakadi ufumina ku dinanga dia bu-muntu buandi bujima » - *Ibid*, p. 485-486

### 3. MUIPATA KUYA KUSOMBA MU PATEMOS

#### a. Kunyima kua benza monso mua kuenza bua kushipa Yone bapangile, m'muaba kayi wakamutumabo ? *Buakabuluibua 1 :9*

« Yoen kuenzejibua bua yeye kuya ku Lomo, bua kuya kulumbuishibua bua ditabja diandi. Mu tshimenga etshi, mayisha a mupostolo akadi munvuija bibi kudi bamfumu. Ba ntemu ba mashimi bakadi bamufunda ne yeye udi uyisha meyisha a kusesuisha bantu, ne kubafila mu ditomboka. Bena lukuna bandi bakadi batekemena bua se kumufunda eku, kuakadi ne bua kufikisha muena mudimu wa Nzambi ku lufu. Yone kudilumbuiluila bimpe mene mene mu mushind wakadi utuisha, ne didipuekesha dionso ne bushuwa, ki biobi kuenza bua se meyi andi aya kupeta buenzeji bukole kudi bakadi muaba au. Bamuteleji bandi kushala batobola mukana ; balengibue kudi menji andi ne kuakula kuandi kua ludimi lupepele. Kadi pakadi meyi andi enda akoka ntema, apu mene m'pakadi tshinji tshikole tshia bena lukuna bandi kuluatshi lukinu ... Kuelabo mu tshifuadi tshia tshiamua tshikunze tshikala ne mafuta asaba pa kapia, kadi Mukelenge kulama moyo wa muena mudimu wandi wa lulamatu, bu muakenzaye ne nsongalume isatu ya bena Ebelu mu tshikutu tshia kapia kakole. Pakadibo bamba meyi â : 'Nunku ke muakafua bonso bakadi bitabuja muena mashiya eu, Yezu Kilisto wa ku Nazaleta', Yone kuamba ne : 'Mukelenge wanyi kukokela ne lutulu ku bionso biakadi Nsatana ne banjelo bandi mua kuelela menji bua kumupuekesha milongo ne bua kumuenzela tshinyangu. Wakafila moyo wandi bua kusungila Buloba. Ndi mupeshibue buneme bua meme kukenga bualu bua dinanga dianyi kudiye ...

Meyi kufila tshimuenekelu tshia ndondo, ne bobo kusabula Yone kayi mupeta bualu mu tshifuadi tshia tshiamua tshikunze tshiakadi ne mafuta asaba kudi bantu mene bakadi bamuela mu luesu elu ...

Ku mukenji muela wa Mfumu, bobo kumutuma mu muaba wa nkayandi mu tshisanga tshia Patemos ...

Bena lukuna bandi kuela menji ne apu kuakujika kena kabidi ne buenzeji nansha, ne neaye kayi ditekenena, kayi tshintu » - *Conquérants Pacifiques, p. 508-509*

#### b. N'diese kayi dia mushinga wa bungi diakafila dipata edi ? *Buakabuluibua 1 :1-3, 10-11*

« Patemos, n'tshidila tshia mabue ne tshipela, tshidi mu mayi manene a Egée, bukelenge bua Bena Lomo kusungula muaba eu, bua kuikala kutuma benji ba malu mabi matambe. Kadi kudi muena mudimu wa Nzambi, muaba eu wakadi bu nzubu wa lukanu, udi kauyi muimpe kusomba, muaba wakalua tshibi tshia Diulu. Kuaka, wakadi mumbusha pepi ne tshiyumbakenu tshia malu a mu moyo, malu menza a bidimu bimane kupita, wakadi uyukila ne Nzambi, uyukila ne Kilisto ne banjelo, ne m'muaba eu wakapetaye meyi ne mayisha bia kulonda bua Ekelezia wa bikondo biakadi bilua kumpala. Malu akadi ne bua kumueneka ku nshikidilu kua Buloba bakamulejau, ne wakamba bikena kumoan biakamonaye bua bualu bua muanda wa tshikondo tshia ku nshikidilu » - *Ibid, p. 509*

#### 4. KUSAMBAKENA NE KILISTO

##### a. **M'mushindu kayi wakamuenekele Kilisto, Yone mu tshidila tshia Patamos ?** *Buakabuluibua 1 :12-16*

.....

« Muyidi eu mutambe kunangibua wakamona lutatu ne kanyinganyinga bia Yezu, ne kumona muakadiye upungila ne lufu mu budimi bua Getesemane, pakadiye ukupula bisululu mu mamata a mashi. Wakamona 'Mpala wandi wakadi munyanguke ne dinyanguka dipite dia muntu' (*Yeshaya 52 :14*). Wakamumona muakadibo bamukuma kudi masalayi a bena Lomo, muluatshishibue bia tuseku ne tshilulu tshikunze, muasa tshifulu tshia meba, ne mupopela pa Mutshi Mutshiamakane. Ne musangu eu kabidi Yone kubandila Mukelenge wandi. Kadi wakadi mushintuluke ! Kakadi kabidi muntu eu wa bishima, mupetula ne mulekela kudi bantu. Wakadi muluatshishibue tshilulu tshia bukenke, tshibalakana ... Patemos kubalakana ne bukenke bua butumbi bua Musungidi mubike ku bafue » - *Conquérants Pacifiques, p. 518-519*

##### b. **Yone wakenza tshinyi ne m'mudimu kayi wakamupesha Yezu ?** *Buakabuluibua 1 :17-19*

.....

« Bakapesha Yone makole, bua yeye kushala muimane kumpala kua Musungidi wandi mutumbishibue. Diambedi ne yeye kumona tshikena kumona tshianti tshia mpatshi, matumbi a mu Diulu bobo kumubululabo patoke. Kumuanyishilabo bua yeye kukatshila bua nkasa wa butumbi wa Nzambi, ne pa mutu pa mvita ya pa Buloba, yeye kubandila musumba wa bapikudibue baluatshishe ne mayeka matoke. Yeye kunvua musambu wa banjelo ne misambu ya butshimunyi ya aba 'bakatshimuna anu bua mashi a Muana wa Mukoko ne bua diyi dia bumanyishi buabo'. Mu dibuluibua diakamupeshabo, wakamona malu andi alondangana akadi alenga ku moyo bikole bitambe akadi amba bua muyuki wa kale wa bantu ba Nzambi, ne yeye kupeta tshimuenekelu tshia moyo wa Ekelezia tó ne ku nshikidilu kua bikondo. Ku binfuanyi ne bimueneshelu biena bualu bia mushinga mutambe kulejibua kudiye biena bualu biakadi ne bua kufunda, bua bantu ba Nzambi ba tshikondo etshi ne ba bikondo bidi bilua kumpala, bua bapeta lunvu luakane lua dibutuka ne lua mvita idi ne bua kuluangana » - *Ibid, p. 519*

##### c. **M'mu tshinyi mudi mukanda wa Buakabuluibua utupesha lumu lua pa bualu ?** *Buakabuluibua 1 :4-6 ; 3 :22*

.....

« Dibuluibua edi diakadi ne tshipatshila tshia kulombola ne kukankamika kua Ekelezia mu kuabanya kua malu adi a buena Kilisto. Nunku, badi bayila malu a Nzambi mu tulasa tutumbuke tua bifulu bua mabue badi batshinka ne Buakabuluibua m'mukanda udi muteka tshimanyishilu ne malu masokoka adimu kakuena mushindu wa kûnvuija nansha. Ki bua tshinyi ba bungi m'bumbuke ku diyi dia tshiprofete ne kubenga bua kuya mu ndondo ne malu masokoka. Kadi Nzambi kena musue bantu bandi bamone mukanda wa Buakabuluibua nunku nansha » - *Ibid, p. 519*

## 5. DIKALANGANAKU DIA KILISTO DIJADIKA

a. **Tshikena kumona tshia Kilisto munkatshi mua bitekelu bia minda muanda mutekete bia ngolo, tshidi tshiuuvija tshinyi ? Buakabuluibua 1 :20**

« Kilisto udi mulejibue muikale munkatshi mua bitekelu bia minda muanda mutekete bia ngolo ne malanda andi ne Ekelezia. Nunku, udi wenda uyukila ne bantu bandi. Udi mumanye ngikadilu udi wandi mene mene ; udi mutangila bulongolodi budi bua Ekelezia, buimpe buandi, kudifila kuandi. Nansha mudiye muikale Muakuidi Muenene ne Mutuangaji mu tshitendelelu tshia mu Diulu, Udi mulejibue wenda uya ne upingana pa Buloba munkatshi mua Ekelezia yandi. Ne kusumpakana eku udi anu kakuyi kuteketa, udi ne tshitabela bua kumona ne munya wau mue wa ku bansentedi kawuyi kukepela anyi kuwuyi kujima. Bikale bitekedi bia minda biakadi bilekelela anu bantu bamue bua bobo kubitangila, ludimi lua kapia ludi luya kububakana, luya kuteketa ne luya kufua ; kadi yeye udi muikale nsentedi mulelela wa nzubu wa Nzambi, mulami mulelela wa biendedi bia ntempelo. Dikuba diandi ne tshitabela ne ngasa wandi bidi bia munanunanu, bidi bikale mushimi wa moyo ne munya » - *Conquérants Pacifiques, p. 521*

b. **Unvuija tshipatshila tshia ngumu idi Nzambi wambila tshibungi tshia Ekelezia, idi milejibue kudi Ekelezia muanda mutekete idi mu Buakabuluibua Shapita 2 ne 3.**

« Mena a Ekelezia muanda mutekete adi aleja Ekelezia wa Kilisto mu bikondo bishilangane bia bidimu bia buena Kilisto. Nomba muanda mutekete udi uleja tshiuwidi ne udi uleja kabidi ne ngumu eyi idi iya tó ne ku nshikidilu kua bikondo, nunku binfuanyi bidi biangata, bidi bileja patoke ngikadilu wa Ekelezia mu bikondo bishilangane bia muyuki wa kale wa Buloba » - *Ibid*

« Ekelezia wakadi mu tshilema ; wakadi dijinga ne meyi a kumutandisha bikole. Nzambi kupesha Yone menji bua yeye kutandisha ne kudimuisha aba bakadi bajimije m'muenenu wa mikenji ya ntatu ya Ekelezia, bakadi bateka lupandu luabo mu njiwu. Kadi n'dinanga anu ne milayi ya ditalala bidi Nzambi wakula mu meyi a kudiula adiyе umona adi a mushinga » - *Ibid, p. 522*

### Disambombo

22/05

Makonka a kuambulula dilesona

1. Nansha muakadi Yezu kayi kansungansunga, bua tshinyi Yone wakadi ubikidibua ne muyidi mutambe kunangibua ?
2. N'tshinyi tshiakakeba dishintuluka mu moyo ne ngikadilu bia Yone ?
3. M'mushindu kayi wakapangisha Nzambi kulongolola kua malu kua bantu babi bakadi bakeba bua kushipa Yone ?
4. Nansha mudi mukanda wa Buakabuluibua ubikidibua misangu yonso ne m'mukanda udi muteka tshimanyinu kabiyi biakane, buetu tuetu mukanda wa Buakabuluibua udi unvuija tshinyi ?
5. Unvuija tshipatshila tshia Nzambi mu kutuma kua ngumu ya kufunkuna nayi Ekelezia wandi.

**DRAGON, MUKAJI NE BISHADILA**

« Ne Dragon wakafikila mukaji munda, wakaya kuluangana mvita ne tunkanunuina tuandi tuakashala tudi tutumikila mikenji ya Nzambi, ne tudi ne bumanyishi bua Yezu ». – *Buakabuluibua 12 :17*

Bia kubala : - *La Tragédie des Siècles, Shapita 36*

« Budikadidi bua kondo ka moyo bupeta ku kudienzeja ne kudifila kua bungi, budikadidi ebu nebuyakushipibua. Mu mvita idi isemena pa buipi ne lukasa, meyi a muprofete neaye kukumbana » - *La Tragédie des Siècles, p. 641*

**Dia kumudilu****24/05****1. EKELEZIA MUSOKOLODIBUE PATOKE**

a. **N'tshinyi tshidi tshimueneka ku mbangilu wa tshikena kumona tshinayi tshia Yone ?** *Buakabuluibua 12 :1*

.....

b. **Mu binfuanyi bia mu Mukanda wa Nzambi, mukaji udi uleja tshinyi ?** *2Kolinto 11 :2 ; Yehezkele 23 :2-4 ; Buakabuluibua 17 :3-6*

.....

« Mu Shapita wa dikumi ne muanda mutekete wa Buakabuluibua, Babulona udi mulejibue mu tshinfuanyi tshia mukaji, n'tshinfuanyi tshidi Mifundu miangata bua kuleja Ekelezia : mukaji muimpe, munonoke mpadiku bakula bua Ekelezia muakane, mukaji mubi, mpadibu bakula bua Ekelezia mulenduke.

Mu mukanda wa tshijila, malanda a tshijila ne adi ashala kashidi adi pankatshi pa Yezu Kilisto ne Ekelezia wandi adi malejibue mu tshinfuanyi tshia malanda a dibaka. Mukelenge kudisangisha mu bobumue bantu bandi mu tshipungidi tshikole. Yeye kubalaya bua se yeye neikale Nzambi wabo, ne bantu bandi, kuluabo luseke, kuangatabo dipangadika dia bobo kuikala anu bantu bandi nkayandi. Nzambi kubambila ne : ‘Ne nkubangile kabidi bua kukubumbakaja kûndi tshiendelele ; bulelela, nenkubangile bua kukutuangaja n’anyi mu buakane ne mu kulumbulula kuakane ne mu dinanga ne mu kukufuila kua luse’ (*Hoshea 2 :19 anyi 20*), ‘bualu ndi bayenu’ (*Yelemiya 3 :14*). Ne mupostolo Paulo udi wakula anu tshinfuanyi tshiotshi tshimue mu Dipungila Dipia Dipia, padiye wamba ne : ‘Nakanubangisha kudi mulume umue bua meme n’manye mua kunuyila bu mukaji utshidi kamama kudi Kilisto’ (*2Kolinto 11 :2*). » - *La Tragédie des Siècles, p. 411-412*

## 2. EKELEZIA MU MVITA

### a. M'mushindu kayi wakakenga Ekelezia mu dindila dia Muana, Mashiya ? *Buakabuluibua 12 :2 ; Yeshaya 9 :5 anyi 6 ; Luka 2 :25-32*

« Meyi â a Yakobo wakadi wenda ukûla moyo akûja tente mitshima yabo ne ditekemena : 'Dikombo dia bukelenge kadiena diumbuka kudi Yuda, tshibangu tshia bukokeshi katshiena tshiumuka pankatshi pa makasa andi tû ne palua Shilo, Muena Ditalala' (*Genese 49 :10*). Bukole bua Isalele, mu kuenda bujimina, kujadika bulelela bua dilua dia Mashiya wakadi pepi ne kulua. Tshipofete tshia Danyele tshiakadi tshiunvuija bimpe mene mene butumbii bua bukokeshi buandi buakadi ne bua kuangata muaba wa makelenga onso a pa Buloba, ne muprofete kukumbaja wamba ne ; 'bobo nebujalame tshiendelele' (*Danyele 2 :4*). Bakadi difuka dikese, bushuwa, bakadi bunvua tshiakadi ngikadilu wa mudimu wa Kilisto ; kadi bakadi bindila mukelenge wa bukole wakadi ulua kujadika bukelenge buandi mu Isalele ne kusungila bisamba. Bikondo kukumbanabi. Dinyanguka dia bantu, kuvulangana ku bipungu ne bipungu mu kushipa kua mikenji ya Nzambi, kuenzabi bua dilua dia Mupikudi dikale dia mushinga » - *Jésus Christ, p. 26*

### b. M'Bukelenga kayi bua mbulamatadi budi bulejibue mu Dragon munene mukunze ? *Buakabuluibua 12 :3*

« Mu binfuanyi bia Dragon mukunze munene, nyama wa Lonji mufuanangane ne nyama wa nkashama ne nyama muikale ne nsengu ya muana wa mukoko, m'makokeshi a pa Buloba adi aluangana ne moyo onso mu mushindu wa pa buawu bua kudiata ku makasa mikenji ya Nzambi ne kukengesha bantu bandi, Yone bakamuleja malu â. » - *The SDA Bible Commentary, vol. 7, p. 972*

### c. Anu bua bukelenge ebu bua mushindu wa momumue ne bua Dradon, njiwu kayi idi bua Ekelezia ne Mashiya ? *Buakabuluibua 12 :4*

« Nsatana wakadienzeja bua yeye kumbula dijimba dile didi kadiyi kusabuka pankatshi pa Buloba ne Diulu. Mashimi andi ne dikima kubueja bantu mu bubu. Wakadi wenza nunku mu yeye bua kufikisha lutulu lua Nzambi ku ndekelu, bua lupungile, bua kujima dinanga diandi bua muntu ne kumufikisha bua yeye kumulekela kumpala kua tubadi tua kukosa kua bilumbu tua Buloba ebu » - *Jésus Christ, p. 26*

« Nsatana kupeta lukinu bua Kilisto anu bua mulongo wakadi wa Kilisto mu miaba ya kuikala idi lupangu lua Nzambi. Pakadimonaye mumbusha mu nkuasa, lukinu luandi kuvulangana bua eu wakangata dipangadika dia kupikula bantu babi. Kadi nansha nanku, Nzambi kuanyisha bua Muana wandi alue pa Buloba buakadi Nsatana utshinka ne n'nyeye udi mukelenge wabo, ne bua yeye mu luidi lua muana mukese, muikale ne mateketa a buntu. Yeye kuitabuja bua se kupitshila mu njiwu ya moyo mu mushindu wa momumue ne bantu bakuabo bonso, kuluangana mvita bu muana yonso wa bantu, pepi ne kupangila mvita eyi ne kujimina tshiendelele. » - *Ibid., p. 34*

### 3. Nvita mu Diulu

#### a. N'tshikena kumona kayi tshia kale tshiakabuluilabo Yone, ne tshidi tshiunvuija tshinyi ? Buakabuluibua 12 :7-9

« Ditua nkanana ku mikenji ya Nzambi diakabangisha mu Diulu, ne Lucifer, mukeluba mukubi. Nsatana wakadi muangata dipangadika dia yeye kuikala muaba wa kumudilu mu bulongolodi bua mu Diulu ne kuikala wa momumue ne Nzambi. Wakatuadija mudimu wandi wa ditomboka ne banjelo bakadiye ulombola, ukeba bua kumuangalaja munkatshi muabo menji a kusunuka. Ne kuenza nunku mu dishima dia bungi, ne banjelo ba bungi bobo kudisanga nandi diambedi ne menji andi kâyi manji kumanyibua biakane mene mene. Nansha mene banjelo bakadi ne lulamatu kabakamanya mua bobo kujandula mene mene ngikadilu wandi, anyi kumona kuakadiye uya mutangile ne mudimu wandi. Pakapeta Nsatana, musumba munene wa banjelo mutue ku tshiandi, yeye kuleja Nzambi bualu buakadiye nabu, mu kuamba kua se n'dijinga dia banjelo bua yeye kuangata muaba wakadi wa Kilisto.

Bubi kutungunuka ne kuenza mudimu tô ne pakafika menji a kusunuka ku ditomboka dia patoke. Apu, mvita kuenzeka mu Diulu, ne Nsatana ne bonso bena diandi, kuipatshibua » - *The SDA Bible Commetary, vol. 7, p. 972-973*

#### b. M'mushindu kayi udi dimanyisha didi dienza mu Buakabuluibua 12 :10 ne 11 dileja dijika dia kuipata kua Nsatana mu tshikondo tshia mudimu wa Yezu ?

« Disu dia tshiprofete tshia Kilisto diakamona malu akadi ne bua kuleja mvita minene ya ndekelu. Wakadi mumanye ne Diulu dijima diakadi ne bua kutshimuna, pakadiye ne bua kuela lubila ne : 'Bionso biakukumbana'. Wakadianjila kunvua ku bule meyi a musambu ne mbila ya butshimunyi mu miaba ya kuikala ya mu Diulu. Wakadi mumanye ne ngonga wa lufu wakadi ne bua kudila pa bukelenge bua Nsatana, ne dina dia Kilisto diakadi ne bua kuambibua, mu miaba yonso, eku ne eku, mu bunene bua Diulu ne Buloba » - *Jésus Christ, p. 684*

« Tshifufu tshia bupikudi tshiakadi ne tshipatshila tshinene tshitambe lupandu lua bantu. Tshifufu etshi katshiakadi anu tshienza bua banemeke mikenji ya Nzambi kudi badi bashikame mu dibulunga dietu dikese nansha. Biakadi bua kuvuija buakane bua ngikadilu wa Nzambi kumpala kua badi basomba mu mabulunga makuabo ... Lufu lua Muana wa Nzambi luakadi ne bua kufikisha bantu mu Diulu ; kadi, luakadi kabidi ne bua kuvuija buakane kumpala kua Buloba bujima ngikadilu wa Nzambi ne wa Muana wandi pa bidi bitangila ditomboka dia Nsatana. Luakadi ne bua kujadika dikalanganaku dia kashidi dia mikenji yandi ne kusokolola patoke ngikadilu ne bipeta bibi bia bubu » - *Patriarches et Prophètes, p. 46-47*

4. MVITA PA BULOBA

a. **Njiwu kayi minene yakadi katataka kumpala kua Ekelezia ? Buakabuluibua 12 :12-13**

.....

« Nsatana, mumanye ne bukelenge buakadiye nabu ku mashimi, bakadi ne bua kumunyengabo, yeye kuangata dipangadika dia yeye kubutula mu mishindu yonso bifukibue, bifuka kudi Nzambi mu tshinfuanyi tshiandi. Wakakina muntu bualu bua Kilisto wakaleja muntu dinanga diandi ne buakane bia luse lutambe, ne yeye kudilongolola katataka bua kukuata mudimu ne mashimi mu mishindu yonso anu bua muntu ajimine ; kutungunuka ne mudimu wandi ne bukole bonso nansha yeye Nsatana mua kujimina, ajimine » - *The SDA Bible Commentary, vol. 7, p. 973-974*

« Bukole bua mvita eyi minene pankatshi pa buakane ne bubi nebuwulangane tō ne ku nshikidilu. Mu tshikondo tshionso, tshinji tshia Nsatana kujūka bua Ekelezia wa Kilisto. Kadi Nzambi kumuangalaja ngasa wandi ne Nyuma wandi pa bena kuitabuja bua kubakolesha ne bua bobo kutshimuna mateyi a Nsatana. Tshikondo tshiakapeta bapostolo ba Kilisto mudimu wa kumuangalaja Lumu Luimpe mu Buloba ne kulufunda bua kululama bua bikondo bionso biakadi ne bua kulua pashishe, bakadi bakenkesha mu mushindu wa pa buawu kudi Nyuma wa Nzambi. Kadi bu muakadi Ekelezia wenda usemena pa buipi ne dipikudibua diandi, Nsatana apa n’ngukuata mudimu ne bukole bua bungi. Mishindu yonso ya bumfumu buandi bukole bua lufu, budimu buandi bonso, tshikisu tshiandi tshionso, neaye kukuata nabi mudimu mu kubunda kuandi kua ndekelu kua bantu ba Nzambi. M’mu tshikondo etshi tshia njiwu mudi bayidi ba Kilisto ne tshia kudimuisha Buloba bua dilua diandi didi pa buipi, ne bantu badiku badi ne tshia kudilongolola bua kubasangana kabayi ditoba anyi bualu bua kubabanda nabu (2Petelo 3 :14). Ne kabidi ngasa ne bukole bia kudi Nzambi kabia kupanga kuikala ne mushinga mukumbane bua Ekelezia mu tshikondo tshia ku nshikidilu bu matuku a bapostolo » - *La Tragédie des Siècles, p. 13-14 ne Le Conflit Imminent, p. 9-10*

b. **Unvuija bualu bupitshisha bua Ekelezia munkatshi mua bidimu 1260 bia dikengesha. Buakabuluibua 12 :6, 14**

.....

c. **N’dikuatshisha kayi diakamueneka bua kutshiungulula kubunda kua makola a bantu, kuakadi Dragon mujule bua kuluangisha bena lulamatu ? Buakabuluibua 12 :15-16**

.....

« Biakamanyika mu Europe bua se kuakadi dimue ditunga, muakadi muntu yonso udia tshia ku mudimu wandi ne wenza malu bilondeshile mudi kondo kandi ka moyo, misumba ne misumba ya bantu, kunyemena mu Buloba bupia bupia » - *La Tragédie des Siècles, p. 318*

## 5. BISHADILA

### a. M'bamba munyi bua bena lulamatu mu tshikondo tshidi tshinji tshia Dragon tshilua tshikole tshitambe ? *Buakabuluibua 12 :17*

.....

« Mumonyi wa malu wa mu Patemos, udi wakula bua tshikondo tshia ku nshikidilu wamba ne : ‘Ne Dragon wakafikila mukaji munda, wakaya kuluangana mvita ne tunkanunuina tuandi tuakashala, tudi tutumikila mikenji ya Nzambi, ne tudi ne bumanyishi bua Yezu’. (*Buakabuluibua 12 :17*). Bidi bikengela bua tuetu kuindila bua kumona lelu dikumbana dia tshiprofete etshi. Menji asaka bantu kale bua bobo kukengesha Ekelezia mulelela, neabatume bua kuenza mushindu wa momumue ne aba badi bashala bena lulamatu kudi Mukelenge. Malu ngenda alongolodibua bua mu tshikondo etshi bua mvita ya ku nshikidilu » - *Prophètes et Rois, p. 458-459*

### b. M'mushindu kayi udi ngikadilu wa bishadila unvuija tshidi Ekelezia mu matuku â a ku nshikidilu ? *Buakabuluibua 14 :12 ; 19 :10*

.....

« Ekelezia wa bishadila neaye kujadika Nzambi mu mikenji yandi ne neikale ne dipa dia tshiprofete. Kutumikila kua mikenji ya Nzambi ne Nyuma wa Tshiprofete m'biobi bidi bifila dishilangana pankatshi pa bantu ba Nzambi balelela mu bikondo bionso, ne diteta didiku pa dimueneshibua dia patoke dia malu adiku » - *Loma Linda Messages, p. 33*

« Ekelezia wa 'Bishadila' neapitshile mu mateta manene ne mu matuku a kanyinganyinga. Badi batumikila Mikenji ya Nzambi ne Ditabuja dia Yezu, Dragon neabafikile munda, yeye ne biluulu biandi. Nsatana udi ubala ne munkatshi mua bidi biandi, Buloba budimu, udi mpindieu ukokeshia ekelezia milenduke, kadi kudi kasumbu kakese kadi kakandamana ku bukokeshi buandi » - *Témoignages pour l'Eglise, vol. 2, p. 208*

« Dibenga kutumikila Mikenji ya Nzambi ne dipangadika dia kuluangisha aba badi bayitumikila, bidi bituma Dragon bua yeye kuluangana mvita mikole. Makola onso andi adi masangisha mu mvita eyi idiye uluangisha bantu ba Nzambi badi batumikila Mikenji yandi. » - *Ibid, vol., 3, p. 273*

## Disambombo

29/05

Makonka a kuambulula dilesona

1. Bua tshinyi Ekelezia udi mulejibue mu tshinfuanyi tshia mukaji mu Mukanda wa Nzambi ?
2. Unvuija njiwu yakangata Muana wa Nzambi bua kulua pa Buloba bu muntu.
3. N'tshikondo kayi tshiakafika dipadibua mu Diulu ku ndekelu mene mene ?
4. Unvuija kabingila kakafikila Dragon, Ekelezia, munda.
5. Ngikadilu kayi itudi mua kujadika nayi bishadila ?

## Mulambu wa pa buawu bua Nzubu wa kutendelela Mu République Tchèque

République Tchèque (anyi Tchèque)  
n'Ditunga didi disanganyibua munkatshi mene mene mua Europe, ku mikalu ne Ditunga dia Allemagne, dia Pologne, dia Autriche ne Ditunga dia Slovaquie. Munda mua Ditunga edi mudi musanganyibua Bohème, tshitupa tshia buloba tshia kale ne misoko ya pa mpenga idi isankisha mesu pa kuyitangila, nzubu minene mitumbuke ya lumu lua bung'i ne malu manene a mu nsombelu wa bantu ne a diimanya dia malu ne a ngelelu wa menji muaba mene wakabangila Jean Hus (1369 – 1415) kuibakulula kuandi kunene kua ditabuja. Lelu, n'Ditunga didi kadiyi ne tshitendelelu tshidi tshia Mbulamatadi nansha, didi ne bantu batue ku millions 10, 9, bapite ku million 1, 4 badi basombela mu tshimenga tshikulu, Prague.



Prague kena anu muikale muaba wa nsangilu wa kale ne wa dimanya dia malu, kadi udi kabidi muaba udi misumba ya bantu mikale ne dijinga dia malu a nyuma, ba bung'i ba mu bobo badi bakeba tshidi luidi lua moyo, ditekemena ne ditalala bia mutshima. Munkatshi mua badi bashikame mu Ditunga edi, 47,8 % badi babadibua bu bantu badi kabayi batendelela, 11,7 % badi badiamba ne m'bena Kilisto (mudi muikala 9,3 % badi ba Catholiques ne 2,4 % m'bena bitendelelu bikuabo bia bena Kilisto) ne 10,8 % badi bena bitendelelu bikuabo.

Mudimu wa ba Adventiste du 7<sup>ème</sup> Jour, Mouvement de Réforme mu tshimenga etshi wakatuadija mu tshidimu tshia 2014, anu ne bantu basatu bakadisangisha bua musangu wa kumudilu. Pashishe, mu ngondo wa muanda mukulu 2020, Mpasata ne diku diandi kutumbua muaba eu bua kuamba lubula lua bulelela bua tshikondo, ludi lubila lua lupandu lufidibue kudi misuka mijimine.

Lelu, Ekelezia wa Prague udi ne ba membres 30, ne bantu badi balua kutantshila bua kumanya ne badi benda badilongolola bua kupeta dibatiza, bantu m'batue ku 70. Masangisha adi enzeka mu nzubu wa kufutshila, kadi Ekelezia udi utendelela bikole bua mushindu wa kusumba anyi kuibaka Nzubu wandi nkayandi wa kutendelela, muaba udi bantu ba Nzambi mua kudisangisha, kuikala bakankamika mu ditabuja ne kuabanyangana munya wa bulelela ne aba badi babanyunguluke. « Nzubu muaba udibo ne bua kukukuila Nzambi udi ne tshia kuikala anu bumudi ngikadilu wandi ne butumbi buandi » - *Testimonies for the Church, vol. 5, p. 268*

Bana betu balume ne bakaji lelu tshikondo tshidi kumpala kuetu bua tuetu kuditua ku mudimu eu munene wa Nzambi. Mulambu wenu udi muikale kubutshila kua bintu bua tshindelele, bua lupandu lua misuka ne bua kukolesha Ekelezia udi mene mu mutshima wa Europe.

Nulombe bua Nzambi anulombole, tuayi mudimu eu mpanda ne lejayi dijinga edi munkatshi muenu. Mukelenge abeneshe yonso wa badi baditua ku mudimu eu ne dinanga !

« Tudi tusakidila Nzambi misangu yonso bua bonso buenu tutela mena enu mu milombo yetu » - *1 Tesalonike 1 :2*

Bana benu balume ne bakaji ku Prague.

**NYAMA WA LONJI TSHIMANYINU**

« Ne udi wenzeja bonso, bakese ne banene, ne babanji ne bapele, ne badishikamine, ne bapika, bua babape tshimanyinu pa tshianza tshiabo tshia balume anyi pa mpala pabo » - *Buakabuluibua 13 :16*

Bia kubala : - *La Tragédie des Siècles, p. 475 – 487*

« Nsengu mifuana ya muana wa mukoko ne wakula bu Dragon, ne ebi bia kudi nyama eu wa lonji kabiena bipetangana ne kujikula kuandi kua ditabuja ne bienzedi bia tshisamba tshidiye muikale uleja mpala » - *La Tragédie des Siècles, p. 479*

**Dia kumudilu**

**31/05**

**1. NYAMA WA LONJI MUPAPE**

**a. Yone wakamona tshinyi bilondeshile Buakabuluibua 13 :1a, bualu ebu bilondeshile munya kayi wa kuyila kuetu kua Danye 7 : 3 ?**

.....

**b. N'tshinyi tshitudi mua kuyila bua imue ngikadilu ya mubidi ya nyama eu wa lonji idi mifuanangane ne nyama inayi mimana kuyila kumpala ?**  
*Buakabuluibua 13 :2 ; Danye 7 :4-6*

.....

« Shapita wa dikumi ne muisatu (*nvesa 1 – 10*) udi utupesha diunvuija dia mushindu udi nyama mukuabo wakadi ‘ufuanangana ne nkashama’, udi ‘Dragon mupesha bukole buandi, ne bukokeshi buandi bunene ne nkuasa wandi wa butumbi’. Bu muakitabuja tshibungi tshia bena mishonyi batontolodi, tshinfuanyi etshi tshidi tshileja bukelenge bua Pape, buakakumbana bua kuangata ‘bukole, nkuasa wa bukelenge ne bukokeshi’ bia bukelenge bua Lomo bua kale. Bua bidi bitangila nyama eu wa lonji udi mufuanangane ne nyama wa nkashama, tudi tubala meyi â ne : ‘Neabulule mukana muandi bua kuamba meyi a diambu a kupenda Nzambi ... Yeye kubulula mukana kupenda Nzambi, kupenda dina diandi, ne ntempelo wandi, ne badi bashikame mu Diulu. Kupeshibua diyi dia kuenza bansantu mvita, ne kubatshimuna. Ne kupeshibua bukokeshi pa tshisamba tshionso, bantu bonso, muaku onso, ditunga dionso.’ Tshiprofete etshi, tshidi ne meyi mafuanangane pepi ne onso ne meyi a tshidi tshiunvuija tshia lusengu lua dikumi ne umue ludi mu Shapita wa muanda mutekete wa Danye, tshidi tshiamba kakuyi mpata bua bukelenge bua pape. » - *La Tragédie des Siècles, p. 475-476*

« Munkatshi mua bidimu bivule, bamfumu ba Mbulamatadi ne Ekelezia ba matunga a bungi a ku mputu, Europe, bakadi balombola kudi Nsatana kupitshila ku bukelenge bua Pape » - *Ibid, p. 289*

## 2. BUKOLE BUDI BUKENGESHA

a. **M'mushindu kayi udi tshikadilu tshia nyama wa lonji tshijadika bilondeshile bule bua tshikondo tshia bukokeshi buandi ?** *Buakabuluibua 13 :5 ; Danyelee 7 :25*

« 'Bakamupesha bukokeshi bua yeye kuenza mudimu ne bukokeshi buandi munda mua ngondo makumi anayi ne ibi'. Muprofete udi ukumbaja ne : 'mutapike mputa wa lufu'. Ne kabidi : 'Bikala muntu wakuya ne bantu mu bupika, yeye neaye biandi mu bupika ; ne udi ushipa ku muele wa mvita, yeye kabidi neafue ku muele wa mvita.' Ngondo makumi anayi ne ibidi, idi mene tshikondo tshidi 'tshikondo tshimue, bikondo ne tshitupa tshia tshikondo' – bidimu bisatu ne tshitupa anyi matuku tshinunu nkama ibidi ne makumi asambombo – bia Danyelee, ne m'munkatshi mua matuku â muakakengesha bukelenge bua Pape bantu ba Nzambi. Tukavua badianjile kuamba bualu ebu mu Shapita ikadi mipite kumpala : Tshikondo etshi tshiakabangisha ne bukokeshi bua Pape mu tshidimu tshia 538 tshia tshikondo tshietu etshi ne kujika mu tshidimu tshia 1798.

Kukuatabo Pape mu lukanu kudi masalayi a bena France, ne bukelenge bua Pape bukapeta 'mputa wa lufu'. Nunku tshiprofete etshi kukumbanatshi tshidi ne : 'Biatuala muntu bakuabo mu bupika, yeye neaye mu bupika' » - *La Tragédie des Siècles, p. 476*

b. **M'mushindu kayi wakakepela bukokeshi bua nyama wa lonji udi mufuanangane ne nkashama ?** *Buakabuluibua 13 :3a, 10*

c. **Nyuma wa lonji neangate mapangadika kayi ?** *Buakabuluibua 13 :6-8*

« Buenzeji bua eu nyama wa ndekelu [*Lomo, bukelenge bua Pape*] kabuena bujimina kashidi mu matunga akadibo ne bukokeshi kale. Ne tshiprofete tshidi tshiamba bua dienzulula dia bukokeshi buandi. 'Nakatangila umue wa ku mitu yandi bu mutapike mputa wa lufu ; kadi mputa wandi wa lufu wakondapibua. Ne Buloba bujima kukatshila bua eu nyama wa lonji wa ndekelu'. Paulo udi wamba biakane mene mene bua se muntu wa bubi neikaleku tô ne ku dipingana dia Mukelenge (*2Tesalonike 2 :3-8*). Neikale anu mukandamena mu mudimu wandi wa kusesuisha tô ne ku nshikidilu kua bikondo. Mumonyi wa malu udi ukumbaja wamba ne : 'Bonso badi bikala pa Buloba nebamukukuile, muntu yonso udi kayi ne dina difunda ... mu Mukanda wa moyo' – *Buakabuluibua 13 :8*. Mu Buloba bua kale nansha mu Buloba bupia bupia, kutumikila kua dituku dia mpatukila wa lumingu, dimanche, kudi anu kushindamena pa bukokeshi bua Ekelezia wa ku Lomo, kuenza nunku n'kupesha kua Pape butumbi ne buneme » - *Ibid, p. 627-628*

### 3. NYAMA WA LONJI MUFUANE MUANA WA MUKOKO

a. **M'bukalenge kayi bupia bupia bua tshididi buakamueneka tshikondo mene tshiakapeta bukelenge bua Pape tshisusu tshia lufu ? Buakabuluibua 13 :11**

« Nyama wa lonji wakadi ne nsengu mifuana ya muana wa mukoko ... 'Udi upatuka mu Buloba'. Pa mutu pa kushipa makelenge makuabo a Mbulamatadi ne yeye kusomba muaba wabo, ditunga edi kujukila mu muaba wakadi kawuyi bantu bashikamemu, ne kudiunda mu mushindu wa dienda dibanda ne mu ditalala. Ditunga kadiena dipatukila munkatshi mua bantu ba bungi ba mu Buloba bua kale, mu mayi manene adi adiele eku ne kuaka adi aleja 'Bantu, misumba ya bantu, bisamba ne miaku'. Edi ditunga bikengela kuya ku dikeba dia muamua dia mbuwa munene wa Atlantique.

N'ditunga kayi dia Buloba bupia bupia, ditshivua anu kuntuadijilu kuadi mu tshidimu tshia 1798, diodi kukoka ntema ya Buloba ne kuleja ne mu matuku kumpala diakadi ne bua kuikala ne bukole ne bunene butambe ? Bua kutangila tshinfuanyi kakuena mushindu wa kuikala ne dielakana. Ditunga dimupele malu adi mamba mu tshiprofet tshietu n'ditunga dia : Etats-Unis d'Amérique. Ku misangu ne misangu, menji ne nansha mene meyi a muprofete bakakuata nawu mudimu kudi batu bayisha ne bamba malu a kale bua kunvuija diledibua ne didiunda bia ditunga edi. Nyama wa lonji wakadi 'upatuka mu Buloba'. Biabi, bilondeshile bunvuiji, diyi edi didi diamba ne 'kapatuka mu Buloba' didi mua kunvuija ne 'kudiunda, kupatuka mu Buloba bume bu mudi tshikunyibua'. Ne kabidi, bu muakamonabo, ditunga edi disamba dijadikebue mu muaba wakadi kawuyi bantu base ...

Diakadi ne 'nsengu ibidi mifuane ya muana wa mukoko'. Nsengu eyi ya muana wa mukoko idi ileja buana, bunsonga, buakane, lutulu, bupole. M'bileja bimpe mene mene ne Etats-Unis mu tshikondo tshidi muprofete Umumona 'upatuka mu Buloba, mu tshidimu tshia 1798. Munkatshi mua bona kuitabuja bakadi banyemena mu Amérique bua tshinyangu tshia kudi bamfumu ne bua dipanga bunyengu ne ditalala bia kudi ba nsaserdose, ba bungi bakangata dipangadika dia kuasa ditunga diakadi ne bua kuikala disombela pa nshindamenu wa budikadidi bua malu a mbulamatadi ne bua malu a ntendelelu. Menji abo kufundibua mu Diyi dikulu dia Dipanda, didi diamba bualu ebu bulelela bunene ne : 'Bantu bonso badi bafukibue bikale bamomumue' ne badi ne manema adi kayi kunyanga 'a moyo, a budikadidi ne a kukeba disanka, buimpe'. Ne kabidi, Diyi dikulu didi dijadikila bantu bua buneme bua bobo kudilombola nkayabo pa kusungula kua baleji mpala babo, bomekela bujitu kudibo, bua bobo kuenza mikenji ne kuambila bantu bua kuyinemeka. Budikadidi bua ntendelelu bobo biabo buakadi bujadika, muntu udi ne budikadidi bua kuenzela Nzambi mudimu bilondeshile mudi kondo kandi ka moyo. Bulongolodi bua kudi bonso mu ditunga anyi républicanisme ne buena mishonyi anyi protestantiseme, biakalua mikenji ya ntaku ya ditunga edi, nyoyi idi yenza bualu busokoka bua bukole bua ditunga edi ne kutanta kuadi. Bakengeshibue ba mu buena Kilisto, bakatangila kudi ditunga edi mesu a ditekemena dia bungi. Bantu ba bungi kumuangala bua kuya diamuamua dia mbuwa, mu ditunga edi, ne Etats-Unis kulua ditunga dia bukole bua bungi munkatshi mua matunga adi ne bukole butambe pa Buloba » - *La Tragédie des Siècles, p. 477-478*

## 4. KUAKULA BU DRAGON

a. **M'bualu kayi budi butonda budi buya kuenzeka, buenzeja kudi nyama wa lonji udi mufuane muana wa mukoko ?** *Buakabuluibua 13 :12, 16*

« Nsengu mifuane ya muana wa mukoko ne kuakula bu Dragon, m'biakadi kudi nyama eu wa lonji, bidi bileja dipanga kupetangana dikole pankatshi pa dijikula dia ditabuja ne bienzedi bidi ditunga edi dienza. N'ku mikenji yandi ne mapangadika andi a ku – tubadi kudi tshisamba etshi 'tshiakula', ne n'ku bidimba biobi bimue ebi kudi nyama eu wa lonji uya kushipa mikenji ya budikadidi ne ya ditalala yakatekaye munkatshi mua bantu. Kudianjila kuamba bua se yeye neakule bu 'Dragon', ne yeye udi wenzeja 'bukokeshi bonso bua nyama wa kumudilu ku mesu kuandi', bidi biamba patoke bua dimueneshibua dia menji adi kâyi dianyisha ne lutulu ne dikengesha dia mushindu wa momumue dia menji akamueneshibua kudi bisamba bilejibue mu Dragon ne mu nkashama. Ne diyi didi diamba ne : 'Udi wenzeja Buloba ne bonso badi bikalamu bua kukukuilabo nyama wa lonji wa kumudilu' bidi bileja ne ditunga edi nedikuata mudimu mu bukokeshi buadi bua kuenzeja amue malu a mu ntendelelu biaya kufila buneme ne butumbi kudi bukelenge bua Pape. Mikenji ya mushindu eu kayakupetangana ne mikenji ya bukelenge ebu nansha ne mitapuluke ne lungenyi lua budikadidi bua bibambalu biabu bu mudibi bijadika mu meyi manene a Diyi dijadika dia Dipanda ne mu Diyi dikulu. Bua kuepuka ku dipingana ku malu a dipanga kuanyisha ne lutulu en tshinyangu, bakasa ditunga edi kutebelela bimpe mene mene bua Ekelezia kalu kudiapula bukelenge bua Mbulamatadi. Diyi dikulu didi diamba ne : 'Mpungilu wa bakulumpe ba mabala ne bipuita munua nfuanka kena mua kuenza mukenji nansha umue udi mua kuenza bua kuteka ntendelelu udi wa Mbulamatadi nansha' ; udi ukumbaja ne 'kakuena bualu nansha bumue bua kukumbaja bua mutendelelu budi bukengedibua bua kuenza mudimu mu Etats-Unis'. Kadi anu mu kushipa kua malu â adi ajadika budikadidi bua bena ditunga, n'kudi Mbulamatadi mua kuenzeja bantu ku bukole bua kulonda malu a ntendelelu » - *La Tragédie des Siècles, p. 479*

b. **M'mushindu kayi udi kuenzeja eku kua tshimanyinu tshia nyama wa lonji mua kuya kukeba dikuluka dia Etats-Unis ?** *Nsumuinu 14 :34 ; Misambu 119 :126*

« Mu bidimu bionso bia malu a bundu, buendenda, budiavi, bunuavi, biakûja tshibutshilu tshia tshinji bua dituku dia tshinji ; padi bubi buya kupita, Nzambi neaye kuenza mudimu wandi wa pa buawu. Bualu nebukuatshishe bowa bualu bua bakufikisha lutulu lua Nzambi ku ndekelu walu ; udi utuambila ne tshinji tshiandi netshilue katshiyi tshisangisha ne luse, tshinji tshikole ne Buloba nebubutudibue. Tshikondo tshikale dilenduka ditunga dijima, pikala tshididi tshia Nsatana tshipeta bipeta biatshi ne balombodi ba ditunga baya ku luseke lua muntu wa bubi, apu dipila nedikale diuwule mu tshipimu ; dilenduka dia ditunga dijima nedifile tshimanyinu tshia dibutuka dia ditunga dijima » - *Messages Choisis, vol. 2, p. 427-428*

## 5. TSHIMANYINU TSHIA NYAMA WA LONJI

### a. N'tshimanyinu kayi tshia bukokeshi bua Lomo ? *Danyele 7 :25*

« Bu tshimanyinu tshia bukokeshi bua Ekelezia Catholique, bamutu ba makumbu badi bamba ne : ‘dituma dia Nsabatu mu Dimanche, ne bena Mishonyi kuitabuja nunku ... mu kujidila kua Dimanche, n’dijadika dia se Ekelezia Catholique udi ne bukokeshi bua kulongolola matuku a mafesto ne yeye kenzeja bantu bua bobo kuâlonda, ne kabayi benza nunku m’bubi. Dishintulula dia Mukenji Muinayi ki n’tshimanyinu tshimueneka tshia bukokeshi bua Ekelezia Catholique, mu meyi makuabo ne, ‘Tshimanyinu tshia Nyama wa lonji’ ?

Tshikondo tshienzejabo ku bukole ditumikila dia Dimanche ku Mukenji muela, ne pikala Buloba bukenkesha pa bidi bitangila buenzeji bua Nsabatu mulelela, apu waya kushipa Mikenji wa Nzambi ne kutumikila mukenji udi kawuyi wa mukokeshi wa pa mulu budi kabuyi bukokeshi bua Lomo, apu neaye kupesha Pape buneme pa mutu pa kupesha Nzambi » - *La Tragédie des Siècles, p. 486 ne Le Grand Conflit, p. 451*

### b. Unvuija ndekelu wa kunyungakana eku kutapuluke : lumue luseke bua kukenkesha misuka pa bulelela lukuabo m’bua kuenzeja ku bukole’ tshimanyinu tshia Nyama wa lonji. *Buakabuluibua 13 :13-15 ; 16 :13-14 ; Matayo 24 :14, 24*

« Batendeledi ba dituku dia Dimanche kulua ne dikamakama dia bungi, Ekelezia kukeba diboko dia bukole dia bukokeshi bua Mbulamatadi, bena Catholique ne bena Mishonyi m’benza malu â kaba kamue. Mu dina dia mikenji, batumikidi ba Mikenji ya Nzambi ne bikale bafunyina bua kufuta bibawu ne kuedibua mu nzubu wa lukanu. Bamue nebadimone bapeshibue buenzeji, mafutu ne bintu. Kabiyi nansha pa buipi bua kupidia ditabuja diabo, nebaye kuandamuna bu Luther ne : ‘Tulejayi mu Diyi dia Nzambi bua se tudi mu tshilema’. Bafikishabo kumpala kua tubadi ne bakula kabayi ne kajilu bua kuimanyina bulelela ne bantu ba bungi nebatue ku tshiabo baya kubateleja. Munya newuya kufika nunku kudi misuka ya bungi yakadi bikondo bishale kunyima kayiyi mimanye munya eu » - *Ibid, p. 659-660*

## Disambombo

05/06

Makonka a kuambulula dilesona

1. M’mushindu kayi udi imue ngikadilu ya nyama ya mu Danyele 7 misangana mu Lomo ?
2. Leja mishindu mishilangane ya bidimu 1260 ya bukokeshi bua Pape, muakadibi bibadibue.
3. Bua tshinyi mputa eu wa lufu kena mufikisha nyama eu wa lonji ku lufu ?
4. Ngikadilu kayi ya pa buayi idi anu ya Etats-Unis yakadi milejibue mu nsengu ya muana wa mukoko ?
5. Bantu badi baya mu Ekelezia mu Dimanche bakadi bamane kupeta tshimanyinu tshia nyama wa lonji anyi ?

**BANJELO BASATU**

« Eku nkutantamana kua bansantu, badi batumikila mikenji ya Nzambi, ne ditabuja dia Yezu. » - *Buakabuluibua 14 :12*

Bia kubala : - *Premiers Ecrits, p. 232-261*

« Bakandeja biendedi bisatu biakadi bifikisha pa muaba mualabale ne biakadi bileja ngumu isatu : muanjelo wa kumudilu, muibidi ne muanjelo muisatu. Muanjelo wakadi unfila kungambila ne : ‘Mulawu ne dikenga bikale kudi udi umbusha nansha katupa kakese mene mene ka ngumu eyi. Diunvuija dia ngumu eyi dilelela didi dia mushinga wa bukole’ » - *Premiers Ecrits, p. 258-259*

**Dia kumudilu**

**07/06**

**1. BANJELO MU BUA KABULUIBUA**

**a. Fuanyikija ne fila dishilangana pankatshi pa batumibue badi balejibue mu banjelo.** *Buakabuluibua 1 :20 ; 10 :1,5 ; 11 :1 ; 22 :8*

**b. M’ mushindu kayi udi Nzambi utuma lubila kudi muntu yonso pa Buloba ?** *Lomo 10 :13-15*

« Bua kuleja mpala wandi apa panshi pa Buloba, Nzambi kena musungula banjelo batu kabayi banji kuenza bubi nansha, kadi m’ musungula bantu, badi bikale ne majinga a mubidi bu badibo bakeba bua kusungila. N’kudi balume ne bakaji badibo bapesha mudimu wa kumanyisha ‘bua bubanji bua Kilisto’ (*Efeso 3 :8*) » - *Conquérants Pacifiques, p. 119-120*

« Tudi ne tshia kuleja Yezu kudi Buloba mu bobumue ne banjelo ba mu Diulu ... bualu bua n’kupitshila kudi muntu ngudi malanda enzeka ne muntu. Ne patudi tudifila kudi Kilisto, ne didifila dionso, banjelo badi basanka bua kumanyisha dinanga dia Nzambi ku meyi etu » - *Jésus Christ, p. 286*

**c. M’ bantu kayi badi bafuanyikija ne banjelo ba mu Buakabuluibua 14 :6-12 ne mudimu wabo udi tshinyi ?** *Matayo 28 :19-20 ; Bienzedi 1 :8*

« Banjelo aba badi balejibue kudi benda bapapalala munkatshi mua Diulu, benda bambila Buloba lubila lua didimuisa ... kakuena muntu udi unvua diyi dia banjelo aba badi anu bikale tshinfuanyikiji tshia bantu ba Nzambi badi benza mudimu mu diunvuangana ne Diulu » - *Messages Choisis, vol. 2, p. 446*

2. MUANJELO WA KUMUDILU

a. **M’banganyi badi muanjelo wa kumudilu utuadila lubila luandi ?**  
*Buakabuluibua 14 :6.*

.....  
« Tshiprofete tshia Shapita wa dikumi ne muinayi wa Buakabuluibua, tshidi tshiamba bua ditabuluka dinene dia malu a ntendelelu didi dilua ku diamba dia kulua kua Kilisto ... kupapala kua muanjelo ‘munkatshi mua Diulu’, ‘diyi dikole’ didiye wambila nadi ‘bisamba bionso, muaku onso ne bantu bonso’, bidi bileja lubila lukole ludi nalu lubila elu, ne ludi bua Buloba bujima ». – *La Tragédie des Siècles, p. 385-386*

b. **M’mushindu kayi udi muanjelo wa kumudilu muikale ukoka ntema ya bantu kudi Nzambi Mufuki ?** *Buakabuluibua 14 :7 ; Genese 1 :1 ; Efeso 3 :9*

.....  
c. **Ela menji bua mushindu udi ba Adventiste bangata lubila lua muanjelo wa kumudilu lulua luabo ne tshilumbuluidi ne babibueja mu kuyisha kuabo kua dilua dia Kilisto.** *Danyele 7 :26-27 ; 8 :14 ; Bienzedi 17 :30-31*

.....  
« Mudimu wa kuyisha lubila mu Amérique bakaupesha William Miller ne bakuatshishangani nandi. Muaba eu wakalua nsangilu munene wa ba Adventiste. N’koku mene kuakakumbana tshiprofete tshia lubila lua Muanjelo wa kumudilu mene mene. Mifundu ya W. Miller ne ya bena diandi yakafika mu matunga a kule kule. Lumu lua disanka lua dipingana dia Kilisto kuya mu miaba yonso ya pa Buloba muaba wakadi Lumu Luimpe lufika. Lubila lua Lumu Luimpe lua tshiendelele ludi ne : « Nutshine Nzambi, numutumbishe, bualu bua diba dia kulumbuluisha kuandi diakulua’ kutangalaka pa miaba ya pa buipi ne ya kule. Diunvuija dia biprofete biakadi bimueneka bienzeka diba dimue ne dipingana dia Kilisto ne tshidimu tshia 1844 kufila tshimuenekelu tshinene ku Etats-Unis. Lubila elu kuya mu musoko ne musoko, kufila ntema ya bungi. Bantu ba bungi kutuushibua mu bushuwa bua bulelela bua meyi akadi mu tshiprofete, akadi avuija menji abo a tshijila akadi mafuikakaja diambedi ne bakadi bupukila bulelela. Ba-mpasata bakadi balekela muenenu wabo wa malu a wakatapuluka ne menji akadi abo nkayabo, kubenga mafutu abo ne Ekelezia yabo bua bobo kutua mpanda aba bakadi bamba bua kulua kua Yezu. Ne bu muakadi bungi bua ba-mpasata bakadi bitabuja lubila elu buikale bukese, nunku mudimu wa kuamba lubila elu bakaupesha ba-layike ... ngikadilu wa Ekelezia udi kayi luya ne wa Buloba budi budina mu midima biakadi ne bujitu bua bungi mu mitshima ya ba-nsentedi balelela ; ne kabidi bakadi ne bua kupeta dipungi ne dikengela dia bintu bua kuenza kuabo kua mudimu wa kubikila bantu bua bobo kukudimuna mitshima ne bua lupandu. Nansha muakadi Nsatana utua tshinkandi, mudimu wa Mukelenge wakadiunda ne lukasa ne misuka ya bungi yakitabuja Lumu Luimpe lua dipangana dia Kilisto » - *Le Grand Conflit, p. 365 ne La Tragédie des Siècles, p. 398*

### 3. MUANJELO MUIBIDI

#### a. N'tshinyi tshidi muanjelo muibidi wamba pa bidi bitangila ngikadilu wa mu nyuma wa Ekelezia udi udiamba ne n'ngua Kilisto ? *Buakabuluibua 14 :8*

« Nvinyo n'tshinyi ? – M'mayisha andi a mashimi. Kupesha Buloba nsabatu wa mashimi pa muaba wa Nsabatu wa Mukenji muinayi, ne yeye kuambulula mashimi akayisha Nsatana bua musangu wa kumudilu Eva mu Edene, bua se musuka kawena ufua. Yeye kumuangalaja kudi bantu bavule bilema bia mushindu wa momumue, 'badi bayisha diyisha dia mikenji ya bantu' – *Matayo 15 :9. – Massages Choisis, vol. 2, p. 135*

« Babulona kutua mpanda mayisha a lulengu, nvinyo wa tshilema. Nvinyo eu wa tshilema udi muikale ne mayisha a mashimi munda muandi, bu mudi dipanga kufua dia musuka, dikenga dia tshienbelele dia bantu babi, dibenga kuitabuja dia dikalanganaku kumpala dia Kilisto, diambedi ne diledibua diandi mu Betelehema, ne ditua makumbu ne dizangika dia dituku dia Mpatukila wa Lumingu pa mutu pa Dituku dia Tshijila ne dijidila dia Nzambi. Bilema ebi ne bikuabo bia momumue m'biambila Buloba kudi Ekelezia mishilangane, bua kukumbaja nunku Mifundu idi yamba ne : 'Bualu bua bisamba bionso bia kunua nvinyo wa tshinji tshia masandi andi.' » - *Testimonies to Ministers, p. 61-62*

#### b. Unvuija mushindu kayi wakunvua bena Adventiste ditekeshibua diabo dia kumpala dia mu mikolo, dijandula dia ndekelu dilelela dia matuku 2300 ne dibikidibua diabo bua bobo kutapuluka ne bakadi bambila lubila. *Habakuka 2 :3 ; Matayo 25 :6*

« Munkatshi mua tshidimu tshia 1844, lubila elu luakambibua mu meyi abuena adi mu Mifundu ne : 'Tangilayi mubaki ! Tangilayi Mubaki !' Tshikondo etshi tshiakadi munkatshi mua dituku dijadika diakadibo bela menji ne matuku binunu bibidi ne nkama isatu akadi ne bua kujika mu tshidimu tshia pankatshi pa muvua wa luya ne wa mashika bia tshidimu tshiotshi tshimue tshiakajandulabo pashishe dijika dia matuku â.

Kunyangakana eku kutuishibua ku dijandula dia mukenji wa Atashasete muela bua kuibakulula Yelushalema, mukenji udi ujadika muaba wa kubangila tshikondo tshia bidimu binunu bibidi ne nkama isatu, n'kubangila mu tshidimu 457 kumpala kua Yezu Kilisto, kabiena bu muakadibi bimanya kumbangilu. Patudi tuangata tshidimu tshia 457 bua kubanga kubala bidimu binunu bibidi ne nkama isatu, tshikondo etshi tshidi tshijika mu tshidimu tshia 1844. » - *La Tragédie des Siècles, p. 431*

« Ekelezia yakabenga lubila lua muanjelo wa kumudilu, yakabenga bua kuitabuja munya wa mu Diulu ne kuijimija buimpe bua Nzambi. Kueyemenayi makole abo. Mu kutontonona kua lubila lua kumudilu, yoyi kuditeka mu ngikadilu wakadi kayi ukumbana bua yoyi kukenkeshibua kudi lubila lua muanjelo muibidi. Kadi banangibue ba Nzambi, bakengesha, kuitabujabo lubila elu ne : 'Babulona wakupuka', ne bobo kupatuka mu Ekelezia eyi. » - *Premiers Ecrits, p. 237*

#### 4. MUANJELO MUISATU

##### a. M’budimuishi kayi bua kukatshila budi bulua kudi muanjelo muisatu ? *Buakabuluibua 14 :9-11*

.....

« Budimuishi budi butambe kukuatshisha bowa butu kabuyi buambila bantu ba-tshifuaka m’bobo budi buikale mu lubila lua Muanjelo muisatu. Bubi ebu budi mu mushindu wa pa buabo m’bubi butambe, bualu budi buya kukeba tshinji tshia Nzambi tshidi katshiyi tshisambakaja ne Luse lutambe bua tshilua kudi bashipi ba mikenji. Kakuena mushindu wa kulekela Buloba mu midima pa bualu budi bua mushinga nunku nansha. Budimuishi bua bubi ebu budi ne tshia kufika kudi Buloba diambedi ne kulumbulula kua Nzambi kakuyi kuanji kulua kudibo ; muntu yonso wakadi ne bua kumanya muanda eu ne kupeta tshikondo tshiakunyema ... Tshiprofete tshidi tshiamba ne, budimuishi ebu nebabuambe ne diyi dikole kudi Muanjelo udi upapala munkatshi mua Diulu. Nebukoke ntema ya Buloba bujima. » - *La Tragédie des Siècles, p. 487*

##### b. Mu tshikondo tshia lubila lua Muanjelo muisatu, m’mushindu kayi udi bansantu batapuluke ne bantu bakuabo ? *Buakabuluibua 14 :12*

.....

« Batendeledi ba Nzambi nebukale ba pa buabo, batapuluke ne bantu bakuabo ku kanemu kabo bua mukenji muinayi. Nunku, mukenji muinayi udi tshimanyinu tshia bukole bua bufuki bua Nzambi ne tshimanyinu tshia se yeye udi mukumbanyine dimukukuila ne maneme bia kudi muntu ... Mu kupatuka kua mu mvita, buena Kilisto bonso nebukale butapuluke mu bitupa binene bibidi : tshitupa tshimue tshia badi baya kutumikila mikenji ya Nzambi, ne ditabuja dia Yezu, tshikuabo tshitupa tshia badi baya kukukuila nyama wa lonji ne tshinfunyikiji tshiandi nebangate tshimanyinu tshiandi. Nansha muikale kudienzeja kusangisha kaba kamue kua Ekelezia ne Mbulamatadi bua kuenzeja, ne bapele, badishikamine ne bapika’, bua bangate tshimanyinu tshia nyama wa lonji, bantu ba Nzambi kabena baya kutekesha maboko nansha (*Buakabuluibua 13 :16*). – *Témoignages pour l’Eglise, vol. 3, p. 341*

##### c. M’mushindu kayi udi difika dia Muanjelo muisatu diunvuija ? *Buakabuluibua 7 :2-3*

.....

« Mu disangisha dienza ku Dorchester, mu Massachusetts, mu ngondo wa dikumi ne umue tshidimu tshia 1848, bakandeja kuamba kua lubila lua kutua kua tshitampi ne mudimu udi wa bana betu wa kumanyisha munya wakadi ukenka mu njila wetu. Tshikena kumona tshijika, meme kuambila mulume wanyi ne : ‘Ndi ne lumu luebe’. Udi ne bua kubanga kupatula pa mabeji ka Mukanda kakese ne kukamuangalaja munkatshi mua tshisamba. Kanji kuikala kakese diambedi ; pikala bantu benda bakabala, ne batume makuta bua kukapatula pa mabeji, ne nekatûta dikasa diakalengele anu ku mbangilu. Bakandeja bua se mbanyilu eu mukese wa mavuala a munya neûle Buloba tente » - *Life Sketches, p. 125 ne Premiers Ecrits, p. XXIII.*

## 5. MUTU WA LUSONGO WA LUBILA

### a. M'mushindu kayi udi disanka diamba diya kukumbana bua aba badi bafue muditabuja mu tshikondo tshia kuamba kua lubila lua Muanjelo muisatu ?

*Buakabuluibua 14 :13 ; Danye 12 :2*

.....

« Biakadi diba munda nkulu diakasungula Nzambi bua yeye kusungila bantu bandi. Pakadi bantu babi babatshintshimike ne tuseku tuabo, diba kumuenekadi musangu umue mu bukenke buadi ne ngondo kuimana. Bantu babi kutangila muakadi bualu ebu buenzeka ne kukema, apu m'pakadi bansantu babandila bualu ebu ne disanka dia bungi, tshieya tshia dipikudibua diabo. Bimanyinu ne malu a kukema kulondangana ne lukasa. Bintu bionso bia mu bufuki kumueneka bitshingulula mu luendu luabi bu muakafukibuabi ; mayi manene kuimana kayi kabidi apueka, matutu mafike kujuka bua kututakana. Kadi kuakadi muaba wa butumbi wakadi Diyi dia Mukelenge diunvuika ; biakadi bu tshiôna tshia mayi manene ; diakadi dinyungisha Diulu ne Buloba. Buloba kuzakala bikole ; nkita kunzuluka, ne bakadi bafue mu ditabuja mu tshikondo tshia kuamba kua lubila lua Muanjelo muisatu, bakajidila Nsabatu, kupatuka batumbishibue mu malalu abo a mu lupuishi bua kunvua tshipungidi tshia ditalala tshiakadi ne bua kupunga ne aba bakanemeka mikenji yandi. » - *Premiers Ecrits, p. 285*

### b. N'tshinyi tshidi ne bua kuenzeka ku nshikidilu kua ngumu ya Banjelo basatu ?

*Buakabuluibua 14 :14-16 ; Mâko 4 :26-29*

.....

« Nakamona Banjelo baya lubilu eku ne kuaka mu Diulu. Umue wa munkatshi muabo, muikala ne dibaya dia kufundila, ufumina pa Buloba ne wakadi upesha Yezu mulubu wa kujika kua mudimu wandi wa kubadika ne kutua bansantu tshitampi. Pashishe meme kumona Musungidi, wakadi muenze mudimu wandi kumpala kua Mushete udi ne Mikenji dikumi, ukupa tshikupilu tshiandi tshia musenga wa manananshi panshi pa Buloba. Kujula bianza mûlu, kuela diyi dikole ne : 'Buakuenjibua !' » - *Ibid, p. 279*

## Disambombo

12/06

Makonka a kuambulula dilesona

1. Bua tshinyi Nzambi m'mupesha bantu mudimu wa kuamba kua Lumu Luimpe ?
2. M'mushindu kayi wakatangalaka lubila lua Muanjelo wa kumudilu mu Buloba bujima ?
3. Unvuija kabingila kakenza bua se lubila lua Muanjelo muibidi lufidibue.
4. N'dishilangana kayi didi lubila lua Muanjelo muisatu luleja patoke ?
5. M'bualu kayi buaya kuenzeka ku nshikidilu kua m'bila ya Banjelo basatu ?

**DIBIKILA DIA NDEKELU**

« Kunyima kua malu â nakatangila Muanjelo mukuabo upueka, ulupuka mu Diulu, muikale ne bukokeshi butambe, ne Buloba buakatembua ne butumbi buandi » - *Buakabuluibua 18 :1*

Bia kubala : - *La Tragédie des Siècles, Shapita 38*

« Kuamba kua Lumu Luimpe kakuena kuya kujika ne bukole budi bushadila kuinshi nansha kua buakadiku kumbangilu nansha » - *La Tragédie des Siècles, p.664*

**Dia kumudilu**

**14/06**

**1. BABULONA MUNENE**

**a. Unvuija tshikena kumona tshidi tshitua ku moyo tshiakamona Yone bua Ekelezia udi mumanya mu dina dia Babulona Munene. *Buakabuluibua 17 :1-6***

.....

« Mukaji udi mu Shapita wa dikumi ne muanda mutekete wa Buakabuluibua udi mubikidibua dina ne [Babulona] udi munvuija muikale ‘muluatshisha ne bilulu bikunzubile ne bikunze kunzû, mulengejibue ne ngolo, ne mabue a mushinga mukole ne a perle, muikale ne lupanza lua ngolo mu tshianza tshiandi lîle tente ne malu a bukoya bua masandi andi. ‘Ne pa mpala pandi pakadi dina difunda ne, Bualu busokoka, Babulona Munene, mamu wa bakaji ba masandi’ ... M’bukole buakakokeshi munkatshi mua bidimu nkama bia bungi, bukokeshi bua tshinyangu pa mutu pa bamfumu bons oba mu buena Kilsto, bukole ebu ne bukokeshi, n’Lomo. Bilulu bikunzubile ne bikunze kunzû, ngolo, mabue a mushinga mukole ne perle bidi mujeji eu muvuale bidi bivuluija butumbi ne buneme, bunene bia bukokeshi buandi kutamba makelenge a mu nzubu wa bukelenge wa Lomo. Ne kabidi, kakuakadi bukelenge nansha bumue bua bantu buakadi bukuatshike ne mashi a bansantu bu ekelezia wakashipa ne tshikisu tshikole bayidi ba Yezu-Kilsto. Babulona udi kabidi mufundibue bua malanda andi mabi adi kâyi mua kupetangana ne tshidiye ne ‘bakelenge ba pa Buloba’. Mu kuya kule ne Nzambi ne kudisangisha bantu badi kabayi bamanye Nzambi, Ekelezia wa bena Yuda kulua mukaji wa masandi. Biabi, mu kukeba kua tshieyemenu kudi mamfumu ne makokeshi a pa Buloba, Lomo kupila mu bubu bua mushindu wa momumue, ne tshibawu tshiandi tshidi tshia momumue » - *La Tragédie des Siècles, p. 412-413*

**b. M’mushindu kayi wafika bukelenge ebu ku ndekelu ? *Buakabuluibua 17 :15-18***

.....

## 2. MUANJELO MUKUABO

### a. Unvuija dilua dia Muanjelo udi umueneka mu Buakabuluibua 18 :1

« Ngumu ya Banjelo basatu idi ne tshia kuikala misangisha kaba kamue, bua kutuadila Buloba munya musangisha kaba kamue wa misangu isatu. Mu Buakabuluibua, Yone udi wamba ne : ‘Nakatangila Muanjelo mukuabo upuekala ne bukokeshi bunene ; ne Buloba buakatembua ne butumbi buandi’. [*Buakabuluibua 18 :2-5*]. Ebi bidi bileja difikisha dia lubila lua ndekelu ne ngumu isatu ya budimuishi kudi Buloba. » - *The SDA Bible Commentary, vol. 7, p. 985*

« Ekelezia udi muikale ne mabanji a ngasa wa Kilisto, ne kudiye kudi dinanga dia Nzambi diya kumueneshibua patoke mu mushindu mene mene udi wa bukole butambe kudi ‘makokeshi ne makole adi mikale mu miaba ya mu Diulu ! » - *Conquérants Pacifiques, p. 11*

### b. Bidi biunvuija tshinyi butumbi bua Muanjelo, ne m’ mushindu kayi udibo bulejibue patoke ? *Misambu 29 :1-2 ; Yone 17 :22-23*

« M’padi kufuimba kua ngikadilu kulengulula, padiku kakuyi buimpe bua musuka, kupetula kua bupuekele bu antendelelu, padi budisu ne dinanga dia tshidi tshibomba didifunyisha bidi bikengela lumu ne butumbi bia ma ekelezia, bilenga bia ngolo, kuenza kua bibilu binene. Kadi Nzambi kena mutumbishibue ne mupeshibue lumu mu malu â adi amueneshibua patoke. Mushinga wa Ekelezia wandi kawena ubadibua bua mabanji adi amueneka ku mesu, kadi udi ubadibua bua buakane budi bumutapulula ne Buloba. Nzambi udi upima tshidi Ekelezia bilondeshile kudiunda kua mu nyuma kua bidimba biandi, bilondeshile dimanya diabo dia Kilisto » - *Prophètes et Rois, p. 428*

### c. M’ mushindu kayi wakunvuija Nzambi tshidi butumbi buandi pakalomba Mose bua yeye kumona butumbi ebu ? *Ekesode 33 : 18-19 ; 34 :5-7*

« Ngikadilu wa Kilisto udi usokolola patoke butumbi bua bimanyinu bia Nzambi, ne dibeji diongo dia Mufundu didi diela mupenya wa munya wandi. Buakane buandi, budi bufuana dibue dia perle ku butoke ne ku buakane, kabuyi tshilema ne kabuyi katoba. Kakuena tshienzedi tshidi tshia muntu tshidi tshimanye mua kulongolola dipa dinene ne dia mushinga mukole dia Nzambi kudi bantu. Didi dia tshishiki » - *Les Paraboles, p. 93*

« Ngikadilu eu kulejibua patoke mu moyo wa Kilisto. Bua kupisha bubi mu mubidi ku tshilejelu tshiandi, yeye kuangata mubidi wa bubi. Wakadi ubandila anu ngikadilu wa Nzambi ne wakadi umubuluila anu bantu patoke. Kilisto udi musue bua bayidi baleje mu moyo wabo patoke, ngikadilu wa momumue » - *God’s Amazing Grace, p. 322*

### 3. LUBILA LUA BUDIMUISHI

#### a. M'mushindu kayi udi Nezmmbi wakula ne badi basombe mu Babulona ? *Buakabuluibua 18 :2*

.....

« Muanjelo eu wakadi ne bukole bua bungi ne munyungulula ne butumbi. Pakadiye upueka pa Buloba, Buloba buakakenkeshibua ne butumbi buandi. Munya wakadi umufila kubuela miaba yonso. Wakadi wela lubila ne diyi dikole. Lubila ludi luamba bua dikuluka dia Babulona, lubila luamba kudi muanjelo muibidi, ne ludi luambulula ne diyi disakidila dia dinyanguka didi dibuela munda mua ma Ekelezia katshia ku tshidimu tshia 1844. » - *Premiers Ecrits, p. 277*

#### b. N'tshinyi tshiakadi kushintuluka mu Babulona katshia lubila lua muanjelo muibidi luambibua bua musangu wa kumpala ? *Buakabuluibua 18 :3*

.....

« Lubila lua Muanjelo muibidi [wa Buakabuluibua 14], luakayishibua diambedi mu tshitshia tshia luya mu tshidimu tshia 1844, luakadi anu bua Ekelezia yak u Etats-Unis, m'muaba mene wakayishabo budimuishi bua tshilumbuluidi ne bobo kubenga budimuishi ebu, ne m'muaba mene wakalua dikuluka ne lukasa. Biabi, kuamba kua lubila elu kakuakadi ne bua kujika mu 1844 nansha. Bidi mu bushuwa bua se Ekelezia yakakuluka panshi mene mene mu malu a mu nsombelu anu bua kubenga kua munya wa lubila lua ba Adventiste. Kadi dikuluka ne edi kadiakadi dinene nansha. Mu kushala bakandamana mu kupanga kuteleja kua malu malelela a tshikondo tshietu, Ekelezia kukuluka panshi mene mene. Bua nunku, diyi kadiena mua kuambibua kabidi ne : 'Babulonda munene wakupuka, wakupuka, wakunuisha bisamba bionso mvinyo wa tshinji tshia masandi andi.' Kena muanji kunuisha bisamba bionso mvinyo. Menji akudifuanyikija ku malu a Buloba ne a kupanga kuikala ne ntema ku malu malelela matoke ne majadikibue adi bua tshikondo tshietu, ngikadilu eu m'mujame mu Ekelezia ya bena Mishonyi yonso badi ne m'beni Kilisto, ne ekelezia eyi idi m'munkatshi mua kusonguela kukole kua muanjelo muibidi. Kadi dilenduka kadiena dianji kûla tente nansha.

Mukanda wa Nzambi udi wamba ne, diambedi ne Kilisto kulua, Nsatana nênze bimanyinu, ne malu a kukema a mashimi, ne kudinga konso kua malu mabi.', ne aba bakapanga kuitabuja dinanga dia bualu bulelela bua bobo basunyidibue' ne bapete 'dienzeja dia dipambuka, bua bobo bitabuje mashimi' [2*Tesalonike 2 :9-11*]. Anu pafika malu mu tshipidi etshi ne Ekelezia kudisangisha mu bobumue ne Buloba ne biobi kuikala nunku mu buena Kilisto bonso, apu dikuluka dia Babulona didi dikumbana. Kushintuluka eku kudi kuenda kuya ku tshitupa ne ku tshitupa, ne dikumbana mene mene dia lubila lua muanjelo muibidi didi dienzeka mu matuku adi kumpala » - *La Tragédie des Siècles, p. 420*

#### 4. DIBIKILA DIA NDEKELU

a. **N’dibikila kayi didi dienzeja ne lukasa didi dindila kudi batshidi mu Babulona ? Buakabuluibua 18 :4**

.....

« Shapita wa dikumi ne muanda mukulu wa Buakabuluibua udi ne malu adi bua tshikondo tshidi tshilonda kubenga kua m’bila ya budimuishi ya Banjelo basatu, idi mikale mu Shapita wa dikumi ne muinayi (6-12), Ekelezia neikale mu luidi luamba kudi Muanjelo muibidi, ne m’mudi bantu ba Nzambi badi bashala mu Babulona baya kubasengelela bua bobo kupatukamu. Lubila elu n’lua ndekelu luaya kufidibua kudi Buloba, kakuakuikala lukuabo nansha, ne lubila elu nelukumbaja mudimu walu. Pikala ‘badi kabayi bitabuja malu a bushuwa, kadi badi ne disanka mu malu mabi.’ (2Tesalonike 2 :12), baya kulekelela mu bianza bia bukole budi busesuisha nebuya kuitabuja ‘mashimi’, munya wa bulelela ne uya kukenkela aba badi bikale pa buipi bua kuakidila munya eu. Mu tshikondo atshi, bana bons oba Nzambi batshidi mu Babulona nebaye kuitaba ku dibikila edi didi ne : ‘Bantu banyi, nulupuke munkatshi muandi’. (Buakabuluibua 18 :4) » - *La Tragédie des Siècles, p. 421*

b. **M’bantu kayi badi babikidibue bu ‘bantu banyi’ ne m’banganyi badi babikila bua kupatuka mu Babulona ? Yone 10 :16**

.....

« Nansha mudi midima ya mu nyuma mikaleku ne diya kule pepi ne Nzambi bikale bikokeshibua munda mua Ekelezia idi mikale Babulona, tshibungi tshia bayidi balelela ba Yezu tshitshidi tshikale munda mua Ekelezia eyi. Bantu ba bungi badimu ki mbanji kupeta dimanya dia malu malelela a pa buawu adi mikale bua tshikondo tshietu etshi. Babungi m’badi bikale batua mikemu bua kupeta munya wa bungi, ne m’benda bakeba patupu tshinfuanyi tshia Kilisto mu Ekelezia mishilangane. Bu mudi Ekelezia eyi yenda iya kule ne bulelela ne idisangisha ne Buloba, dishilangana ne didi dimueneka patoke pankatshi pa bitupa ebi bibidi. Ditapuluka didi dienzeka. Tshikondo tshidi tshilua tshidi badi banange Nzambi mu bushuwa kabayi mua kushala kabidi mu bobumue ne aba badi ‘bananga masanka kutamba Nzambi’ [bikala ne tshimuenekela tshia buimpe, kadi bamana kudiuwula bukole’]. – *Ibid, p. 421*

c. **Bua tshinyi dibikila dia kunyema Babulona didi dikale dia diyi dikole ? Buakabuluibua 18 :5-8**

.....

« Muaya wakakenkesha bakadi bindile, wakabuela miaba yonso. Aba, bakadi mu Ekelezia mishilangane kupeta bimue bitupa bia munya, ne bakadi kabayi bunvua ne babenga m’bila ya Banjelo basatu, bakitaba ku lubila ne bobo kumbuka munda mua Ekelezia yakadi mikuluke » - *Premiers Ecrits, p. 278*

## 5. PA BUIPI NE KUELA LUBILA

a. **Unvuija mushinga wa lubila lua budimuishi ludi lutoke ne lujadika.** *Yeshaya 58 :1 ; 1Kolinto 14 :7-8*

« Shapita dikumi ne muanda mukulu wa Buakabuluibua udi uleja bulelela ki mu tshitupa nansha kadi ne dikima dionso ... tuakutamba ku lakana mu kuamba kua lubila lua muanjelo muisatu » - *Evangéliser, p. 211*

« Nzambi wakadi musue bua bantsenedi bajuke ne mu diyi dimue, mu kuela kua mpungi, bua bantu bonso badienzeja ne lukasa bua yonso ikale muaba wandi wa mudimu ne kuenza mudimu udi wenda mu mudimu eu munene. Apu, munya mukole ne mutoke wa Muanjelo eu mukuabo udi upueka mu Diulu ne bukole bua bungi wakadi kûlu Buloba tente ne butumbi buandi. Tudi ne bidimu bia lujoko ; ne aba badi bashale mu bufofo ne kupumbisha kudiunda kua lubila luakadi ne Nzambi mene musue bua lolu kumueneka mu disangisha dia ku Minneapolis bu mudi muinda udi ukenka, bobo aba bakapumbisha munya eu, budibo nabo dijinga m'bua kupuekesha mitshima yabo kumpala kua Nzambi, bua bobo kumona ne kunvua mushindu kayi udi mudimu wakapumbishabo ku bufofo buabo bua mu nyuma ne dipapisha dia mitshima yabo » - *The Ellen G. White 1888 Materials, p. 1070*

b. **N'dibikila kayi dia bushuwa dia Yezu ditudi bonso buetu ne bua kulama ku moyo, muntu yonso pankayandi ?** *Yone 12 :35-36*

« Muanjelo mukuabo udi usangisha diyi diandi ku diyi dia Muanjelo muisatu, ne Buloba budi bukenkeshibue ne butumbi buandi. Munya udi udiunda ne ukenka mu bisamba bionso bia pa Buloba. Udi ne bua kutangalaka bu munya mukole. Newikale mufila kudi bukole bunene, tô ne mudi nsesa yawu idi mikunzuluke iya kulenga miaku yonso, bantu bonso ne bisamba bionso bidi pa Buloba bujima. Lekelayi bua n'nuebeja ne : N'tshinyi tshinudi nuenza bua nuenu kudilongolola bua mudimu eu ? Nudi nuenda nuibaka bua tshienlelela anyi ? Nudi ne tshia kuvuluka bua se muanjelo eu mukuabo udi uleja bantu badi ne lubila elu lua kuambila Buloba. Udi biebe munkatshi mua bantu aba anyi ? » - *The Review and Herald, 18 Août 1885*

### Disambombo

19/06

Makonka a kuambulula dilesona

1. Unvuija mushindu kayi udi Lomo muikale upetangana ne diunvuija dia Babulona, mamuandi wa bakaji ba masandi.
2. M'butumbi kayi bua bushuwa bua Nzambi buaya kusokolodibua patoke kudi Muanjelo mukuabo ?
3. Bua tshinyi lubila lua Muanjelo muibidi ludi ne tshia kuambuludibua kabidi ?
4. M'muaba kayi udi tshibunyi tshia bayidi balelela ba Yezu lelu ?
5. M'mushindu kayi ûndi mua kuikala udi wendesha buenzeji buimpe pa mutu pa meme kuikala tshinkandi mu mudimu wa Nzambi lelu ?

**NSHIKIDILU MUMANYISHA**

« Yeye udi ushikama pa nkuasa wa butumbi, wakamba ne, Mona, ndi nvuija bintu bionso bipia bipia. Yeye wakuamba ne, Funda ; bualu bua meyi â adi meyi a kueyemena ne malelela » (*Buakabuluibua 21 :5*).

Bia kubala : *Premiers Ecrits, p. 279-285*

« Buloba buetu budi bukese butambe, ditoba difike mu bufuki bua butumbi, budi muishi mua mulawu wa bubu, ne bupeshibue buneme pa mutu pa bifukubua ne mabulunga bidi bia Nzambi. » - *Jésus Christ, p. 17*

**Dia kumudilu**

**21/06**

**1. MAKENGA MUANDA MUTEKETE A NDEKELU**

**a. N'tshinyi tshidi tshisokolola bua kulumbulula kua Nzambi kudi ne bua kupongolodibua pa Buloba ?** *Buakabuluibua 15 :1 ; Shapita 16*

.....

« Nakamona makena muanda mutekete a ndekelu akadi ne bua kupongolodibua pa aba bakadi kabayi ne muaba wa kusokomena, ne Buloba kabua kupeta nansha dimata dia mayi. Bakanvuija mukumbane bua meme kutangila makenga muanda mutekete a ndekelu : N'tshinji tshia Nzambi. Nakamona tshinji etshi ne tshiakadi tshikuatshisha bowa, tshiakadi tshipapuisha, ne bu yeye wakolola tshianza, anyi kutshijula mu tshinji tshiandi, badi bashikame mu Buloba ebu bakadi kuikala bu ne kabavuaku nansha, ne bakadi kukenga ne ntatu mikole kayiyi mua kujikija ne mputa ya bungi idi kayiyi kondopa bua kujikija busami, idi iya kupashipa » - *Premiers Ecrits, p. 64-65*

**b. M'mushindu kayi mutapuluke udi bualu ebu bunvuija ?** *Yelemiya 25 :30-33 ; Buakabuluibua 19 :17-21*

.....  
.....

« Bantu babi ne bikale bamane kusambuka mikalu ya tshikondo tshiabo tshia diteta ; Nyuma wa Nzambi wakadibo bakandamena ne tshitshiu, mumana kumbuka kudibo – kabayi kabidi bakubibue kudi ngasa wa Nzambi, ne bikale mu bukokeshi bua Nsatana bua yeye kuenza nabo mudiye musue, bua kubueja badi bashikame pa Buloba mu dikenga dinene dia ndekelu. Banjelo ba Nzambi bamana kulekela dipanga kukumbana dia tshikisu tshia majinga mabi a bantu, bintu bionso bitu bikeba matandu ne kutapuluka ne bikale bikopola bua kuenza mudimu. Buloba bujima ne buikale mu bualu bua tshipupu tshia kabutu kakole kutamba kabutu ka Yelushalema wa kale » - *La Tragédie des Siècles, p. 666*

## 2. DILUA DIA MUSANGU MUIBIDI

### a. M'mushindu kayi udi mukanda wa Buakabuluibua unvuija dilua dia musangu muibidi dia Kilisto ? Buakabuluibua 1 :7 ; 6 :15-17

« Katataka mesu etu m'matangija ku luseke ludi diba dipatukila, bualu bua ka ditutu kakese kafike kakadi kamueneka. Kakadi ne bunene bu pankatshi pa tshitupa tshia tshianza, ne tuetu bonso tuakamanya ne tshiakadi tshimanyinu tshia Muana wa muntu. Mu kupuwa wa mukûku wa buneme, tuetu kubandila bonso buetu ditutu bu muakadidi dienda disemena pa buipi, diakadi dilua dia munya wa bungi ne butumbi, tô ne pakamuenekadi ditutu dinene ditoke. Kuinshi kuakadi ne tshimuenekelu tshia kapia ; muanza nkongolo wakadi ku mutu ne wakadi munyunguluka kudi misumba ne misumba ya Banjelo yakadi yimba musambu muimpe kûnvua ku matshi. Muana wa muntu wakadi musomba pa ditutu. Nsuki yandi mitoke ne misuika yakadi ipepa pa makaya andi, ne mutu wandi wakadi mulengeja ne bifulu bia bungi bia butumbi. Makasa andi akadi amueneka ne kapia ; mu tshianza tshiandi tshia bulume muakadi muela musaka mutue bikole, ne mu tshianza tshiandi tshia bakaji muakadi mpungi wa argent.

Mesu andi akadi mafuana ndimi ya kapia, akadi atangila eku ne kuaka bana bandi. Apu mpala yonso kutokoloka, ne ya mpala ya bantu babi, bakadi Nzambi mupidia, yoyi kulua mifike. Tuetu kuela mbila bonso ne : 'Nganyi udi mua kuimana ne kuikala ne moyo ? Tshilulu tshianyi katshiena ne ditoba anyi ? Banjelo kuimanyika kuimba musambu wabo, ne kuakila tshikondo tshia dipuwa dikole, kupuwa eku kuenzeka ku meyi â a Yezu ne : 'Aba bakalengeja bianza biabo ne mitshima yabo ne bikale ne moyo ; ngasa wanyi munukumbena'. Ku meyi â, mpala yetu kukenka ne mitshima yetu kûjibua tente ne disanka dia bungi. Banjelo kubanga kuimba kabidi musambu wabo ne diyi dikole pakadi ditutu dienda disemena pa buipi ne Buloba. » - *Premiers Ecrits, p. 15-16*

### b. Banjelo nebenza tshinyi ? Matayo 24 :31 ; 1Tesalonike 4 :16-17

« [Bubi bua kumbusha mene mene tshinfuanyi tshia Nzambi mu muntu]. Kadi Yezu Kilisto kulua pa Buloba bua kupingajilula tshiakadi tshijimine. Mu kupingana kuandi, yeye neashintulule mubidi wa dipuekeshibua dietu milongo mu kûvuija mufuanangane ne wandi. Mubidi wetu udi ufua, wa bubi, muatuke kudi bubi, newupete kabidi bupuangane buawu ne buimpe buawu ...

Banjelo badi basangisha muaba umue basungudibue bak u nseke inayi ne tô kunfundilu kua Buloba. Bana bakese badi bambula kudi Banjelo bua kubafila mu maboko a ba-mamuabo. Balunda bakadi lufu lututapulula nabo musangu mule ne bikala basangisha kaba kamue bua kashidi, kabayi kabidi mua kuya, ne misambu ya disanka popamue benda babanda mu musoko wa Nzambi » - *La Tragédie des Siècles, p. 699-700*

### c. Nsatana neikala muteka muaba kayi ? Buakabuluibua 20 :1-2

« M'muaba mene wikala Nsatana musomba munkatshi mua bidimu tshinunu yeye ne banjelo bandi. Mutshintshimika nunku kayi udiye ne mua kuya pa Buloba ebu, bua kuya kumona mua kuteta ne kusuya bifukibua bidi kabiyi bikuluke » - *Ibid, p. 715-716*

### 3. TSHILUMBULUIDI

a. **Bansantu nebenze tshinyi munkatshi mua bidimu 1000 bidi Nsatana muikale mutshintshimika anu kaba kamue, kayi mua kupatuka ?** *Buakabuluibua 20 :4-6 ; 1Kolinto 6 :2-3*

.....

« Munkatshi mua bidimu tshinunu bidi bienda bipita pankatshi pa dibishibua dia kumudilu ne dibidi dia ku bafue, tshilumbuluidi tshia bantu babi tshidi tshienzeka. Mupostolo Paulo udi wakula bua tshilumbuluidi etshi bu ne tshidi tshienzeka kunyima kua dipingana dia Mukelenge ... Danyeke udi wamba ne tshikondo tshidi Wa-Kale wa Matuku abungi ulua bua « kupesha bansantu ba Mutambe Bunene wa mu Diulu » (*Danyeke 7 :22*) apu bantu bakane nebakokeshe bu bakelenge ne bakuidi ba Nzambi ... apu ke padi, meyi bilondeshile Paulo adi ne ; ‘Bansantu ne balumbuluishi ba pa Buloba’ (*1Kolinto 6 :2*) akumbana. Popamue ne Yezu Kilisto, badi balumbuluisha bantu babi mu kufuanyikija moyo wabo ku mikenji idi mu Mukanda wa tshijila, ne badi bajadika bualu budi bua muntu yonso. Tshikondo tshidi tshipangadika tshiangatshibua bua dinyoka didi dilongoluela muntu yonso mubi, tshijadika, didi difundibua ku luseke lua dina diandi mu mukanda wa lufu.

Nsatana ne banjelo bandi babi badi kabidi balumbuluishibue kudi Yezu Kilisto ne kudi bantu bandi. Paulo udi ufunda ne : ‘Kanuenta bamanye ne, tuetu netulumbuluishie banjelo anyi ?’. Ne Yuda udi utumanyisha ne Nzambi ‘m’mulame mu nkanu ya tshienzelele mu midima tō ne palua dituku dinene dia dilumbuluisha, banjelo bakadi kabayi balamate bukelenge buabo, kadi bakashiya muaba wabo mene wakuikalamu’ (*Yuda*) ». – *La Tragédie des Siècles, p. 717-718*

b. **N’tshinyi tshidi ne bua kuenzeka ku nshikidilu kua bidimu 1000 bia tshilumbuluidi ?** *Buakabuluibua 21 :2 ; 20 :7-8*

.....

« Ku nshikidilu kua bidimu tshinunu ne kuenzeka dibika dia ku lufu dibidi, dibika mene dia bantu babi, baya kuimana kumpala kua Nzambi bua kukosa ‘tshilumbu tshimana kufunda’ ... Yeshaya udi wamba nunku bua badi kabayi bakane : ‘Nebasangishibue popamue, bu mudibo basangisha bena lukanu mu tshina tshia mu nzubu wa lukanu ; nebabakomene mu nzubu wa lukanu, ne papita matuku a bungi, nebabakengeshe’ (*Yeshaya 24 :22*) » - *Ibid, p. 718*

c. **Nshikidilu wa bantu babi neikale munyi ?** *Buakabuluibua 20 :9 ; Malaki 4 :1*

.....

« Ndimi ya kapai idi ilengeja neyosha bantu babi bonso, kubangishila ku ‘muji ne ku mabeji’. Nsatana n’nyeye udi muikale muji, ne bantu bandi m’badi bikale matamba. Manyoka adi mu mikenji kutekibua mu tshienzedi ; bidi kulumbulula kua buakane kulomba, biobi kupeta diandamuna ; Diulu ne Buloba, bidi bikale bantemu mu bualu ebu, bidi biamba ne kulumbulula kua Yehowa » - *Ibid, p. 731*

#### 4. BULOBA BUPIA BUPIA

a. **Unvuija mulayi wa Nzambi wa kuenzulula bintu bionso.** *Buakabuluibua 21 :&, 5 ; 22 :1-2 ; Yeshaya 65 :17*

.....

« Mudimu wa bupikudi neukumbane mene mene. Muaba wakadi bubulungane, asa wa Nzambi neaye kutamba kuvulangana. Buloba bobo buine, budi Nsatana muikale ubulomba ne m’muaba wanyi, kabuakuikala anu bupikula kadi nebuikala butumbisha, buzangika. Buloba buetu bukesa butambe, budi mene ditoba difike mu bufuki bua butumbi, muinshi mua mulawu wa bubu, ne bupeshibue buneme pa mutu pa bintu bionso bia mu bufuki bua Nzambi. Apa panshi pa Buloba, muaba udi Muana wa Nzambi muase Ntenta wandi munkatshi mua bantu, muaba wakikala Mukelenge wa butumbi ne moyo, kukenga, ne kushipibua, apa panshi pa Buloba, tshikondo tshiaya Nzambi kuenza bintu bionso bipia bipia, tshitendelelu, ntempelo wa Nzambi neikale munkatshi mua bantu. ‘Yeye neasombe nabo, nebukale bantu bandi, ne Nzambi muine neikale nabo’. Benda bilondeshile munya wa Mukelenge, mu tshindelele, bua dipa diandi didi kadiyi kuamba : Emanuele, ‘Nzambi munkatshi muetu’. » - *Jésus Christ, p. 17*

b. **N’tshinyi tshikala tshitapuluke mu Buloba bupia bupia ?** *Yeshaya 65 :21-25 ; Buakabuluibua 21 :4*

.....

« Dikenga kadiakuikala mu kapepa ka mu Diulu nansha. Kamuakuikala binsonji, nansha madilu ...

Mu tshimenga tshia Nzambi ‘butuku kabuenaku kabidi’. Kakuena muntu wikala dijinga ne dikisha nansha. Kakuakuikala ditshioka bua kuenza disua dia Nzambi ne kutumbisha dina dia diandi. Netuikale amu ne tshiashima tshia dinda dia tshindelele. ‘kabakuikala dijinga ne muinda nansha munya, bualu bua Mukelenge Nzambi nkayandi neabakenkeshe’. Diba nedijimine ku butoke budi kabuyi butua mu mesu, kadi budi buya kutamba mene mene bukenke bua munda munya » - *La Tragédie des Siècles, p. 734-735*

« Mu Mifundu, bupianyia bua basungudibue budi bubikidibua ne kuabo (*Ebelu 11 :14-16*). Mulami wa mikoko wa mu Diulu udi ulombola mikoko ya mu Diulu udi ulombola mikoko yandi ku mishimi ya mayi a moyo. Mutshi wa moyo udi ukuama mamuma au ku ngondo yonso, ne mabeji a mutshi eu badi bakuata nawu mudimu bua bisamba bia bantu. Misulu ya mayi kayena ikama, mayi mene matoke bu mudi talatala adi manyunguluke kudi mitshi idi misampile bimpe ne matamba ayi adi afila ditalaji mu njila milongolola bua bapikudibue ba Wa-Tshindelele. Bipapu binene bidi bitentekana ne mikuna miakane kubandila idi yenda ishintuluka ne kutumbuka mûlu mule, lutambishi lua mikuna ya Nzambi. M’mu bipapu ebi bia ditalala ne ku muelelu wa misulu eyi ya mayi a moyo kudi bantu ba Nzambi, bakadi musangu mule benyi ne bena luendu, baya kupeta muaba wabo wa kuikala » - *Ibid, p. 733*

## 5. DIBIKILA NE DIBENESHA

### a. N'ku meyi kayi kuakakeba Yezu bua kukankamika babadi ba biprofete bia Buakabuluibua ? *Buakabuluibua 22 :7, 12-14*

« Mukelenge yeye muine kusokoluela muena mudimu wandi patoke, malu masokoka adi mikale mu mukanda eu, ne udi musue bua mukanda eu, ne udi musue bua mukanda eu muntu yonso udi ne menji ne lungenyi awubala. Malu malelela adimu adi mambila bonso badi bikale ne moyo ku nshikidilu kua bikondo, ne kudi mene bakadi ne moyo mu tshikondo tshia Yone. Amue malu adi munvuija mu tshiprofete etshi akadi mamane kupita, makuabo adi enda enzeka ku mesu kuetu. Amue makuabo adi atupesha m'muenenu wa tshikala ndekelu wa mvita minene idi iluangana pankatshi pa makole a midima ne Mukelenge wa mu Diulu, ne makuabo malu adi unvuija bua butshimunyi ne masanka bia bapikudibue mu Buloba buvuijibue bupia bupia.

Muntu kedi biandi menji bua se, bualu bua udi unvua diunvuija dia bimfuanyi bionso bidi mu Buakabuluibua, ne kabiena ne mushinga bua kondola mu mukanda eu bua kunvua malu malelela adi mikalemu. Eu wakubulula patoke malu â masokoka kudi Yone neaye kufila tshiaka-nzala tshia malu a mu Diulu kudi yonso udi uya kukeba ne disuminyina bua kûamanya. Badi ne mitshima pa buipi bua kûakidila ne bavuijibue bakumbane bua kunvua mayisha andi, ne neabapeshe masanka malaya aba 'badi bunvua meyi a tshiprofete, ne badi balama bidi bifundamu' » - *Conquérants Pacifiques, p.520*

### b. M'mushindu kayi udi Kilisto utubikila bua tuetu kupeta moyo ne ditalala bia tshindelele mu yeye ? *Buakabuluibua 22 :17 ; Yeshaya 55 :1 ; Yone 7 :37-38*

« Dibikila dia Kilisto diakadi bua musuka udi ne nyota ne udi utungunuka ne kukuata ne bukole bonso ku dituku ne dituku padiye unvua mu ntempelo bakula bua dibikila, mu dituku edi dia ndekelu dia difesto. Muntu yonso udi ne bua kufika ku mushimi. Mayi a tshiashima a moyo wa tshindelele adi mafidibue kudi aba badi bapungile. Yezu udi utungunuka ne kuela lubila ne : 'Bikala muntu ne nyota, alue biandi kûndi ne alue kunua mayi' » - *Jésus-Christ, p. 448*

## Disambombo

26/06

Makonka a kuambulula dilesona

1. M'mushindu kayi udi makenga akeba nshikidilu wa Buloba ?
2. Nganyi washala muimane mu dipingana dia Kilisto ?
3. Unvuija tshipatshila tshia tshilumbuluidi munkatshi mua bidimu 1000 ?
4. M'muaba kayi wikala wa kushikama ku nshikidilu wa bantu basungula ?
5. N'di musue anyi uba meme kuikala ne mutshima wanyi onso muena mu bukelenge bua tshindelele bua Nzambi ?



**Nsabatu wa 04/04/2026**

**Bua kuasa Nzubu wa  
midimu ku luseke lua  
Italie**

**Page 4**



**Nsabatu wa 02/05/2026**

**Bua midimu ya buambi  
mu Buloba bujima**

**page 25**



**Nsabatu wa 06/06/2026**

**Bua kuasa Nzambu wa  
mitendelelu mu Prague**

**Page 51**